

CIMANYINU

Nudi mwa kusòmbaayi. Mwoyi wenu awu mu dinda emu, nwènù bônsò! Ndi ne disanka dya kwikala mu mudimu wa Mukalenge mu dinda emu, mwalukile pa... Ncivwa mene mumanye ne netwalukile anyi katwakwalukila to, kadi Mukalenge nyewu walongololu mushhindu, nenku nyewu tudi baalukile bwa disangisha leelu ewu. Mpindyewu tudi tutekemena bikondo bya dicyonkomoka leelu ewu, mu dinda emu, mu dileesona edi dya kalaasa kaa Dyalumingu, mu Dìyì. Nenku dilolo edi nekwikale cyakabidi midimu ya dyondopa, ne mudimu wa meesa a Mukalenge wìkalà mwa kulonda.

2 Nenku mpindyewu tudi ne—ne dilambula dya mwânaà, ngeela meeji ne... Mwaneetu Neville mmufume ku dingambilà ne muntu kampanda uvwa ne mwanende wa mu diboko wa kulambula. Nenku bu yéyè mwa kulwa ne mwânaà awu pa díbà edi, mpindyewu. Nenku mwaneetu wa balume neashaale, anyi kampanda wa kudibo aku, ku cisanji cya orgue anyi cya pyàñô, ku cimwe cya ku byôbì. Nenku díbà adi nebalwe ne mwânaà wa mu diboko awu. Netwénzè mudimu wa dilambula awu; bwa twâmònà mwa kupita buludi, ne lukasa lwônsò, ku Dìyì.

3 Bwalu, tudi banange bwa—bwa kuneemenena ku Dìyì. Aci ki—aci ki cintu cya mushinga, kufila díbà dyetu menemene ku Dìyì dya Mukalenge. Pa nanku tudi ne kusakidila kwa manza tente bwa mpunga ewu wa kudisangishaku neenu bônsò kaaba aka leelu ewu, ne bwa... ne mudimu ewu—ewu.

4 Ndi ne cya kwikala mutupakane. Abi bidi anu bilenga, mwaneetu wa bakaji. Mvwa—mvwa—mvwa mwele meeji ne ki civwàku. Pàmwàpa cidi anu ditupakana cyanaana. Eyo. Mpindyewu, ndi nnwela twasakidila, wa manza tente, nansha nanku. Pàmwàpa eci, ngeela meeji ne ncilwile kudi muntu mukwabo kampanda, cilwile kudi muntu mukwabo kampanda, nenku ncitwale anu lutatu lwa mushindu kampanda.

5 Mpindyewu bantu bônsò badi badyumvwaku bîmpè menemene anyi? [Disangisha didi dyamba ne: “Amen.”—Muf.] ...?... Twasakidila kudi Nzambi!

6 [Mwaneetu Neville udi wamba ne: “S’ki yéyè ulwàlwa naabo ewu.”—Muf.] Mpindyewu, kaa, eyowa’s, s’ki bânà bakese mbôbò aba. Mfwilaayiku luse. Mfwilaayiku luse. Eyo, udiku mwa kulwa anyi, wêwê mukulu? [“Eyowa’s, mukalenge.”]

7 Ee, twânaà twa bakaji tubidi, tukese tulenga’s we, twânaà twa bakaji twa mêsù mafiikuluke! Huh? Abi’s mbilenga be. Dyende nganyi? Tangila kuneeku wê! [Maamù udi wamba ne: “Jennifer Lee.”—Muf.] Jenny? [“Jennifer Lee.”] Jennifer Lee. Dînà dya ndekeelu nganyi? [“Serept.”] Serept. Nudi baa penyi, Mwaneetu

wa bakaji Lee? [“Versailles, Illinois.”] Versailles, Illinois. Bilenga kaayipu’s we!

⁸ Mpindyewu, mu Bible. Mpindyewu, pa ciibidilu, batubatu ne cintu paaci ne ndibatiiza dya bâna’s; twêtù katütu twitabuuja dibatiiza dya bâna to, bwalu bôbò kî mbanji kwenza mpekaatu to, bwalu bacidi bâna bikole. Kadi tutu twitabuuja dilambula dya bâna kudi Mukalenge. Mpindyewu mukulu ne mêmè netutentekela mwânà mukese wa mu diboko ewu byanza. Muwâmbì ne, n’Jenny? [Mwaneetu Neville udi wamba ne: “Jennifer.”—Muf.] Jennifer. Eyo.

Twinyikaayi mitu yetu.

⁹ Taatù wa mu Dyulu, patudi tulwa mu dinda emu ne mwânà mukese wa bakaji ewu apa, udi ubiikidiibwa ne Jennifer ewu, kûdì Wêwè, maamù ne bananga bende mbafume nende ntanta mule, bwa kulambudiibwaye kudi Mukalenge. Tudi bamanye ne Wêwè wâkatentekela bâna bakese baa bu nunku ewu byanza Byebe, mu matuku Ebe Wêwè, ne—ne kwamba ne: “Lekelaayi bâna bakese balwe Kûndì, ne kanubakandiki to, bwalu mudi bôbò aba emu ki mudi Bukalenge bwa mu Dyulu.” Mpindyewu twêtù nyewu tuKupeeshaye, bwa nsòmbelu wa mudimu, mu Dînà dya Yesu Kilisto. Amen.

¹⁰ Mwânà mukwabo wa bakaji mutekete dyende nganyi? [Maamù udi wamba ne: “Connie Lynn.”—Muf.] Connie Lynn. Eyo, Connie mwânà, udi, udi umfikisha mêmè ku didyumvwa anu bu ne ndi mukese’s. Kaa, udi ne bwôwà anyi? Kaa, ndi mmona ne kabyakukumbana nanku to, maamù. Eyo.

Twinyikaayi mitu yetu.

¹¹ Mukalenge Yesu, maamù nyewu ututwadila Connie mwânà ewu mu dinda emu, mu mudimu wa dimulambula kudi Wa bucole bwônsò. Wêwè ngudi mumupeeshe mwânà ewu, bwa kumukoleshaye, nenku nyêyè ewu ulwa nende Kûdì Wêwè, ne mwakunyende wa bakaji. Nyewu ndomba, Taatù wa mu Dyulu, bwa Wêwè kwikalaku ne luse. Beneshaku famiye ewu. Beneshaku mwânà mutekete wa bakaji ewu. Patudi twêtù tumutentekela byanza apa, mu Dînà dya Yesu Kilisto, tudi tuKupeeshaye bwa nsòmbelu wa mudimu. Amen.

Nzambi akubeneshe, ne bâna beebe bakese abu.

Ekelekele, twäpecì bâna bakese bààbûngì mpindyewu!

¹² Mwânà mukese wa balume ewu dyende nganyi? [Maamù udi wamba ne: “Joel Lee Watson.”—Muf.] Joel Watson. [“Joel Lee.”] Joel Lee Watson. Mwânà wa balume bulenga kaayi’s we, ne mêsù manene a bleu! Ekelekele! Nudi bônsò baa penyi? [“Eastman, mu Géorgie.”] Baa ku Géorgia. [“Um-hum.”] Mvwa anu ndyambidila ne nudi baa ku Sud. Ncivwa mumanye ne to... [“Ee, kwetu ndwà ku Tifton kwaka. Ndwà kwine aku’s.”] Kaa, eyowa. Kaa, wetwawu! Ewu’s, mmwânà wa balume mukese mulenga wa ku

Géorgie, dîbà adi, huh? Eyo, mukalenge. Eyowa's, mukalenge, abi's mbilenga be. Ùdi pende mwa kwakula's, yêyè ewu. Kî mmômò anyi wêwè mwânà?

Twinyaayi mitu yetu.

¹³ Taatù wa mu Dyulu, nyewu tulwa ne mwânà mukese wa balume munangiibwe ewu, padi maamù ne taatù biimane kaaba aka bwa—bwa kutwa mushinga disangila dyabo apa. Wêwè ngudi mubapeeshe mwânà wa balume mukese ewu bwa kumukoleshabo, kadi nyewu bamwaluja Kûdi. Ncifwanyine kwikalala cintu cya—cya mmwenekelu mulenga kaayi, cyenze bu Ana, wa kale awu, wâkasambilu bwa kupeta mwânà; ki—ki Nzambi kumupeesha mwânà awu, kadi yêyè kumwaluja ku ntempelu wa Nzambi, bwa kumulambula. Enzaku, Mukalenge, bwa ne mwânà mukese wa balume ewu ikalèku musadidi Webe, bwa tatwèndè ne mamwèndè kubeneshiibwabo, ne kwikalabo ne bucole bwa mubidi ne dikanda bwa kumukoleshabo. Nenku swaku bwa yêyè alaale abooboke, ikale ne nsômbelu wa dyèsè, ne ikale musadidi Webe, patudi tuKulambulaye apa, mu Dînà dya Yesu Kilisto. Amen. (Anubeneshe!) Nwâmuuvijaayikù mulume wa nsongo, pàmwâpa muprofeta mukwabo wa kânâkânà bu Samwele.

¹⁴ Mpindiyewu bânà bakese babidi balenga baa balume mbôbôba. Ekelekele! Basatu bajima's, dîbà adi? Ee, awu's mfamiye mujima's. Dyebe nganyi? [Mwânà wa balume awu udi wamba ne: "Michael."—Muf.] Michael. Kadi dyebe peebe? [Mukwabo mwânà wa balume awu udi wamba ne: "Paul."] Paul. Ménâ malenga kaayi's we! Kadi dyebe peebe? [Mwânà wa bakaji awu udi wamba ne: "Debbie."] Debra. Aci's ncilenga bulelala. Michael, ne Paul, ne Debra. Kadi dînà dyebe dya ndekeelu nganyi? [Taatù udi wamba ne: "Ellis."] Ellis? ["Eyowa."] Ee, aci's mfamiye mukese mulenga wa dikema, mûndì mêmè nnwambila.

¹⁵ Nudi bamanye's, pândì mêmè mmona bânà bakese mushindu awu, citu misangu yônsò cingaaluja anu pâncìvwà mwânà mukese apu. Nenku mpindiyewu dîyì dya kale ditubo bamba, nudi bamanye's, ditu ne: "Badi banudyata pa makâsà mpindiyewu, nebanudyate pa mwoyi pashiishe," kadi mêmè ncyêna ngiitabuuja ne nebiikale nanku patudi tubalambula kudi Mukalenge to. Tudi bambule bujitu mwaba ewu, ne Nzambi ngudi muteeke bwalu ebu mu cyanza cyebe. Yêyè mmukuvwije muysiishi. Ntu misangu yônsò anu ngamba pa bidi bitangila bayiishi bakaji, nudi bamanye's, kadi maamù ne maamù yônsò mmuyishi; s'ki disangisha dyende ndyôdì edi, nwamonu's, bwa kukoleshaye bânà bakese aba mu mushindu mujaalame, padi taatù muye ku mudimu apu. Nenku nudi bapete bujitu bwa kwambula. Nzambi anubeneshe bônsò babidi. Nudi ne kaafamiye kakese kalenga.

¹⁶ Taatù wetu wa mu Dyulu, nyewu tulwa ne Michael mwânà, udi umweka bu mwanaabute ewu. Ne nyewu tumuntentekela byanza, mu dimulambula, kudi Yesu Kilisto. Famiye wende mmulwe ne bânà bakese bwalu Wêwè udi muteke cyôci eci mu bukubi bwabo—bwabo, ne bôbò mbamanye ne kabbeena bakumbana to, padiku kakuyi dikwacisha Dyebe, pa nanku mbalwe ne famiye wabo mukese ewu, bwa kubalambula.

¹⁷ Mpindyewu nyewu nKupeesha Michael mwânà ewu, bwa nsòmbelu wa mudimu, mu Dînà dya Yesu Kilisto. Bya mwomumwe kabidi, tudi tutentekela Paul mwânà byanza, ne biikale tulambula mwoyi wende kudi Yesu Kilisto, bwa nsòmbelu wa mudimu bwa butumbi bwa Nzambi. Kabidi ne Debra mwâna ewu, tudi tumutentekela byanza, Taatù, bwa dimulambula, bu civilukilu cya Yesu Kilisto, Wâkatentekela bânà bakese byanza, wamba ne: "Balekelayi balwe Kündi; kanubakandiki to." Swaku bwa nsòmbelu wa mwânà mutekete wa bakaji ewu abeneshiibwe mu Bukalenge bwa Nzambi.

¹⁸ Beneshaku taatù ne maamù, ne swaku bwa kwikalabo ne mwoyi, balaale babooboke ne nsòmbelu wa dyèsè, too ne ku dimona dya bânà baabo balela mu mudimu wa Nzambi. Tudi tulomba dibenesha edi bwa butumbi bwa Nzambi, patudi tubalambula mu Dînà dya Yesu Kilisto apa. Amen.

Anubeneshe! Akubeneshe! Nudi kaafamiye kakese, kalenga be. Eyowa's.

¹⁹ Cintu kaayi...Nudi bamanye meeji ândì mêmè ngeela anyi? Bânà batekete baa bakaji bakaadi, mbalwe kulengela mpindyewu kupita muvwabi pâncìvwà mêmè mwânà mutekete. Eyowa's, mukalenge. Mêsù manene bulengawu! Dyende nganyi? [Maamù udi wamba ne: "Joanna."—Muf.] Joanna. Ne dînà dyebe dya ndekeelu didi...[Taatù udi wamba ne: "Blair."] Blair, Joanna Blair. Nwénù bàdì batàngidiè paanyima pâapa bàba, kî nciipòpí anyi? Eyowa's, mukalenge. Nenku maalu kaayi's wêwè, Joanna, huh? Ne ndambu wa cyena-bundù's, uh-huh, anu ne ndambu wa cyena-bundù. Kaacintu kakese kalenga kaa dikema.

Twinyikaayi mitu yetu.

²⁰ Taatù wetu wa mu Dyulu, famiye wa ba-Blairs ewu nyewu mupete dipà mu disangila dyabo, Joanna mwânà ewu. Kadi tudi bamanye ne matuku mmabi, adi Sataana mwikale ku nseke yônsò, bwa kucincimikangana, nangananga bânà baa bakaji batekete aba. Ne bôbò mbamanye ne kî mbakumbane bwa—bwa kumukolesha mu mushindu mujaalame to. Kadi paabo mbaswe bwa akoleshiibwe mu mushindu mujaalame, ne bwa—bwa kwikalaye musadidi Webe. Nenku badi bakolesha mwânà wa bakaji mukese ewu bwa kukupa Wêwè luumu. Nenku mpindyewu nyewu balwe nende, bwa dimulambula, kûdì Wêwè. Nyewu tumutentekela byanza, mu Dînà dya Yesu Kilisto,

patudi tulambula Joanna Blair mwânà ewu kudi Bukalenge bwa Nzambi, bwa butumbi bwa Nzambi. Amen.

Akubeneshe, Mwaneetu Blair. Mukalenge ikale neenu.

²¹ Wetwawu mu dinda emu, mukalenge! [Taatù udi wamba ne: "Wetwawu!"—Muf.] Ewu mmwânà wa balume bulengaye! È, maalu kaayi wêwè's? Ee, ekelekele, s'udiku mufwanyine kumweka bîmpè menemene bu wêwè mwa kukudimuka mu *nunku* ewu's. Eyowa's, mukalenge. Wêwè's udi ne katù kakese, kalenga, kímpè be, ne kwîsù bipetàngâne. Huh? Dyende nganyi? ["Daniel Mark."] Daniel Mark. Kadi dyebe dya ndekeelu? ["Mark Kardum."] Hardum. ["Kardum."] Kardum, Daniel Mark Kardum.

²² Utu wa muneemu mu nyungulukilu emu anyi, Mwaneetu Kardum? [Mwaneetu Kardum udi wamba ne: "Mpindyewu, mu cimenga cya Melkerk."—Muf.] Eyowa's, mukalenge. Utu wa penyi? ["Mêmè ntu wa mu Ditunga dya New York."] Ditunga dya New York, muntu's n'Yankee, bulelala. ["Eyowa."] Ee, s'nditunga dinene. Mêmè ntu ne baa kwetu basòmbèlemù. Taatù mukwabo mmusòmbè mu Pittsburgh. Kaa, ntu mupicishepicisheku kapeepa mu New York amu bikole. Nênyemù bwa disangisha dyanyi dyàlondà, mu New York City, ku The Stone Church aku. Eyo.

²³ Mpindyewu, dyende m'Mark, s'mmuwâmbì's? [Taatù udi wamba ne: "Daniel Mark."—Muf.] Daniel Mark, mwânà mukese wa balume bulengaye!

Twinyikaayi mitu yetu.

²⁴ Mukalenge Yesu, nyewu tulwa ne Daniel Mark mwânà Kûdì, bwa dilambula dya nsòmbelu wende. Mmufidiibwe mu byanza bya taatù ne maamù, bwa kukoleshabo mwânà mukese ewu mu mibelu ya Nzambi. Nenku mbamanye ne kî mbakumbane to, pa nanku nyewu badi balwa nende kûdì Wêwè, Mukalenge, bwa Wêwè kubenesha nsòmbelu wende. Nenku, mpindyewu, bu mutudi twétù bamanye ne dituku ndibi, ditudi ne mwoyi edi. Nyewu tumona bânà bakese aba, katuyi anu bamanye ne maalaba mmubalamine cinyi to, kadi, cyônsò ciikalaku aci, tudi tukwiskeyelabu Wêwè mu cyanza. Tudi tutentekela mwânà mukese wa balume ewu byanza, biikale tulambula mwoyi wende Kûdì, bwa nsòmbelu wa mudimu mu Bukalenge bwa Nzambi, mu Dînà dya Yesu mmutudi tulomba emu. Amen.

²⁵ Nzambi akubeneshe, mwaneetu wa balume. Mmwânà wa balume mulenga be. Akubeneshe, wêwè Mark mwânà.

Kaa...bwelaayi naabo muneemu, bwelaayi
naabo muneemu,
Bûmùshaayi mu myaba ya mpekaatu;
Kaa, bwelaayi naabo muneemu, bwelaayi
naabo muneemu,
Lwâyi ne bânà bakese kudi Yesu.

Aci's ncilenga be! Twasakidila, mwaneetu wa bakaji.

²⁶ Mbanganyi bavwa kaaba aka mu dyalumingu, bavwabo basambidile mu dyalumingu dishaale, badi bumvwe bipeta ne bumvwe ne mbondopiibwe? Elaayi byanza byenu muulu, nwêñù bavwabo basambidile abu. Kaa, ekelekele, tangilaayi kuneeku numone's, pamwe ne muntu ne muntu yônsò wa kudibo.

²⁷ [Mwaneetu Neville udi wamba ne: "Aleluuyah! Aci's ncilenga's! Nzambi atumbe! Nkaavwa muumvwe bacyamba, lumingu lujima elu."—Muf.] Eyowa's, mukalenge. Ne mêmè paanyi, mvwa muumvwe. Ndi muswe anu kwikala musòmbe cyanaana, nteeleja, nwamonu's.

²⁸ Nwamonu's, cintu kampanda cidi munkaci mwa kwenzeka, cîngàànwàmbilà pashiishe, musangu kumpala, nwamonu's, ncyâ—ncya butumbi ne cilenga be. Ne bu twêtù mwa... Netwakule pa bwalu abu, mu disangisha kampanda dikwabo, nudi bamanye's, musangu kumpala. Cicidi anu cibangilaku ne kwenzeka, nenku tudi ne kusakidila kwàbûngì bwa bwalu abu.

²⁹ Nenku mvwa myye ku Kentucky kwaka, bu mûntù ngenza kukuya ku cidimu ku cidimu, nya kuntwaku. Mvwa mukuye ne bamwe baa ku balunda baanyi. Ne kabitu anu bwa dikatwa dya buluwà bwa nshindi patupu to, ne nwêñù biine nudi bamanye aci, nwamonu's.

³⁰ Pa nanku tudi anu munkaci mwa kupicila mu cikondo cya butumbi, nenku tudi ne kusakidila kudi Mukalenge!

³¹ Bikengela nye mpindyewu, bidi bikengela bwa ngaalukile kumbelu paanyima paa disangisha edi. Ne pashiishe, nenku tudi... Pashiishe nêngààlukilè mpicile cyakabidi apa, paanyima paa cikondo kampanda, mu diya dya ku New York bwa disangisha kampanda. Nenku twêtù bapete mpunga wa kwanji kwimana ndambu, mona's, netwi—netwikale ne disanka dya kwenzaku dikwabo disangisha mwaba ewu mu tabernacle emu.

³² Ne pashiishe nebikengele bwa mêmè kwalukila, mu diya dya ku Shreveport. Ne pashiishe twalukile kumbelu, biikale ne kiipacila kaa kwikala apa mu cikondo cyônsò cya diikisha aci, bu Mukalenge mwa kwanyisha, ngaalukila ne famiye. Ne pashiishe—ne pashiishe ndi muswe ku-...

³³ Pashiishe disangisha dyanyi nedyenzekele mu Phoenix, mu ngondo wa kumpala. Ndisangisha dya ku cidimu ne ku cidimu kuntwaku bwa Beena Kilisto baa Kantu-ku-byanza. Nenku bu lumingu lujima anyi matuku dikumi kumpala kwa cyôcì aci, nênteetè bwa—bwa kufucila cilumyana cya cinene aci... Beena Dînà dya Yesu abu; pa ciibidilu civwa m'Mwaneetu wa balume Garcia, ne mwaneetu wa balume wa—wa beena Espagne kuntwaku mbawwa ne mwaba munene, mulenga wa dikema kuntwaku. Bôbô mbadi bafume ku diwibaka. Wôwô awu newikale ne myaba ya binunu byàbûngì bya bantu bàsòmba, mucikàle anu ne bupya bwawu, kadi kaadisangisha

kaabo kiikale kakese bikole. Mbangambile ne ndi mufwanyine kuwufucila dîbà dyònsò naka dîndì mwa kuswa adi. Pamutu paa mêmè kubanga anu—anu ngenda nyunguluka cyanaana, ngenda anu nyungulukangana mu cibandabanda amu, ku ekeleesiya ne ku ekeleesiya, ngeela meeji ne nêngiïkalè anu mwa kusangisha cintu cyônsò aci mu disangisha dimwepele dya cikòngò cinene, nudi numona's, ne pashiishe kudyenzela muntwamu.

³⁴ Ne dîbà adi tudi mwa kufucila ntempelu awu. Tuyaaya mpindyewu bwa kajandula ní tudi mwa kucyenza, ne pashiishe kwenza Cibilu cya Beena Kilisto baa Kantu-ku-byanza aci. Pashiishe, pamba maalu a dyamwamwa dya mbû kukumbanawu apu, netuteete bwa kulongolola masangisha mu Sud mwônsò amu, bwa ngondo wa kumpala, ne ngondo mwibidi, ne ngondo mwisâtu, mu bitupa bya malaba a Sud mwônsò amu. Nenku pashiishe—pashiishe netuye...bwalu, twêtù babange mpindyewu ne bakabwele mu Afrike...Nwamonu's, mu cikondo cya Noël emu, bwabo bôbô, mmatuku a ngondo anaayi a ngondo wa mwandamutekete. Nwamonu's, kudi—kudi mvula ne kuulu kubi, nenku kamwena mushindu wa kubwelamu mu cikondo aci nansha, pa nanku cikondo cilenga menemene cya dibwelamu mpaanyima. Nenku dîbà adi tudi baswe kubangila, twêtù bapete mushindu, mu Norvège, ne kupweka twenda tunyunguluka buloba bujima, ne kukwata mudimu too ne mu Afrike, bwa kajikijila muntwamu, bu Mukalenge mwa kwanyisha.

³⁵ Kadi nwatusambidilaayiku mpindyewu. Ne twêtù tudi banunange, bwa aci nudi bamanye. Pa nanku tudi batekemene byàbûngì bya biyiila ne panshi, bipite ne byônsò bitudi twêtù bafwanyine kwenza, anyi mene kwela meeji ne Mukalenge mmufwanyine kwenza aci.

³⁶ Nenku tudi twitabuuja ne, dilolo edi, nekwikale mudimu munene wa dyondopa. Ngeela meeji ne nekwikale...Nênyiishè anu kakese menemene, bwalu netwikale ne meesa a Mukalenge dilolo edi. Nenku mu tusunsa bu makumi abidi anyi makumi asatu nanku awu, pashiishe netwénzè mulongo wa babeedi, ne—ne pashiishe dyakamwe paanyima paa cyôci aci, netwikale—netwikale ne meesa a Mukalenge. Nenku tudi tunujingila difika dilenga bwa kushaalaku neetu; netwikale ne disanka. Twêtù katütu ne—ne meesa a Mukalenge a tusungulujangana to. Mbwa mwena kwitabuuja yônsò, mwena kwitabuuja yônsò.

³⁷ Nenku kumpala kwa mêmè kubala Mufundu, ndi ndikonka ní tudiku mwa kwinyika mitu yetu katanci kakese cyanaana. Nêndombè mulunda wanyi mulenga, Mwaneetu Lee Vayle, ní udiku mwa kutulombola mu mwaku wa disambila, bwa Nzambi wabeneshaku Dîyi Dyende. Mwaneetu Vayle, udi mwa kutwenzelaku cyôci aci anyi?

[Mwaneetu Lee Vayle udi mpindyewu usambila—Muf.] Amen. Enzaku nanku, Mukalenge. Enzaku nanku, Mukalenge. Enzaku nanku, Mukalenge. Eyowa's, Mukalenge. Amen.

³⁸ Mpindyewu kakuyi tuseku to, ne kaneemu kônsò tudi tuseemena ku Dîyì. Mpindyewu ndi muswe kubala, mu dinda emu, mu Ekesoode nshapita wa 12, mwikale mbangila ku mvensa wa 12, wa 12 ne wa 13, njikija nende. Nenku teleejaayi ne ntema mpindyewu. Ne pashiishe kumpala kwa meesa a Mukalenge dilolo edi, nwâbalaayi nshapita wa 12 wa—wa Ekesoode, nshapita mujima awu; bwalu mvensa wa 11 mwaba ewu cidi anu didilongolola dya ku lwendo cyanaana, ne meesa a Mukalenge kumpala kwa kwasa lwendo. Nenku tudi baswe kuseemena ku cyôci eci ne kaneemu kaa menemene mpindyewu. Mpindyewu mvensa wa 12 wa nshapita wa 12:

Bwalu nêmpicilè mu ditunga dya Ejipitu bufuku ebu, ne nêntuutè baanaabute bônsò mu ditunga dya Ejipitu, ne ku bantu ne ku bimunà; ne nêmfilè dilumbulwisha dyanyi bwa kulwisha tunzambi twônsò twa Ejipitu: mêmè ndi MUKALENGE.

Nenku mashi neikale kunudi bu cimanyinu pa nzubu unudi nusanganyiibwa awu; nenku pângâamònà mashi, nêmpicile pamutu peenu, ne cipupu aci kacyakulwa pambidi peenu bwa kunubutula to, pângâàtuutà ditunga dya Ejiipitu.

³⁹ Mukalenge asweku abeneshe Dîyì Dyende dya Cijila!

⁴⁰ Mpindyewu ndi muswe kupatula cyena-bwalu mwômò amu, mwaku mukese, umwepele cyanaana wa maleeta ataanu ne: *Cimanyinu. Cimanyinu.* Ndi muswe kwakula pa mwaku awu, anyi kulongesha dileesona edi dya kalaasa kaa Dyalumingu, pa mwaku ewu wa *cimanyinu*. Bible mmwambe mwaba ewu ne: “Nenku mashi neikale cimanyinu kunudi.” Nenku tudi baswe kukwata mudimu ne mwaku ewu *cimanyinu*.

⁴¹ Mpindyewu katwena bamanye to, pândì ntangila ntanku, ne paakumbana dibà, ee, eyi ki... Ndi ne Mifundu yâbûngì, yâbûngì menemene mifunda kaaba aka. Pa nanku kabiyi... Nenku mwikale mumanye ne ncyakwikala neenu to bwa cikondo kampanda. Kadi mmunyi mutwamanya ne ewu kî mmusangu wa ndekeelu wikala bamwe baa kutudi mwa kudisangisha? Pa nanku tuditacishaayi bwa kuseemenaKu anu ne kaneemu kônsò. Ndi mumanye ne mbikole. Mukalenge mmutupeku dinda dilenga mpindyewu, kabidi—kabidi, bwa mudimu, dilenga dya dikema. Nenku tuteetaayi bwa kubumbakajila meeji etu mpindyewu pa kantu ne kantu katudi—katudi twamba, bwa ne... piikalamu cintu kana cyônsò cidi Mukalenge mufwanyine kuswa bwa nwénù kumanya, bwa cyafidiibwa kunudi.

⁴² Ne twêtù katwena twimana kaaba aka anu bwa kutumonabo to. Kacya katütukù tulwa mwaba ewu anu bwa bakwabo

kumonabo ne mbilàmbà kaayi bitudi bavwale to, anyi, tudi—tudi tulwa kaaba aka mbwa bwalu bumwepele, mwasambidibo kudi mwaneetu wa balume amu ne: “Tudi kaaba aka mbwa kuteeleja Dìyì, Dìyì dilwalwà kutudi adi.” Citudi baswe n’Cyôci aci, bwalu ki cintu cimwepele cììkalàku ne mushinga kutudi, ne cintu kampanda cììkalàku cya mushinga wa menemene, cintu kampanda cììkalàku—cììkalàku mwa kutukwacisha.

⁴³ Ne twêtù tudi cisamba cìdì munkaci mwa kupùnga ne lufu. Bantu bônsò bayaaya batangile ku Cyendeleele. Nenku tudi bapeebwe ndambu wa cikondo ewu mbwa kwangata mapangadika etu pa ne netuye batangile luseke kaayi. Ne njila mwine udi kumpala kwetu; tudi mwa kwangata anyi elu luseke anyi lwalwa lwônsò lutudi baswe kusungula alu. Ki mushindu wakateekaYe Adama ne Eva ngwôwò awu, ne wôwò mushindu awu ngudiYe ututeeka twêtù.

⁴⁴ Tudi ne cya kuvuluka ne, citudi twenza nansha ciikàle cinganyi, anyi nansha twêtù mwa kutuuta dyakalenga dya bishi, mu nsòmbelu emu, katuyi ne Kilisto to tudi bajimije bintu byônsò nkòòng. Pa nanku piikalaye, paanyima paa... Piikalabi ne Yéyè ki cyônsò cìdìku cìdì cikengela kwindila, nanku’s tudi bafwanyine kwikala bantu baa batambe kukutakana bu twêtù mwa kubenga kuCiitaba, kwikala, ne—ne kuCinanga mu ndondo. Kabiyi anu kuCiitaba cyanaana to, kadi udi ufika ku cintu kampanda cinene citambe aci. Paayima paa wêwè mumane kuCipeta, kuCyángacì kadi kuCiteeka pa citàmbà to. Bidi bikengela kukwata naaCi mudimu.

⁴⁵ Mbyenze bu mudi kuya kudi ngangabuka bwa kapeta bwanga bwa dinwa, kadi kulwa kubuteeka pa citàmbà. Wêwè myye kakeba bwanga bwa kunwa, nwaku bwanga abu. Piikalaku disaamà dikutacisha, ne bwanga ebu paabu ne cya kukukwacisha, nwaku bwôbò budiye ukupeesha abu; kabidi anu mushindu udiye wamba bwa kubufila awu, bwalu misangu mikwabo anu ndambu wa tusunsa cyanaana tudi tufila dishiilangana dyàbûngì mu mushindu wûdì ubufila awu. Ne netumanye munyi ne...

⁴⁶ Kadi mu ebu bwalu, leelu ewu, anu katanci kakese cyanaana kaa dipangandika dyebe nkafwanyine kulongolola bwalu bwa kwebe kùyaayà kwa Cyendeleele. Wêwè ùCyángatè anu mushindu udiYe ukupeeshaCi awu.

Cimanyinu: “Mashi neikale kunudi bu cimanyinu.”

⁴⁷ Mpindyewu, dyambedi, cimanyinu ncinyi? Mmwaku utubo bangata pa ciibidilu munkaci mwetu twêtù baakudi ba Anglais, nangananga muneemu mu Amerike. Cimanyinu cidi... Cya bushuwa, nkonkamyaku udi wamba ne cimanyinu ncimanyishilu, ncimanyishilu cya mushinga wa lwendu, mushinga mufuta, nwamonu’s; bwa ne—ne mushinga wa lwendu

awu, anyi mushinga wa difuta awu, mushinga udi mulombiibwe awu ùkaadi mufuciibwe.

⁴⁸ Bu mudi mushinga wa lwendo mu njila wa kawulu anyi wa nuya ku bis. Ubwelamu ne ufuta mushinga webe—webe wa lwendo, ne pashiishe bakupeesha cimanyinu, ne cimanyinu aci kwêna mwa kukwataku naaci mudimu bwa cintu cikwabo nansha cimwe to anu mu njila wa kawulu awu. Nenku ncimanyinu, bwa kumpanyi wa njila wa njanja awu ne, wêwè udi mufute mushinga webe wa lwendo. Neimanyinu, ne kwêna mwa kukwataku naaci mudimu bwa cintu cikwabo nansha cimwe to. Kacyena cikumbanaku bwa njila mukwabo nansha umwe to. Cidi cikumbana anu bwa yêyè njila awu nkaayende. Nenku cidi—cidi ncimanyinu.

⁴⁹ Mpindyewu bwa apa, citudi twamba eci, mwaba utudi tubangila ewu, Nzambi ngudi wambila Izaleela ne: “Mashi a mwânà wa mukooko adi ncimanyinu kunudi.” Mwânà wa mukooko wa Izaleela, mushipa awu, ki cimanyinu civwa Yehowah mulombe. Civwa ne cya kwikalala mashi. Nzambi nguvwa mwenze cimanyinu ne mucipeeshe Izaleela. Nenku cimanyinu cikwabo nansha cimwe kacyakukumbanaku to, nwamonu's, kacyena mwa kwitabiibwaku to.

⁵⁰ Bwa baa pa buloba, Cidi ndikutakana pa dikutakana. Kadi, bwa Nzambi, Cidi nnjila umwepele. Cintu cimwepele cidiYe ulomba n'Cimanyinu aci. Cidi ne cya kwikalaku. Ne wêwè kwêna mwa kupeta Cimanyinu padi mushinga wa lwendo kawuyi mufuta to, dîbâ adi udi ne Cimanyinu aci mu cyanza cîdì cikupeesha dyèsè dya—dya mpicishe-mpite. “Nêmmonè Mashi, Nêmpicilè pamutu peenu.” Ncikondo kaayi's we, cya ne, ndyêssè kaayi's we, dya kumanya ne udi mwambule, munda mwebe amu, Mpicashe-mpite awu. “Pângààmònà Mashi, Nêmpicilè pamutu peenu.” Ki cintu cimwepele ciikalaYe mwa kwitaba. Kí ncîngà cintu ciìkalà mwa kwangata kaaba kaaCi to; kaciyi cipinganyi to, kaciyi dingumba to, kaciyi cintu cikwabo nansha cimwe to. Bikengela anu Cyôcì aci. Nzambi mmwambe ne: “Anu Aci nkaayaaci ki cîNgààmònà.”

⁵¹ Nansha byôbì ne bavwa baakane bishi, bavwa bîmpè baa bishi, nansha balonge tulaasa twa bishi, nansha bavwale bilàmbà bya bishi, cimanyinu aci ncivwa cintu cimwepele. “Pângààmònà cimanyinu aci, Nêmpicilè pamutu peenu.” Mashi ngavwa cimanyinu cya ne—ne dilomba dya Yehowah divwa dikumbajiibwe, bwa ne divwa dyenjiibwe. Mashi avwaku bu cimanyinu. Mashi ngavwa cimanyinu aci. Nwamonu anyi? Mwoyi ùvvwà . . .

⁵² Nzambi uvwa mwambe ne: “Dituku diwakudya, dituku adi ndiwafwa.” Kadi kuvwa mwoyi wa mupinganyi ùvvwà mwangaciibwe pa kaaba kaa mwoyi wa mwena kwitabuuja. Nzambi, mu luse, wakiitaba mupinganyi wa mwoyi wa

muntu mukooyike awu. Paakadikooyisha mwan'Ende awu ne mpekaatu, wa kubenga kwitabuuja Dîyì, dîbà adi Nzambi, mubanji mu luse, wakenza mupinganyi; nenku, mbwena kwamba ne, bivwa bikengela bwa cintu kampanda cifwe pa kaaba kende. Cintu cikwabo nansha cimwe kacivwaku mwa kukumbana to.

⁵³ Ki bwa cinyi bimuma bya pommes ne bya pêches bya Kaayina, ne bikwabo abi, kabyakakumbana to. Byakakengela mwoyi kampanda uvwa ne mashi munda mwawu, ne mwoyi wakapatuka mu mulambu awu, nenku mpindyewu mashi avwa ncimanyinu cya ne dîyì dituma dya Nzambi divwa dyenjiibwe. Mpindyewu, civwa Nzambi mulombe ncinyi? Mwoyi; ne mashi avwa alejea ne kuvwa ne cya kwikala mwoyi kampanda mupatuke. Pa nanku mashi avwa ncimanyinu cya ne mwoyi wakafidiibwa, cya ne cintu kampanda civwa cifwe, dilomba dya Nzambi; cya ne mwoyi kampanda uvwa mufidiibwe, ne mashi avwa meediibwe pansi. Nenku mashi avwa bu ncimanyinu, cya ne mwoyi uvwa mupatuke. Mwoyi wà nyama ùvvà Nzambi mwambe ne bikengele wàngaciibwè awu, mashi awu ngàvvà bu ncimanyinu. Nwamonu anyi?

⁵⁴ Mukuukwidi mwena—mwena—mwena kwitabuuja awu uvwa uwfanyikijiibwa ne mulambu wende, ku ncimanyinu aci. Ncyéna njinga bwa kushala ntanta mupitepite bule pa mèyì makese a diteela aa to, kadi, bwalu mbya wêwè mufwanyine kwangata disangisha dyônsò nkòòng pa dimwe dya ku wôwò awu, kadi ndi muswe kwanji kwimana katanci mwaba ewu bwa kwamba cyôcì aci. Bivwa bikengela bwa mwena—mwena—mwena kwitabuuja awu kufwanyikijiibwaye ne mulambu wende. Nwamonu anyi? Byôbì ne civwa anu mulambu cyanaana ne—ne mwikàle mwenzela mwaba kampanda pambelu pààpa, yéyè's ukaavwa muwufile; kadi bivwa bikengela bwa yéyè kwikala mufwanyikijiibwemu. Bwa kwamba menemene, bivwa bikengela bwa kwanjiye kutentekapu byanza byende, dyambedi, bwa kudifwanyikijke ne mulambu wende. Nenku pashiishe mashi avwa alaabibwa mwaba uvwaye mwa kwimana mwinshi mwa mashi. Mashi avwa ne cya kwikala kumutu kwende. Nenku aci civwa ncimanyinu cya ne yéyè uvwa mudifwanyikije ne, mmupiile, ne mufile cijaadiki cya ne mupinganyi kampanda uvwa kawuyi mwenze bwalu uvwa mwangate kaaba kende.

⁵⁵ Ncimfwanyi kaayi cilenga's we! Kaa, mupikudiibwe's we! Nwamonu's, cilumbu cikaavwa cikoshiibwe ne bwakane, ne dilomba dya bwakane bwa cijila bwa Nzambi dikaavwa dikumbajiibwe. Nenku Nzambi kwambaYe ne: "Mpindyewu Nêndombè mwoyi webe," ne piine apu, mpavwa mwo—mwo—mwoyi mwenze mpekaatu. Pashiishe mupinganyi ùvvà kawuyi mwenze bwalu kwangatawu kaaba kende. Nenku civwa nnyama wa mwikàle ne mashi; kí ncimuma cya pomme, anyi cya pêche to. Kakuyi mpatà to aci's bivwa bikengela kuvwijaci bwalu

bwa dimiinu dya nyoka butooke tòò kudi muntu ne muntu's, bwa ne civwa mmashi. Nenku miine mashi aa, àvvà kaàyi mwa kufumina ku cimuma kampanda awu, akafumina mu mupinganyi ùvvà kawuyi mwenze bwalu to. Nenku mwoyi uvwa mupatuke, wôwò paawu—wôwò paawu, pa kaaba kende, ne mashi avwa cimfwanyi cya ne nyama uvwa mufwe ne mashi avwa mapatuke.

⁵⁶ Ne mukuukwidi mu kulaaba kwa mashi kumutu kwende aku, uvwa uleeja ne uvwa mufwanyikijiibwe mu bupikudi, bwalu mmudifwanyikije ne...ku mulambu awu, mudiswikakaje yéyè mwine ne mulambu awu, ne mashi avwa bu cimanyinu.

⁵⁷ Bilenga kaayi—kaayi's we! Ncimfwanyi kaayi's we! Cyôci's ncifwanyikijilu cipwangane cya Kilisto, cya menemene, mwena kwitabuua leelu ewu mwimane mwinshi mwa Mashi meela pansi, mudifwanyikije ne Mulambu awu. Cipwangane anu menemene ne—ne mwaci mwônsò, cya muvwa Kilisto, kayi—kayi nyama to... Nudi numona's, nya—nyama kampanda uvwa mufwe, kadi ùvvwa...

⁵⁸ Cintu cidi citambe kwikala kaciyi cyenze bwalu citudi twêtù naaci, ngeela meeji, ncifwanyine kwikala, nya—nyama, mwânà wa—wa mukooko. Pààkajingà Nzambi kufwanyikija Yesu Kilisto, WàkaMufwànyikija ne Mwânà wa mukooko. Ne paswileYe kudifwanyikija Yéyè mwine, WàkaDìfwànyikija ne nyuuni, Nkuci. Ne nkuci nnyuunyi wa mutambe kwikala kayi mwenze bwalu ne mutambe kwikala wa mankenda ku mwoyi wa bukwanyuuni bwônsò, ne mwânà wa—wa mukooko ki udi mutambe kwikala wa kayi mwenze bwalu ne mutambe kukezuka ku mwoyi wa bukwanyama bwônsò. Pa nanku nudi numona ne pavwa...

⁵⁹ Yesu wakabatiijiibwa kudi Yone, ne Bible mmwambe ne: “Ne—ne yéyè kumona Nyuma wa Nzambi, mufwanangane ne nyuuni wa nkuci, upweka pambidi Pende.” Ki bwa cinyi bu ne bivwa... Bu ciikàle mbwa wa diitu, anyi bu ciikàle nyama mukwabo kana yônsò ewu, ngiikadilu wa—wa nkuci kavwaku mufwanyine kubwelakana kushaala cintu cimwe ne ngiikadilu wa mbwa wa diitu to, nansha ngiikadilu wa—wa nyuuni wa nkuci kavwaku mwa kubwelakana kushaala cintu cimwe ne wa nyama mukwabo kana yônsò ewu to pa kuumusha wa mwânà wa mukooko. Nenku ngiikadilu yibidi ayi yakasangila, dîbà adi yivwa mwa kupetangana ewu ne ewu.

⁶⁰ Mpindyewu nudi numona didyanjila-kulongolola anyi? Civwa mmwânà wa mukooko paakalwaye mwaba awu. Nwamonu anyi? Nwamonu anyi? Kûdì... Civwa mmwânà wa mukooko paakalwabo—paakalwabo nende. Civwa mmwânà wa mukooko. Yéyè wakalediibwa mwânà wa mukooko. Yéyè wakakoleshiibwa, mwânà wa mukooko. Nwamonu ayi?

⁶¹ Nenku, ki bwa cinyi, ki mushindu umwepele wa Nyuma mulelela udi mwa kwakidila Dîyì, udi mwa kwakidila Kilisto. Bakwabo bônsò nebateete, baakateeta bwa kuMupeta, ne kuteeka Nyuma wa Nzambi pambidi paa mbwa wa diit, nwamonus, wa ciji, mubi, wa lwonji. Kaakushala pôpù to. Nyuma Mwîmpè udi anu ubuuka umba uya. Yéyè kaakushaalaku to.

⁶² Anji ambaayibi tûng bu ne Nkuci awu mmunuuluke, kadi, pamutu paa Yéyè kwikala Mwânà wa mukooko, kuvwa kwikâle nyama kampanda wa cyanaana? Nunku's mMunuute milela mwälukile's. Nwamonus anyi? Kadi paakasanganaYe ngiikadilu awu uvwaYe mwa kubwelakana kushala cintu cimwe nende, s'Cyakashaala anu Umwe.

⁶³ Ne dîbà adi—adi—adi Nkuci wakalombola Mwânà wa mukooko, nenku, monaayi, Wâkalombola Mwânà wa mukooko too ne ku cishipeelu. Mpindyewu, Mwânà wa mukooko wakatumikila Nkuci awu. Nwamonus anyi? Kwônsò kuvwaYe uMulombola aku, nkuvwaYe muswe kuya.

⁶⁴ Ndi ndikonka, leelu ewu, padi Nzambi utulombola ku—ku nsòmbelu wa badilambule mu kaabujima ne wa diMukwacila mudimu, ndi ndikonka nyuma yetu dîbà adi ní kayituku yitomboka mîngâ misangu, yileejaku ndambu ne, ndi anu ndikonka ní tudi bânà baa mikooko's? Nwamonus anyi? Nwamonus anyi? Mwânà wa mukooko utu ne butumike.

⁶⁵ Mwânà wa mukooko utu mudifidi bu mulambu. Katu—katu yéyè—katu yéyè wangata, unana bidi bu byende to. Udi mwa kumulaadika pansi kadi kukosa myôsà ya pambidi pende ayi. Ki cintu cimwepele cidiye pende naaci ncyôci aci. Kacya kêna—kêna yéyè wambaku cintu nansha cimwe pa bwalu abu to; ùdi yéyè anu ulekelela byônsò bidiye naabi. Ki mwânà wa mukooko nyéyè awu. Ùdi ufila byônsò kudi wende...ùpèshangana byônsò cyanaana, udifila yéyè mwine ne cyônsò cidiye.

⁶⁶ Nenku mushindu awu ki udi mwena Kilisto mulelela, padiye...ùdîfila bu mulambu yéyè mwine, kayi ucyuka kantu nansha kamwe bwa buloba ebu to, kadi mwikâle ufila byônsò bidiye naabi kudi Nzambi. Nwamonus anyi?

⁶⁷ Nenku mpindyewu ewu nguvwa m'Mwânà wa mukooko mupwangane, Kilisto awu. Ne pashiishe ku mashi meela pansi a mwânà wa mukooko ewu, mwânà wa mukooko wa mu mubidi wa mu Ejipitu awu, mashi akalaabiibwa, ne, paakalaabiibwawu apu, avwa bu cimanyinu, dîbà adi Mashî a ewu Mwânà wa mukooko avwa mafwanyine kwikala bu cinyi? Nwamonus anyi? Cimanyinu cya ne twêtù tudi bafwe ku twêtù biine ne badifwanyikije ne Mulambu wetu. Nwamonus anyi? Dîbà adi, Mwânà wa mukooko ne—ne ôwò—ôwò Mashî awu ne muntu mwine bidi bilwa bidifwanyikije pamwe, Mulambu ne mwena kwitabuuja. Wamonu's, wêwè udi mumanyishiibwe mu

nsòmbelu webe, kudi Mulambu webe awu. Aci ncidi cikuvwija cyûdì aci.

⁶⁸ Dibà adi mashi avwa cimanyinu, anyi didifwanyikija. Mashi avwa amanyisha ne mukuukwidi uvwa mushipe mwânà wa mukooko, ne mwitabe mwânà wa mukooko awu, ne mudilaabe yéyè mwine cimanyinu, cya ne kavwa ne bundu to. Kavwa ucyuka bwa muntu uvwa ucimona to. Ûvwa muswe bwa muntu yônsò kucimonaye, ne civwa citeekiibwe mu mushindu wa ne muntu ne muntu yônsò uvwa upita awu uvwa mwa kumona cimanyinu aci.

⁶⁹ Nwamonu's, bantu bààbûngì batu baswe kwikalala beena Kilisto, kadi batu—batu—batu baswe kucyenza mu musokoko bwa muntu nansha umwe kayi mufwanyine—kayi mufwanyine kumanya ne mbeena Kilisto to. Anyi, beena—beena dyabo batubo bayo naabo mu lunyaanya abu, bamwe baa kudibo mbafwanyine kwela meeji ne: “Ee, mpindyewu, mona, mêmè—mêmè—mêmè's ndi muswe kwikalala mwena Kilisto, kadi ncitu muswe bwa *Kampanda* acimanye to.” Nwamonu anyi? Ee, mpindyewu, nudi numona's, aci kî mbwena Kilisto to.

⁷⁰ Bidi bikengela bwa bwena Kilisto kuleejabu Cimanyinu cyabu patooke, nwamonu's, bantu bitwilangane, mu nsòmbelu wa bantu bitwilangane, ku bîrô, mu mùsèèsù, padiku ndululu, cintu kana cyônsò, mu ekeleesiya, myaba mikwabo yônsò. Mashi ki Cimanyinu, ne Cimanyinu cidi ne cya kuteekiibwa, nwamonu's, bwa cyanaana (kacyena) nansha cipungidi ciine kacyena ne bwenzeji to.

⁷¹ Mashi ngavwa cimanyinu, anyi dimanyishiibwa kampanda, ciikàle cimanyisha ne muntu ewu wapikudiibu. Mpindyewu, ee, monaayi, bôbô bavwa ne, bavwa bapikudiibwe kumpala kwa nî ncinyi nî ncinyi kwenzekaci. Ku diitabuuja nkawakalaabobo mashi awu. Nwamonu's, kumpala kwa cyôcì aci kwenzekaci mu bulelela, mashi akaavwa malaabiibwe ku diitabuuja, biikàle biitabuuja ne necyenzeke. Nwamonu anyi? Kumpala kwa ciiji cikole cya Nzambi aci kupicilaci mu ditunga amu, bivwa bikengela bwa mashi kulaabiibwawu, dyambedi. Dibà divwa dimané kupita pàvwà ciiji cikole cimanè kudituuta.

⁷² Mpindyewu tudi ne dileesonwa mwaba awu ditudi pàmwâpa, bafwanyine bulelela kunutwadila mu meeji, bwa katanci cyanaana. Tangilaayi, *kumpala* kwa kwenzekaci, bwalu nekulwe cikondo ciwikala kuyiku mwa kulaaba Mashi to.

⁷³ Mwânà wa mukooko awu wakashipiibwa ku dîbà dya dilolo, paanyima paa mulamiibwe munda mwa matuku dikumi ne anaayi. Ne pashiishe mwânà wa mukooko awu wakashipiibwa ne mashi akalaabiibwa ku dîbà dya dilolo. Nudi nucyumvwa anyi? Cimanyinu kacyakulwaku ku diikalaku to anu too ne paakalwa dîbà dya dilolo.

⁷⁴ Nenku edi ndibà dya dilolo dya cikondo citudi ne mwoyi eci. Edi ndibà dya dilolo bwa—bwa Ekeleesiya. Edi ndibà dya dilolo bwanyi mêmè. Edi ndibà dya dilolo dya Mukenji wanyi. Nkaadi mfwa. Nkaadi nya. Nkaadi ngenda mpatuka, pa dibà dya dilolo dya Evanjeeliyo. Nenku tudi balwe bapicile mu dibingishiibwa, ne bikwabo, kadi edi ndibà didi dikengela bwa Cimanyinu kuteekiibwaci. Mvwa munwambile mu dyalumingu dishaale ne mvwa ne cintu kampanda cimvwà muswe kunwambila; s'ki cyôci eci. Dibà dinudi anu kanuyiku—kanuyiku mwa kunaya naaCi to. Bikengela anu cyenjiibwe. Piikalaciku ne cya kwenjiibwaci, bikengela kwenjiibwa mpindyewu. Bwalu, tudi mwa kumona ne ciiji cikole cikaadi pabwîpi ne kupicila mu ditunga, ne cyônsò cidi kaciyi mwinshi mwa Cimanyinu aci necibutuke. Mashi, Òwò ngadi akumanyishisha. Monaayi.

⁷⁵ Bwalu, mwoyi wa nyama kawuvwa mwa kwalukila pa muntu to. Pavwa mashi ediibwa panshi, mwoyi uvwa upatuka, mu bushuwa bwa bwalu, bwalu bivwa byenza cintu cimwe. Nenku pakaavwa mashi a mwoyi mapatukemu, bu muvwabi ne mwoyi uvwa mushiilangane ne mashi... Mpindyewu, mashi adi mmwengungù wa mwoyi, kadi mwoyi ncintu kampanda cya cishiihangane ne mashi, kadi mwoyi udi usanganyiibwa *munda* mwa mashi. Nenku mwoyi wa nyama kawuvwa mwa kwalukila pa mukuukwidi to. Pavwaye wela mashi a mwâna wa mukooko ewu panshi, bivwa bikengela kulaabaye mwengungù awu, bwalu mwo—mwoyi ukaavwa muye ne kawuvwa mwa kwalukila to.

⁷⁶ Bwalu, kawuvwa mwa kulwa pa muntu to, bwalu mwoyi wa nyama kawutu ne musuuka to. Nyama katu mumanye ne udi butaka to, ne udi—udi anu... Katu mumanye mpekaatu to. Kí mmumanye nansha mukese to, ki bwa cinyi ncintu cidi ne mwoyi kadi kí mmusuuka udi ne mwoyi to. Ki bwa cinyi, mwoyi wa nyama awu kawuvwa mwa kwalukila pa mwoyi wa muntu to, bwalu kawuvwa ne musuuka munda mwa mwoyi awu to. Mpindyewu, kudi mwoyi kampanda, mashi kampanda; mwoyi kampanda, ne musuuka kampanda munda mwa mwoyi awu; musuuka udi nngiakadilu wa mwoyi. Ki bwa cinyi, kavwa ne ngiakadilu wa musunguluke to, yéyè uvwa nyama, ki bwa cinyi mashi awa bu cimanyinu cya ne mwoyi uvwa mufidiibwe.

⁷⁷ Kadi mu mwaba wa butumbi ewu, mwinshi mwa cipungidi eci, kudi dishiilangana pankaci paa Mashi ne Mwoyi. Cimanyinu bwa mwena kwitabuuja leelu ewu n'Nyuma Mwîmpè; kaciyi mashi kampanda, mwengungù kampanda to, kadi Cidi n'Nyuma Mwîmpè wa Nzambi. Ki Cimanyinu cidi Nzambi ulomba Ekeleesiya leelu ewu. Nzambi udi ne cya kumona Cimanyinu eci. Udi ne cya kuCimona mu umwe ne umwe wa kutudi.

⁷⁸ Ki bwa cinyi, pakaadi mindidimbi ya dilolo yimweneka apa, ne ciiji cikole pabwîpi ne kupongolodiibwa cyumukila mu Dyulu, pa matunga adi kaayi aneemeka Nzambi aa, ne pa beena

bupidya badi kabayi baneemeka Nzambi aba, pa balaki baa—baa mukana badi kabayi ne cidibo naaci aba, pa bintu ebi! Nenku mêmè—mêmè ndi muteeteteete bwa kudivungulula mêmè mwine ne kwikalala ne nsòmbelu anu munkaci mwaci mwine, bwa kumona ne mmwaba kaayi uvwaci ciimanyine, kumpala kwa mêmè kwamba miine maalu aa. Mpindyewu tudi ne mwoyi mu mindidimbi, ne ciji cikole cikaadi pabwipi ne kudikuma, ne Nzambi udi munkaci mwa kulomba Cimanyinu cya ne wêwê mwine ukaadi mupete Cimanyinu Cyende, Nyuma Mwimpè awu. Ki mushindu umwepele, ne cimanyishilu cimwepele ciikalaku Nzambi mwa kupita, bwalu Cidi m'Mwoyi mwinenkà wa Yesu Kilisto mwalukile munda mwa mwena kwitabuuja.

⁷⁹ Mwoyi wa nyama kawuvwa mwa kwalukila to, ki bwa cinyi bivwa bikengela bwa mashi kampanda kuteekiibwawu pa ciibi, pa mukamba ne pa dikunji dya ciibi; mu mushindu wa ne mupici wa njila yônsò, bantu bônsò bitwilangane, muntu ne muntu uvwa upicila lwà ku nzubu aku awu, uvwa umanya ne kuvva cimanyinu pa—pa ciibi aci, cya mashî, cya ne mwoyi kampanda uvwa mufwe ku ciibi aci. Amen!

⁸⁰ Ki mushindu awu udibi bikengela kwikalabi bwa mwena kwitabuuja yônsò leelu wa Ndaaya ewu, muujiibwe tente ne Nyuma Mwimpè; Cimanyinu cya ne Mashi meela panshi a Mwâna wa mukooko, cya ne Mwoyi ùvvâ munda mwa Mwâna wa mukooko awu, mmwalukile ne mutwibwe citampi munda amu bantu bitwilangane, bwa muntu ne muntu udi upicilapu awu, mwikâle uyiikila neebe, udiku muswikakane neebe awu, amone ne Mashi mmalaabiibwe, ne Cimanyinu cya Mwoyi ùvvâ munda mwa Mashi awu aci cidi pambidi peebe. Udi mukubiibwe ku ciji cikole aci. Anu Aci nkaayaaci; kî mbuumambala to. To, mukalenge!

⁸¹ Mwoyi wa nyama kawuvwa mwa kulwa pa mwena kwitabuuja to, bwalu ciwwa nnyama, ne wôwô uvwa wakula wamba anu bwa kondo kaa mwoyi cyanaana, mwikâle ûleeja ne kuvva kulwa Mulambu mupwangane.

⁸² Nenku, mpindyewu, mmunyi mudiku kufwanyine kwikalala Mulambu mutambe kupwangana kupita wa Nzambi Yéyè mwine ushaala Difuta dya cibawu, Yéyè mwine? Pààkavwiijiibwà Nzambi mubidi, mu Mashi Ende Yéyè mwine a bufuki awu, ki... mushindu umwepele uvwaku Mwoyi wa Nzambi mwa kwalukila.

⁸³ Bwalu, twêtù bônsò tudi balediibwe ku disangila dya mulume ne mukaji, nenku ki bwa cinyi mwoyi udi mwômô amu ngwa pa buloba, ne mwine mwoyi awu kawakukumbanaku to. Ncintu cïkaadi cimana kulumbulwisha ne cimana kupiisha. Kwêna ne mushindu wa kuwela biteetela to. Kakwena mushindu wa kuwela biteetela to. Kakwena mushindu wa—wa kuwakaja to. Kakwena mushindu wa kuwulengeja to. Budiwu naabu mbwa

kufwa! Ki dilomba dimwepele dìdiku ndyôdì adi. Budiu naabu mbwa kufwa.

⁸⁴ Nenku Mupinganyi awu, Mwoyi wa Yesu Kilisto, bidi bikengela ubwele munda mwebe, udi mwikàle Nyuma Mwîmpè, Cimanyinu cya Nzambi aci; cya ne wêwè udi mwitabe Mashi a Mwan'Ende, Yesu Kilisto.

⁸⁵ Ki bwa cinyi, mu matuku a Wesley anyi... Matuku a Luther, baakacyelela meeji ne, "nkwitabuuya." Mu matuku a Wesley, "mwengùngù wa Mashi." Kadi edi ndituku dya ndekeelu, dìdidi Cimanyinu cilombiibwe. Aci cidi cyenza, pamwe, cintu mu kaabujima bwa Dyambwibwa. Nudi nucyumvwa anyi?

⁸⁶ Mâyì, mashi, ne nyuma mbidi bilwa padi maamù ulela mwânà. Cintu cya kumpala cìdì cìbwayikà, mu dilela dyetu dya ciibidilu edi, mmâyì, cintu ciibidì mmashi, ne cintu cìdì cilondà mmwoyi.

⁸⁷ Mu mubidi wa Mukalenge wetu Yesu Kilisto mwakapatuka: mâyì, Mashi, ne Mwoyi. Nenku Ekeleeziya mu kaabujima, Mukaji-musela, pamwe, mmwenjiibwe ku dipicila ku dibingishiibwa, dijidiibwa, ne dibatiiza dya Nyuma Mwîmpè, udi mwikàle Cimanyinu.

⁸⁸ Bu mudi Ebelu 11 wamba ne: "Bônsò aba bààkalalakanà bavwale biseba bya mikooko ne biseba bya mbuji, ne bashiya byanza bitupu, ne bintu byônsò bidibo benze ebi, kadi kabayi bavwiijiibwe bapwangane twêtù katuyiku to."

⁸⁹ Ne Ekeleeziya mu dituku edi, udi mupete Cimanyinu awu, cya dibatiiza dya Nyuma Mwîmpè, cya ne Mashi mmeediibwe pansi ne Nyuma Mwîmpè udi pa Ekeleeziya; twêtù katuyiku to, dîbà adi, kabeena mwa kubiika ku lufu to. Kadi bwalu bwabo mbulaale kutudi twêtù, bwalu Nzambi mmulaye ne NeaMupete, nenku muntu kampanda neikaleku. Ncvêna mumanye ne nganyi wîkalakù to, kadi muntu kampanda neaMupete. Cintu cimwepele cíndiku mêmè mwambwile bujitu, ncyâ kuCiyyisha. Mbwalu bwa Nzambi bwa kuya kwenda kukebangana ne dimiinu didyanjila kulongolola adi. Nedikaleku, nansha nanku. Bwalu, bôbò abu nebiikaleku, umwe ne umwe wa kudibo, muntu ne mukwende; cikondo cya mâyì, cikondo cya Mashi, ne mpindiyewu cikondo cya Cimanyinu cya Nyuma Mwimpè.

⁹⁰ Nenku, nwavulukaayi ne, Izaleela wakapicila mu bintu byàbûngì, kadi mpa dîbà dya dilolo pààkalòmbiibwà cimanyinu; kí mmu dinda to, kí mmu didilongolola, munda mwa matuku dikumi ne anaayi muvwabo balame mwânà wa mukooko amu to. Izaleela uvwa mumanye ne cintu kampanda civwa munkaci mwa kulwa.

⁹¹ Nansha Luther kabidi uvwa mucimanye, nansha Wesley kabidi uvwa mucimanye, nansha Finney kabidi, Knox, Calvin, bavwa bacimanye. Eci ki Cyôci! Bavwa bamanye ne kuvwa mwa kulwa cikondo civwa Dikunji dya Kapya ne cya kwalukila

kudi Ekeleesiya. Bavwa bamanye ne kuvwa mwa kulwa cikondo civwa bintu ebi mwa kwenzeka, kadi kabaakashaala ne mwoyi too ne kudibimona to, kadi bavwa babindile.

⁹² Izaleela uvwa mumanye ne cintu kampanda civwa munkaci mwa kulwa, kadi muvwa mpa dîbâ dya dilolo pààkalaabiibwâ mashi a mwânà wa mukooko awu, cimanyinu aci, ku ciibi. Kadi, mwânà wa mukooko ukaavwa mumana kulama.

⁹³ Civwa m'Mwânà wa mukooko kubangila anu ku ntwadijilu too ne ku ndekeelu. Civwa m'Mwânà wa mukooko mu cikondo cya Luther, civwa m'Mwânà wa mukooko—Mwânà wa mukooko mu cikondo cya Wesley, kadi mpindyewu ncikondo cya Cimanyinu cidi nzubu ne nzubu yônsò ne cya kwikalala mubwikila kudi Cimanyinu. Nzubu ne nzubu yônsò wa Nzambi udi ne cya kwikalala mubwikila kudi Cimanyinu. Ewu yônsò udi munda amu udi ne cya kwikalala mubwikila kudi Cimanyinu. Ne Nzubu wa Nzambi m'Mubidi wa Yesu Kilisto, ne ku Nyuma umwe nkutudi twêtù bônsò babatijiibwe mu Cimanyinu eci ne balwe citupa cyaCi, ne, Nzambi mwambe ne: “Pângààmònà Cimanyinu eci cileejibwe patooke, Nêmpicilè pamutu peenu.” Ndibâ kaayi ditudi ne mwoyi mpindyewu edi's we! Kaa!

⁹⁴ Mashi kampanda ngavwa amanyisha, amanyisha mwena kwitabuuja awu, bwalu mwoyi uvwa mupatuke, kawuyi mwa kwalukila to, pa nanku bivwa bikengela kwikalaye ne—ne mwengungù kampanda. Bivwa bikengela kwikalaye ne cintu cyenze bu mukubu, mashi kampanda, mwengungù kampanda uvwà ùleejà ne mashi avwa mapatukemu.

⁹⁵ Mpindyewu Nyuma Yéyè mwine mwena diìnà awu ki Cimanyinu. Nyuma Mwîmpè Yéyè mwine ki Cimanyinu, kî m'Mashi to. Mashi akeediibwa panshi ku Kalvariyo, aci ncyâ bushuwa. Kadi Mashi awu, bwa cidiwu wôwò, s'akaalukila ku bintu bya kwakafumawu abi, ku byakudya bivwa Ye udya bwa kwikalala ne mwoyi abi. Kadi, nudi numona's, munda mwa kabulu kaa Mashiaku muvwa musanganyiibwa Mwoyi mwine wàkenzà bwa ne kabulu kaa Mashiaku kabange kunyunga awu. Piikalabi ne bivwa... Mwengungù awu kî nguvwa ne Mwoyi munda mwawu amu to, wôwò mwine, nenku ki bwa cinyi kakavwa mwa kunyunga to. Kadi pààkabwelà Mwoyi munda mwa mwengungù wa mashi awu, Wôwò awu ngwakenza kabulu kaa mashi. Wôwò awu wakenza Wôwò mwine KaaWu kabulu kaa mashi, pashiishe ku kabulu ne ku kabulu kaa mashi, pashiishe kulwaku Muntu. Ne Muntu awu uvwa Nzambi, Emanuwele, mu mubidi. Kadi pààkaalukilà Mwoyi awu, mwengungù wakayaku, kadi Cimanyinu n'Nyuma Mwîmpè pa Ekeleesiya, mu mushindu wa ne badi bamona Kilisto.

⁹⁶ Bikengela nanku, bwalu mukaji ne bayende badi balwa umwe. Badi balwa umwe. Ne ki mudi kabidi Mukaji-musela ne Kilisto balwa Umwe. Mudimu wa bwambi wa Mukaji-

musela, ne mudimu wa bwambi wa Kilisto, ngumwèumwè awu. Nenku vulukaayi ne, “Maalu ânkaadì mulonde aa, Wêwè Teofile, ndi mukufundilewu, àkabangà Yesu kwenza ne mutungunuke ne kwenza aa.” Lufu Lwende kalwakaMwimanyikaku to. To, mukalenge! Wâkaalukila cyakabidi. Kayi mupersona mwisâtù to, kadi Mupersona umwèumwè wâkaalukila mu mmwenekelu wa Nyuma Mwîmpè, bwa kutungunuka ne mudimu awu; ne ùdi anu utungunuka, mudi Mukanda wa Byenzedi mwambe. “Yesu Kilisto umwèumwè awu makeelela, leelu, too ne kashidi.” Ki Cimanyinu ncyôcì aci. Ki cimanyishilu ncyôcì aci.

⁹⁷ Pavwa Peetelo ne Yone bapicila mu ciibi civwabo babiikila ne Cilenga aci, kuvwa muntu mulaadika mucibukile pansi, mulema kacya mu difu dya mamwëndè, ki kwambaye ne: “Argent anyi ngôlò ncyêna naabi to; kadi cîndì naaci, ndi nkupà. Mu Dîna dya Yesu Kilisto wa ku Nazaleeta, juuka wendele kuulu.” Nwamonu anyi? Nenku paakaakulabo naabo, baakamanya ne bavwa binyonga ne kabayi balonge kalaasa to, kadi baakamona ne baakadi ne Yesu. Nwamonu’s, Cimanyinu civwa mwaba awu, cileejibwe patooke. Nwamonu’s: “Cîndì naaci!” Bamona mwaneetu wa balume mupele, mudishinde mulaadika pansi mwaba awu, mucibukile pansi ne kwîsù kunyangukangane kwônsò, ne bikwabo byônsò. Ne Mwoyi umweumwe uvwa munda mwa Kilisto awu nguvwa munda mwabo ne: “Cîndì naaci!”

⁹⁸ “Mu Dînà Dyanyi *nwêñù* nenwipate badémons.” Kabiyi ne: “*Mêmè* nêngîipatè” to. “*Nwêñù* nenwipate!” “*Nwêñù* bambile mukuna ewu!” Kabiyi ne: “*Mêmè* mwambe” to. “*Nwêñù* bambile mukuna ewu!”

⁹⁹ Kaa, mwaneetu, dîbà dîdì dîkengelà bwa Cimanyinu aci kuleejiibwaci patooke’s dikaadi pabwîpi. Twêtù’s tudi mwa kudimona. S’tudi bamanye ne tukaadi pabwîpi ne nshiikidilu patudi twakulangana apa. Tukaadi batwaletwale mayiisha a mishindu yônsò, bwa kuleeja bimanyinu ne maalu a kukema, kadi’s nyewu tudi baalukile mpindyewu bwa cidi cikengela bwa Ekeleeziya kwenzaye. Bidi bikengela bwa Cimanyinu aci kuleejiibwaci patooke. “Pângààmònà mashi, Nêmpicilè pamutu peenu.” Cintu cikwabo nansha cimwe kî ncifwanyineku kukumbana nansha. Cidi ne cya kwikalà Mashi. Mpindyewu, Nyuma Mwîmpè ki cyetu Cimanyinu, cya kudi Nzambi.

¹⁰⁰ Byenze bu mwena teoloji kampanda wa munene, mumanyi wa-wa dibàla, mwaneetu wa ba-Baptistes, muntu wa maalu malenga, wa ngiikadilu mulenga, paakalwaye kündì musangu kampanda, ne kwambaye ne: “Mwaneetu Branham,” yêyè ne, “wêwè nya’ wakula bwa Nyuma Mwîmpè ewu,” yêyè ne, “mona’s, aci kî ncintu cya cipyacipyà to.” Yêyè ne: “S’tukaadi baMulongeshelongeshe bamane ne mwoyi, munda mwa bikondo.” Ki mêmè-mêmè kwamba, ee, mêmè... Yêyè ne: “Twêtù’s tudi bapete Nyuma Mwîmpè.”

¹⁰¹ Mêmè ne: “Wêwè utu muMupete dîbà kaayi?”

¹⁰² Yéyè ne: “Pângààkiitabuujà apu.” Bwalu, mvwa mumanye ne cyôci aci ki civwa teoloji wa ba-Baptistes, wa ne, paudi witabuuja, udi upeta Nyuma Mwîmpè.

¹⁰³ Mêmè kwamba ne: “Dîbà adi’s Pôlò wakamba, mu Byenzedi 19, wambila musùmbà kampanda wa bantu, kasumbu kampanda kaa ba-Baptistes, bwalu, muyiishi kampanda wa ba-Baptistes uvwa umwe wa baakakudimwishabo mucima kudi Yone, uvwa ujaadikilangana ku Bible ne Yesu nguvwa Kilisto awu.”

¹⁰⁴ “Paakapicilaye mu nseke mitumbuke ya ku mubangubangu wa Efeso, wâkasangana bayiidi kampanda, ne wâkabâmbila ne: ‘Nukaadiku bapete Nyuma Mwîmpè *kacya* nwîtabuuja anyî?’ Bôbò kwamba ne: ‘Katütu bamanyeku ne Nyuma Mwîmpè ûtukù to.’” Ki kubakonkaye mushindu uvwabo babatijiibwe. Nenku bôbò kabavva babatijiibwe mu Dînà dya Yesu Kilisto to, Mwânà wa mukooko uvwa mulambudiibwe awu’s. Kabavva bafwanyikijiibwe Nende to, nansha kakese. Bôbò bavva anu bacitâbûuje cyanaana; byenze anu mudi bwanga bwa dinwa buteeka pâapa, kadi kabayi babunwe to. Pôlò kubatuminaye dîyì bwa kubatijiibwabo cyakabidi, mu Dînà dya Yesu Kilisto.

¹⁰⁵ Nenku paakenzaye cyôci eci, ki Cimanyinu aci kulwaci pambidi paabo. Baakafwanyikijiibwa ne byenzedi ne bimanyinu bya Nyuma Mwîmpè, baakula mu myakulu munkaci mwabo amu, ne bamba biprofeta, batumbisha Nzambi. Baakafwanyikijiibwa ne—ne Mulambu wabo.

¹⁰⁶ Nenku Nyuma Mwîmpè ki dyetu dimanyishiibwa. Yéyè ki udi utumanyisha bu beena Kilisto. Kaciyi buumambala bwetu mu maakeleeziya to, kaciyi dyumvwa dyetu dya Bible to, kaciyi bûngì bwa dimanya dya Bible dyûdî naadi to. Mbûngì bwa dimanya dyûdî naadi pa bidi bitangila Mwenaye, nwamonus, mushindu udi Mwenaye utamba kwikala ne mwoyi munda mwebe. Cidi ngwêwè—cidi ngwêwè mwine muumuke. Kuciyiku kabidi to. Udi udibala wêwè mwine mufwe, ne Cimanyinu ki cidi ne mwoyi munda mwebe. Ne kaCicyena mwoyi webe wêwè to; Cikaadi n’Yéyè.

¹⁰⁷ Pôlò mmmwambe ne: “Nsòmbelu wûndì mpindyewu nende ewu (Ùkaavwa ne nsòmbelu mushilangane ne uvwaye nende kale awu.) kî mmêmè to, kadi n’Kilisto udi ne mwoyi munda mwanyi.” Ki Cimanyinu cimanyishiibwe cîvvà Nzambi mulombe aci. Bafwanyikijiibwe ne wetu... Difwanyikijiibwa dya ne Mulambu wetu, Mwoyi wa Musungidi wetu munda mwetu, Nyuma Mwîmpè.

¹⁰⁸ Kaa, Cimanyinu kaayi—kaayi cilelela’s we! Kakwena mwa kwikala kabidi Cimanyinu cikwabo to. Kaa, ekelekele, nwîkalapù nanshà mwa kubakula cingenyingenyi cya—cya bwalu abu’s we. Bu ne mvwaku ne—ne bucole mu dinda emu, ku

méyì, bwa kwamba patooke ne kuteeka munda mwa musuuka webe udi mund- . . . kî mmu maci ebe to, kadi mu musuuka webe, nenku udi—udi mufwanyine kumona cishindiki cya Yéyè awu. Bidi—bidi bikengela, Yéyè awu udi ukushiya mu diikisha dya kacya.

¹⁰⁹ Anji ambabi tünd, bu ne wêwê uvwa mubunde cilumbu, ne bikengela bwa wêwê kulumbulwishiibwa ku tubàdì twa cînsangànsàngà. Nenku wêwê mwikâle mumanye ne, bôbô basangane ne udi mupiile, udi ne cya kufwa, ne neufwile ku nkwsa mutwa ku nzembu, anyi mu cibambalu cya bakushipa ne gaz, anyi bakushipa ku lufu kana lwônsò lwa bantu bitwilangane luvwabo bakulongolwele, pàmwâpa bakwowa, anyi cintu kampanda, bâkupà mutuutu wa ufwa kuyi ulumbulula to, cibawu cyônsò cüikalàku aci. Cibi wêwê mumanye ne udi . . . Udi mupiile. Peebe mumanye ne udi mupiile, ne udi ne cya kufwa pawikala kuyi mupete mukulumbulwidi udi mwa kwangata kaaba keebe, udi mwa kukupatula mu cintu aci. Nenku mpindyewu's udi mufwanyine kuswa bwa kupeta mukulumbulwidi mutambe kwikala mwîmpè ûdiku peebe mufwanyine kupeta awu.

¹¹⁰ Ne dîbâ adi kupeta kwa mukulumbulwidi wa mwîmpè, mukulumbulwidi mudimuke, s'udiku mufwanyine kudyumvwa ne cilumbu cyebe civwaku . . . udi mufwanyine kuumvwaku diikisha ndambu, bwalu udi mupete mukulumbulwidi. Kadi nkufwanyine anu kushaala lukonko lwa ne mukulumbulwidi mwine ewu mmufwanyineku kushintulula mmwenenu wa nziji anyi, anyi kushintulula kasumbu kaa bateeleji baa cilumbu aci anyi; mukulumbulwidi mwine ewu, ku ngaakwilu wende wa mutu mudimuke ne dimanya dya mikenji adi, bu yéyè mwa kufika ku dishintulula ciine aci, ne kulumbulula cilumbu cyebe ne kujaadikilangana ne—ne bivwa bikengela bwa wêwê kushaala ne mwoyi. Kadi nansha nanku, mu bwende—bwende pende bukookeshi bwônsò bunene abu ne wende ngaakwilu wa kapelu udiye mufwanyine kwakula awu, ne mushindu kampanda udiye mufwanyine kudileeja kumpala kwa kiine kasumbu kaa bateeleji baa cilumbu aku anyi kumpala kwa mwine nziji awu, wêwê's—wêwê's udiku mufwanyine—wêwê's udiku mufwanyine . . . Pàmwâpa udiku mufwanyine kupeta diikisha bwa ndambu wa tusunsa, kadi nkufwanyine anu kushaala lukonko mu meeji ebe amu ne: "Yéyè udiku mwa kucyenza anyi's bakwetu wa yaaya?"

¹¹¹ Kadi mu eci cilumbu cidi panshi apa eci, Nziji Yéyè mwine ngudi ushaala Mutulumbulwidi. Nzambi wakashala muntu. Kakuvwa mutulumbulwidi nansha umwe uvwa mufwanyine kucyenza to. Katuvwaku bafwanyine kumupeta to. Môsà, ne Mikenji, baprofeta, cintu nansha cimwe kacivwaku cifwanyine kucyenza to. Pa nanku Nziji wakashala byônsò abi, Kasumbu kaa bateeleji baa cilumbu, Mutulumbulwidi ne Nziji, Yéyè

nkaayende; ne wàkangata bwakane bwa Mikenji Yende mu byanza Byende Yéyè mwine, ne kubifucilaye mushinga, Yéyè mwine. Ambaaku tûng mutudi bafwanyine kupanga kwikala batambe kukubiibwa? Kadi kwaluja Mwoyi Wende Yéyè mwine pambidi peetu twêtù, bu bujaadiki bwa ne Yéyè wăcítâbì. Dikubiibwa kaayi's we!

¹¹² “Eyo, nansha mêmè ngenda mpicila mu cibandabanda cya mundidimbi wa lufu, ncyakuciinaku bwalu bubi nansha bumwe to, bwalu Wêwè udi naanyi.”

¹¹³ PadiYe ushaala byônsò Nzaji, Kasumbu kaa bateejeji ba cilumbu, ne-ne Mutulumbulwidi, Yéyè's wakalumbulula cilumbu cyetu. Twêtù, basanganyiibwe bapiile kudi Mikenji Yende Yéyè mwine; nenku Yéyè kulwa ne kwangata kaaba kaa muntu mupiile awu, uvwa mu citendeleelu awu. Yéyè kwangata mpekaatu wende. Wàkamwangata pambidi Pende Yéyè mwine, ne wàkafwa, ne wàkafuta mushinga awu, ne wàkeela Mashi Ende pansi, ne wakaaluja Cimanyinu Cyende Yéyè mwine, Mwoyi Wende Yéyè mwine.

¹¹⁴ Mona's, twêtù's tudi bapwangane. Cilumbu ncimana kuumusha. Kakucyena kabidi mpekaatu kudi mwena kwitabuuja to. Éyi Nzambi wa yaaya, wâfwakù luse's we, piikalà bantu kabayiku mwa kumona aci ne, kakucyena kabidi cilumbu to. “Ewu udi umvwa Mêyi Aanyi ne witabuuja Yéyè udi muNtume, udi ne Mwoyi wa Cyendeleele, ne yéyè kaakulwa ku Cilumbulwidi to, kadi ùkaadi mumane kuumuka ku lufu myye ku Mwoyi.” S'ki cilumbu ncyôci aci. Cilumbu cyumusha! Kakucyena kabidi cilumbu pa bwalu abu to. Amen! Nenku mu dikubiibwa, mu dikubiibwa ne Cimanyinu citeeka, piikalà lufu mwa kubanga kudikuma ku ciibi pambelu pâapa, kalwenaku ne bukontononyi nansha bwa kânà to. Nwamonu anyi? Eyowa's.

¹¹⁵ Cimanyinu nciteeka. Anu Cimanyinu nkaayaaci ncidi ciittabiibwà mpindyewu. Nwamonu's, Yéyè wakenza nanku bwa Cimanyinu cyamona mwa kulwa. Cimanyinu civwa m'Mwoyi wa Nzambi.

¹¹⁶ Ne Nzambi paakenzaYe muntu wa kumpala apu, Wàkamwenza mwânà wa balume. Kadi mwânà wa balume awu wakanyanguka bikole mu mushindu wa ne wakateeleja mukajende pamutu paa kuteejaye Nzambi, ne mukaji pende wakateeleja dyabulu pamutu paa kuteejaye bayende, nenku, paakenzeka bwalu abu, cyakabanyaanga bikole bôbô bônsò, mu mushindu wa ne cyakatwala dikooyika. Ne Yéyè uvwa mumanye ne, paakenzabo nanku, bavwa ne cya kulela bânà pa buloba. Cimuma cya munkaci mwa muci aci kacivwa mwa kulengiibwa to, ne, pashiishe, paakenzeka aci, baakaditwadila bôbô biine mpekaatu ewu pambidi paabo. Nenku ki bwa cinyi bukwabantu bwônsò nkòòng, bwàkalediibwà abu, bwakasanganyiibwa mu

mpekaatu. Mwaba awu, mushindu wa dipatukamu udi aku anyi udi kunu.

¹¹⁷ Ki pashiishe Nzambi kutuulukaye. Kudi mushindu anu umwepele wa kumwaluja, ngwa kumwalujila cyakabidi mwâna wa balume. Kadi mmunyi mudiYe mwa kucyenza, padi Mikenji Yende Yéyè mwine kacya anu yiimana mwaba awu yamba ne “mmupiishiibwe”? Pashiishe ki Taatù Yéyè mwine kushalaYe umwe wetu. Ki Mwâna wa mukooko mulelela nyéyè awu. Ki kiipacila Kende kavwaYe naaku mu meeji nkôkò aku.

¹¹⁸ Ki bwa cinyi Mwâna wa mukooko wakamanyishiibwa anu menemene mu Budimi bwa Edena, bu muvvabi ne Mwâna wa mukooko ne Nkuci bivwa mwa kutuutakeena musangu kampanda, dîbà divwa Mwâna wa mukooko ne Nkuci mwa kwikala pamwe. Ki paakamanyaYe ne, ku cyôcì aci, twêtù tudi mwa kwikala pamwe. Ne Yéyè uvwa muswe kwenza mulambu wa mushindu awu, mpindyewu, bwa Cimanyinu kuteekiibwaci, mu mushindu wa ne katucyena kabidi bantu baa bende to, katucyena kabidi beenyi to, kadi tudi bânà baa balume ne baa bakaji baa Nzambi. Ne Adama ne Eva bônsò babidi, mukaji ne mulume, basanga pamwe, mbânà baa balume ne baa bakaji baa Nzambi, mu Kilisto Yesu, ku mulambu Wende munene awu.

¹¹⁹ Nenku, dîbà adi, bwa kakwikadiku ntupakanyi nansha mikese to! Dimiinu dya mwoyi ewu dîdì ne cya kükunyibwa mu buloba adi, dya mubidi ewu dîdì—dîdì dimiinu dîdì dibutuka adi; nenku mwoyi, piikalaci mwoyi munyangakaja mu dimiinu adi, udi ubutuka pamwe ne dimiinu adi. Kadi Yéyè mmwele Mwoyi wa Cyendeleele mu dyôdì adi ne mudifwanyikije bu Dyende Yéyè mwine, bwa mu dibiishiibwa dya ku lufu Yéyè wamona mwa kudibiisha, ne kantu nansha kamwe kakaadyakujiminaku to. Nudi bamone cîndì muswe kwamba aci anyi?

¹²⁰ Ndyôdì adi, kadyena mpindyewu mwa kubutuka to. Mwoyi mmudibwikile. N’Cimanyinu, cibwikile kaamubidi kakese aku, cibwikile musuuka wa mwine muntu awu. Kudi Cimanyinu cibwikile mwaba awu, Nyuma Mwîmpè, ne ngwà Nzambi. Ngwèndè Yéyè. “Pângààmònà Cimanyinu, Nêmpicilè pamutu peenu.” Cimanyinu cilelela, Nyuma Mwîmpè ngudi Cimanyinu cyetu. Ki bwa cinyi, paudi upeta Nyuma Mwîmpè, udi muumuke ku lufu muye ku Mwoyi. Ki cyônsò cîdîku pa bwalu abu ncyôcì aci, bwalu Mwoyi udi munda mwebe. Kwêna mwa kubutuka kabidi to.

¹²¹ Bible mmmwambe ne: “Ewu udi mulediibwe kudi Nzambi katu wenza mpekaatu to, bwalu yéyé kêna mwa kwenzaku mpekaatu to, bwalu Dimiinu dya Nzambi,” amen, “Dimiinu dya Nzambi ndisòmbèle munda mwende.” Kadi yéyè udi mwa kwenza mpekaatu bishi padi Nzambi udi kayi ne mpekaatu awu munda mwende? Padiye usanganyiibwa munda mwa Nzambi udi kayi ne mpekaatu, ûdi mwa kwenza mpekaatu munyi?

Cidiye mwenze nansha ciikàle cinyi, Mashi mmamubwikile. Nwamonu anyi? Ùkaadi cifukiibwa cipyacipyä mpindyewu. Majinga ende ne twipacila twende mbya ku Dyulu, bwalu yéyè ukaadi mushintuludiibwe muumuke ku mpoopu muye ku blé. Ende majinga kaàcyenà kabidi amweamwe muvwawu kale amu to, ne yéyè udi ucileeja patooke.

¹²² Wêwè udi wamba ne: “Kaa, s’ndi mwitabuuje Cyôcì aci.” Kadi mucikàle anu wenza mpekaatu anyi? Bwâlâ’s! Udi museeswishiibwe wêwè. Nwamonu anyi? Kacyena mwa kuleeja patooke cîngà cintu to anu Cimanyinu.

¹²³ Izaleela wakapeta dîyì dimutumina bwa kushaalaye mwinshi mwa mashi awu too ne paakalwa mêtì a dyasa dya lwendo. “Kanupatuku mwinshi mwawu to!” Mbenze anu basanganyiibwa mwinshi mwa cimanyinu aci, baakatwibwamu citampi. “Kanùùmukumù to!” Bâàkashâàla anu muntwamu too ne pààkakùmbanà mundankùlù ne pààkadilà mpungi. Nenku paakadila mpungi, nsengu ya kale ya bimpanga bya mikooko ayi paakabangayi kudila, muntu ne muntu wakapatuka ne byakudya bivwaye mulame, uya mutangile ku buloba bulaya.

¹²⁴ Bya mwomumwe kabidi ne mulume anyi mukaji udi muujiibwe tente ne Nyuma Mwîmpè, mmutwibwe citampi, ne mukubiibwe ku bwalu bubi bwônsò ne ku njiwu yônsò. Nsòmbelu wende mujima udi uleeja patooke cidiye, kwônsò kudiye wendela, mudimu wônsò udiye wenza, ewu yônsò udiye uyikilangana nende. Padiye yéyè ubwela mu dipetangana ne bantu bakaji, padiye ubwela mu dipetangana ne batuye muswikakane naabo, padiye ubwela mu dipetangana ne cintu kana cyônsò, Cimanyinu aci nciteekiibwe mwaba awu. Amen! Pakaadibi ne ki lufu ndwôlò elu: “Ncyakuciina bwalu bubi nansha bumwe to, bwalu Wêwè udi naanyi,” Cimanyinu aci nciteekiibwe mwaba awu. Pakaadibi ne ki dibiika dya ku lufu ndyôdì edi, yéyè neikaleku, bwalu Nzambi neamubiishe ku lufu ku dituku dya ndekeelu. Yesu ngwâkamba! “Pângààmònà Mashi, Cimanyinu, Nêmpicile pamutu peenu.” Kaa!

¹²⁵ Vulukaayi ne, bu cimanyinu aci kaciyi cileejiibwe patooke to, nansha cipungidi ciine aci nunku ncivwijiibwe cyanaana. Ncy bushuwa’s. Cipungidi aci civwa civwijiibwa cyanaana. Kakuvwa cipungidi nansha cimwe—nansha cimwe to pavwa cimanyinu aci kaciyiku. Cimanyinu aci civwa bu cipungidi. Nzambi wakenza naabo cipungidi, eyowa’s, mukalenge, kadi bivwa bikengela bwa cimanyinu aci kwikalaci kwôkò. Kacivwa ne bwenzeji to, ciine cipungidi aci, pavwa cimanyinu kaciyiku.

¹²⁶ Kuvwa beena Yuda bààbûngì bàvvà bafwanyine kwamba ne: “Lwâ kuneeku! Mêmè ncyêna ne mashi ku ciibi cyanyi to, kadi ndi muswe nkuleeje cintu kampanda ne, ndi mwena Yuda mutengula. Ndi mutengula.” Aci kacyena ne mushinga nanshi

wa *cishòntò* to. [Mwaneetu Branham udi utuuta cishonto—Muf.] “Pângààmònà mash! Pângààmònà cimanyinu!”

¹²⁷ Wêwè udi mufwanyine kwamba ne: “Mêmè ndi Baptiste, Presbytérien, Méthodiste,” anyi cyônsò cyûdì muswe kwikala aci.

Kadi: “Pângààmònà Cimanyinu!”

¹²⁸ Udi wamba ne: “Ndi mwena kwitabuuja. Wanyi mààmù uwa cidimba cya ekeleeziya ewu. Wanyi papa uvwa cidimba cya ekeleeziya ewu. Mêmè ndi cidimba cya mwômò amu kacya ku bwânà.” Aci kacyena ne mushinga nansha wa *cishòntò* to. [Mwaneetu Branham udi utuuta cishonto—Muf.] “Mêmè ncitu nshima, ncitu ngiiba to. Ncitu ngenza *bikampanda* to. Mêmè . . .” Aci kacyena ne mushinga *kampanda* nansha wa *cishòntò* to. [Mwaneetu Branham udi utuuta cishonto.] “Mêmè ntu mwena Branham Tabernacle. Ntu ngenza *bikampanda*, *bikansanga*, anyi *bikankenga*. Ndi mwitabuuje Dîyì dyônsò.”

¹²⁹ Beena Yuda abu bawwa bafwanyine kwamba ne: “Mêmè ndi mwitabuuje Yehowah!” Yéyè uvwa mufwanyine kwikalaku muteeleje Mukenji wa dîbà, bu ne ùvwa mwitabuuje. Cya bushuwa’s.

Bawwa bafwanyine kwikala ne mikenji bûngì cyanaana, kadi Ewu nguvwa Mukenji wa dîbà adi. Nwamonu anyi? Mêmè ndi ngiitabuuja Mukenji wa dîbà. Eyowa’s. Mashi akalaabiibwa ku dîbà dya dilolo.

Bawwa bafwanyine kwikala bambe ne: “Mêmè, mêmè’s ndi mwena Yuda.”

¹³⁰ Bantu badi bamba leelu ewu ne: “Mêmè ndi mwena Kilisto. Ndi mwa kukuleeja buumambala bwanyi bwa kukaadi ntanta mule. Ndi muswe bwa ungambileku kûnkaadîku mwibe cintu kampanda kacya, kûnkaadîku kacya mufundiibwe ku tubâdì. Undeejeku ne mpenyi pâンkaadîku mwendele masandi kacya, kûnkaadîku kacya mwenze nansha cimwe cya ku bintu ebi, anyi cintu kampanda cya bu nanku awu. Undeeje mwaba nansha umwepele.” Aci kacyena ciswa kwamba cintu nansha cimwe to mpindyewu. Kaa, to. Nwamonu’s, nansha byôbì ne yêyè uvwa usanganyiibwa mu cipungidi cya bishi, cipungidi aci kacyena ne bwenzeji to. Ncipange bwenzeji.

Wêwè udi wamba ne: “Ee, mêmè’s ndi mulongi wa Bible.”

¹³¹ Cyûdì aci kacyena ne bwalu to. Kakuyi cipungidi aci to, ciji cikole cya Nzambi cidi cikulandala. Neya bushuwa. Cidi cikukwata. Eyowa’s. “Mpekaatu yebe neikupete.” Mpekaatu ncinyi? Bupidya. Udi mubenge kwitabuuja Mukenji. Udi mubenge kwitabuuja Dîyì. Udi mubenge kwitabuuja ntemu wa Cimanyinu, Cyôci ciine, paaCi ciikâle ciDimanyishe munkaci mwetu. Nenku wêwè wabengi kwitabuuja Aci anyi? Nansha wêwè mubenge kuCiitabuuja bishi, bikengela anu Citeekiibwe.

¹³² Wêwè udi mufwanyine kwamba ne: “Ndi nCiitabuuja. Ndi nCiitabuuja. Ndi ngiitabuuja ne Cidi Bulelela. Ndi nCiitaba ne m’Bulelela.” Dîbà adi byônsò abi’s bidi anu bîmpè, kadi nansha nanku’s bidi bikengela Citeekiibwe.

¹³³ Mona’s, mwena Yuda umwepele udi mwimane pààpa wawa, uvundulula mashì, pavwa mwâñà wa mukooko umata mashì apu, wamba ne: “Ewu n’Yehowah.”

¹³⁴ Kadi ki mwakwidi udi mwimane pààpa wawa, wamba ne: “Eyowa’s, mukalenge, ndi ngiitabuuja ne aci ncilelela,” kadi pa nzubu wende yéyè mwine kaàyi malaabiibwe to. Kayi yéyè muswe kudifwanyikija pambelu pààpa ne kasumbu aku to; to, mukalenge, bakoleshi baa maalu badi ne mashì aba. Kî mmuswe didifwanyikija adi to. Nansha yéyè awu ne uvwa mwakwidi wa bishi, ne uvwa mumanye Dîyì bûngì bishi, nansha mwikàle mukolessiibwe bilenga bya bishi, byenzedi bivwaye mwenze nansha biikàle bya bishi, bivwaye mupeeshe bapele nansha byôbì bûngì bishi, milambu yivwaye mulambule nansha yôyì bûngì bishi!

¹³⁵ Pôlò mmwambe ne: “Ndi mfila mubidi wanyi bwa kwoshiibwawu, bu mulambu; mfila bintu byanyi byônsò bwa kudiisha bapele; ndi ne diitabuuja bwa kutuntumuna mikuna, ne bikwabo; ne ngaakula mu myakulu, bu mùdì bantu ne banjelo; ne bintu bikwabo byônsò ebi,” kadi kwambaye ne, “ndi cintu cyanaana padi Cimanyinu kaciyi anu citeekiibwe to. Too ne padi Cimanyinu eci!” Cyôci aci ki cîndì ngakwila dilolo edi, dinanga adi. Nwamonu anyi? “Mpindyewu, padi anu cyôci eci kaciyi cilaabiibwe to, ndi cintu cyanaana.” Nwamonu anyi?

¹³⁶ Nansha byôbì ne, udi mufwanyine kwikalà mwipate badémons. Udi mufwanyine kwikalà mwondope babeedi ku disambila dyebe dya diitabuuja adi. Udi mufwanyine kwikalà mwenze bintu byônsò ebi. Kadi Cimanyinu aci kaciyiku to, wêwè udi mwinshi mwa ciiji cikole cya Nzambi. Udi mufwanyine kwikalà mwena kwitabuuja. Udi mufwanyine kwimana mu cyambilu ne kuyiisha Evanjeeliyo. “Bâàbûngì nebalwe kûNdì mu dituku adi, bamba ne: ‘Mukalenge, Mukalenge, mêmè ewu ncitukù mwambe biprofeta mu Dînà Dyebe, muyishe mu Dînà Dyebe anyi? Ncitungù mwipate badémons mu Dînà Dyebe anyi?’” Bônsò abu m’ba-Méthodistes, ba-Baptistes, ne beena Mpenta. Yesu kwambaye ne: “Nguumukilayi apa, nwénù beena mudimu baa bubi. Kacya Ncitu nansha munumanyeku to.”

¹³⁷ “Kadi, pâNgààmònà Cimanyinu, Nêmpicilè pamutu peenu.” Ndilomba dya Nzambi bwa dîbà edi. Mukenji wa cikondo cya dilolo, ngwa kuteeka kwa Cimanyinu.

¹³⁸ Sataana mmwelemu ditentula dya mishindu yônsò, dya dilabulangana dya ku cyanza, ne dya bileeji, ne bintu byônsò mushindu awu. Bîpwäyi mwoyi! Dîbà dikaaadi dimane kulwa dya

Cimanyinu, Cyôcì ciine; kaciyi ditentula kampanda, diitabuuja dya budingìbudingì, cipinganyi, anyi nî ncinyi cyônsò to.

¹³⁹ Dîbà dikaadi dikumbane didi Cimanyinu Yêyè mwine mwikâle uDimanyisha anu munkaci mwetu mene, ne ujaadika ne n'Yêyè Yesu umwèumwè awu makeelela, leelu, too ne kashidi, ne Yêyè udi anu ne Dîyì. Bidi bikengela citeekiibwe. Muntu udi wamba mudiye ne Cimanyinu, mwikâle uvila Dîyì edi, dîbà adi netwâmbè cinyi pa bwalu abu? Nwamonu's, kwêna mwa kwenza nanku to. Bidi bikengela Cimanyinu ciìkalèku. "PâNgìikalà... Mashi neikale cimanyinu kunudi." Mpindyewu Nyuma Mwîmpè, Mwoyi uvwa munda mwa Mashi awu, udi Cimanyinu kunudi. Nêmfikèku mu katanci emu, nwamonu's. Nyuma Mwîmpè ngudi Cimanyinu. Bwa cilumbu kaayi ncijke. Eyowa's, mukalenge. Mpindyewu, nwavulukaayi. Nenku mêmè...

¹⁴⁰ Cyûdi kî ncidi ne bwalu to, mushindu wûdì mwîmpè, bûngì bwa misangu yûkaadì mutupike *muulu ne pansi*, bûngì bwa ekeleesiya yûkaadì myue kashaala wa mu yôyì, bûngì bwa bintu bîmpè byûkaadì mwenzenze, kabyakwikala ne mushinga nansha mukese kûdi to padi Cimanyinu kaciyi citeekiibwe. Dîbà dya dilolo ndyôdì edi. Abi byakenda bîmpè mu matuku a Luther, abi byakenda bîmpè mu matuku a Wesley, kadi kabyena byenda bîmpè mpindyewu utudi twakulangana ewu to. To.

¹⁴¹ Eyowa, kulama kwa mwânà wa mukooko kuvwa kwîmpè mwine musangu awu. Aba baakafwa musangu awu kumpala kwa mwânà wa mukooko kulaabiibwaye, mashi's, abi kaayi bivwa bishiilangane. Eyowa's, mukalenge. Bôbò abu baakaya kumpala bwalu bwa kondo kaa mwoyi kalenga. Nebiikale ne cya kulumbulwishiibwa bwa ne ní bavva—bavva...

¹⁴² Piikalabi ne bavva badyanjila kulongolola, civwa cibalenga. Kabiyi nanku to, kacyena cibalenga to. Kwajiki. Abu bwalu budi anu bwa Nzambi nkaayende. "Yêyè—Yêyè udi ubingisha udiYe muswe kubingisha, ufwila luse udiYe muswe kufwila luse, ne Üdi upiisha udiYe muswe kupiisha." Yêyè udi Nzambi. Kwajiki. "Yêyè udi ufwila luse udiYe muswe kufwila luse, ne upiisha udiYe muswe kupiisha."

¹⁴³ Mwena Yuda uvwa mufwanyine kuleeja patooke, ku ditengudiibwa ne, mmwena kwitabuuja.

¹⁴⁴ Kudi bantu bààbûngì, biitabi baa maalu mudiwiw mafundiibwe, bàdì mwa kwangata Bible ewu ne kwamba ne: "Mêmè ndi mwena kwitabuuja, ne Yesu wakamba ne 'ku diitabuuja' nkutudi basungidiibwe. Nenku mêmè ndi mwena kwitabuuja, kadi dibatiiza dya Nyuma Mwîmpè adi ndukutukutu." Dîbà adi Cimanyinu kî nciteekiibwe to. Nansha bishi, nansha yêyè witabuuja bishi, mbivwijibwe cyanaana.

¹⁴⁵ Anu mudi ditengudiibwa dya mwena Yuda. Yêyè udi wamba ne: "Mêmè ndi mwena Yuda. Mbwa cinyi budibi bikengela bwa

mêmè kupatuka kwaka ne kwenza maalu bu musùmbà mukwabo wa bakoleshi ba maalu wawa?"

¹⁴⁶ Môssà mwimane, ùbànda upweka ne mùsèèsù, wàmба ne: "Mukenji wa dilolo udi apa! Nebyenzeke ne, kundekeelù kwa matuku dikumi ne anaayi, nenukungwije disangisha nushipe mwânà wa mukooko. Disangisha dijima dya Izaleela nedimushipe, bamutentekèle byanza, biikàlè badifwanyikija nende. Ne mashi nealaabiibwe ku dikunji, ne ku mukamba wa ciibi, nenku: 'Pângààmònà mashi, Nêmpicilè pamutu peenu, bwalu ncimanyinu cya ne nudi biitabuuje lufu Iwa mwânà wa mukooko úndì munupetele.' Mashi ngavwa cimanyinu.

¹⁴⁷ Bwa mpindyewu Nyuma ngudi Cimanyinu. "Nenuuiibwe ne Nyuma Mwîmpè kakwakupita matuku àbûngì to kubangila ku mpindyewu." Nenku paakeediibwa Mashi pansi, Cimanyinu cyakatumiiibwa mu Dituku dya Mpenta, cyenze bu cipeepele cikole, cya civuma.

¹⁴⁸ Ki civwa cyena-bwalu cya mupostolo yônsò. Civwa ne: "Nukaadi bapete Nyuma Mwîmpè kacya nwîtabuuja anyi? Nyingalalaayi, muntu ne muntu wa kunudi, ne nubatiijiibwe mu Dînà dya Yesu Kilisto bwa dilekelediibwa dya mpekaatu, nenku nenupete kupà kwa Nyuma Mwîmpè eku, bwalu n' Cimanyinu, amen, cya ne nudi buumuke ku lufu baye ku Mwoyi." S'ki bwalu mbwôbù abu. Pààkajiminà baa Bisamb-... pààkajiminà ekeleeziya wa beena Yuda awu, baa Bisamba bya bende baakangata mulala, ne dinyangakaja adi mushindu awu; mpindyewu úkaadi mupatuke, bwa kwangata bàshààdilè baa mu baa Bisamba bya bende, bwa bwalu bwa Dînà Dyende, Mukaji-musela awu.

¹⁴⁹ Nudi bumvwe cîndì muswe kwamba aci anyi? Nudi bumvwe cidi Mufundu wamba mwaba ewu aci anyi? Cimanyinu kaciyi cileejijiibwe patooke to, dîbà adi cipungidi kacivwa ne bwenzeji to. Nwamonu anyi? Ki mudibi ne cya kwikala. Bwalu, wêwè wamba ne udi mwitabuuje, kadi kuyi ulonda dileeja dya njila dya Dîyì to, dîbà adi kwéna mwitabuuje to. Nwamonu anyi? Nansha wêwè mutengula, nansha wêwè mukashaale wa mu ekeleeziya, ne nansha wêwè mubatijiibwe, mwenze bintu byônsò ebi mushindu awu; aci kacyena anu Cimanyinu, Nyuma Mwîmpè to.

¹⁵⁰ Mumanyi mulenga wa dibàlè ewu kutungunukaye ne kwakula naanyi, mûngämbì katanci aka amu. Yéyè ne: "Billy," mwakambaye, "Abraham's wakiitabuuja Nzambi, ne cyakabadiibwa kudiye bu bwakane. Ncinyi cikwabo cidi muntu mufwanyine kwenza pa kuumusha kwitabuuja Nzambi?"

¹⁵¹ Mêmè kwamba ne: "Aci ncilelela's, Mulongeshi. Ncya bushuwa. Yéyè wakiitabuuja Nzambi cya bushuwa. Ki mudi Bible mwambe. Udi mubinge. Bwa njila údi mwendè too paüdì apa, wêwè udi mwendè anu bilenga."

¹⁵² Pavwa anu batentekedi abu—abu—abu dikumi ne babidi, bâàkatùmiibwà bwa kuya katentekela buloba bwa Kaanaana abu, bwa pavwabo anu benda bayo batangile ku Kaanaana apu, bavwa anu benda bakwata buloba; kadi paakafikabo ku mukàlù, dìbà adi's baakabenga.

¹⁵³ Mêmè kwamba ne: “Nwêñù ba-Baptistes nudi bîmpè, bwa ntanta unukaadi balwe, kadi nukaadi bapete Nyuma Mwîmpè kacya nwîtabuuja anyi?” Hum. Mêmè ne: “Vuluka ne, Nzambi wakiitaba diitabuuja dya Abraham. Yéyè—yéyè wakiitabuuja Nzambi, ne cyakabaadiibwa kudiye bu bwakane, aci ncilelela, kadi pashiishe Nzambi’s wakamupa citampi cya ditengudiibwa aci, bu cimanyishilu, cimanyishilu kudiye.” Kabiyi ne mubidi wende awu, mutengudiibwe, uvwa ne dipetangana ne musuuka wende to, kadi civwa ncimanyishilu cya ne Yéyè (Nzambi) wakiitaba diitabuuja dyende adi.

¹⁵⁴ Ne Yéyè udi utupa cimanyishilu, cya Nyuma Mwîmpè, cya ne Yéyè wåtwítàbì bu beena kwitabuuja. Bwalu: “Nyingalalaayi, ne nubatijiibwe muntu ne muntu mu Dînà dya Yesu Kilisto bwa dilekelediibwa dya mpekaatu, nenku nenupe kùpà kwa Nyuma Mwîmpè. Bwalu mulayi udi kunudi!”

¹⁵⁵ Umvwayi bwalu abu mpindyewu. Beena Yuda, nansha muvwabo mwa kujaadikilangana ne bavwa batengudiibwe amu, kadi bivwa bikengela cimanyinu cileejiiibwe. Cyôcì kaciyyiku to, cipungidi kacivwa ne bwenzeji nansha. To.

¹⁵⁶ Bya mwomumwe mpindyewu, cintu cimwecimwe aci. Cyûdì wenza nansha ciikàle cinganyi, nansha mûdì mwa—mûdì mwa kuumvwija Bible amu. Udi mufwanyine kwikalaka mulongi wa Bible. Kaa, ekelekele! Udi mufwanyine—udi mufwanyine kwamba ne: “Ndi mwena kwitabuuja, ne byônsò abi.” Kadi Cimanyinu cicidi anu cilombiibwe. Mulongi wa Bible, wêwè udi wamba ne: “Mvwa muntu mwîmpè, Mwaneetu Branham.”

¹⁵⁷ “Cidi nî nganyi nî nganyi mwa kwamba nansha ciikàle cinyi, kwêna mwa kutamba muntu wawa to. Kacya mêmè ncitukù mwanji kumumona wenza cintu cibi nansha cimwe to, kacya bandela.” Aci kacyenaku ne dipetangana ne Nzambi to. [Mwaneetu Branham udi utuuta cishonto—Muf.] Kudi dilomba dimwepele, ne anu dimwepele adi!

¹⁵⁸ Kadi wêwè kwêna mwa kwenza aci to. Kwêna mwa kulaaba mashi ku mukamba wa ciibi, mwaba awu, cimanyinu kacyena mwa kwikalaku padi mwânà wa mukooko kayi mufwe to. Ne mashi ngavwa cimanyishilu cilelela cya ne mwânà wa mukooko uvwa mufwe. Kí ndiitabuuja dya budingibudingi nansha; mwânà wa mukooko uvwa mufwe!

¹⁵⁹ Ne Nyuma Mwîmpè ngudi Cimanyinu cilelela cya ne Mwânà wa mukooko webe mmufwe ne wêwè udi mupete Cimanyinu pambidi peebe wêwè mwine, bwalu Mwoyi Wende mene udi munda mwebe. Nwamonu anyi? Kakwena bya diitabuuja dya

budìngìbudìngì to. Kakwena bya didingidija to. Kakwena bya ditentula to. Cidipu! Wêwè udi mucimanye. Wêwè udi mucimanye. Baa pa buloba mbacimanye. Cimanyinu cidipu.

¹⁶⁰ Nansha byôbì ne muntu uvwa mwîmpè wa bishi. Mmufwanyine kwikala mulongi wa Bible. Ncifwanyine kwikala...Ncifwanyine kwikala cidimba cya ekeleesiya cya—cya mushindu kana wônsò ewu. Ncifwanyine kwikala muntu mwîmpè. Ncifwanyine kwikala mfumu wa—wa dingumba kampanda. Ncifwanyine kwikala dilondangana dya—dya myânzù dya Loomo. Ncyêna—ncyêna mumanye ne nganyi mwine awu to, kacyena—kacyena ne cîdici cyenza to.

¹⁶¹ Kadi, Izaleela, mulongi wa Bible kana yônsò ewu mmumanye ne Izaleela uvwa cimfwanyi cya Ekeleesiya, menemene, mwikâle uya mutangile ku buloba bulaya. Nenku kwôkò aku ki kudiYe mu lwendo wenda uya.

¹⁶² Kadi pààkalwà dîbà dya dilolo, ne lwendo lumana kwassa, kuvwa dilomba dimwepele dya kadiyi dya tuseku to. Nansha byôbì ne yêyè uvwa mwena Yuda wa bishi, nansha byôbì ne ùvwa mulame bikunyibwa byende bilenga bya bishi, nansha byôbì ne ùvwa mukube beena mutumba bende bilenga bya bishi, bivwaye mwenze nansha biikâle bûngì bishi, nansha ne ùvwa cidimba cîmpè cya bishi, nansha byôbì ne ùvwa ufuta byadiikumi bûngì bishi. Bintu byônsò ebi bivwa anu bilenga. Aci's civwa anu cîmpè. Ùvwa muntu mwîmpè, bamujingulule munkaci mwa cisamba cyende, bu ne mmuntu mwîmpè. Kadi kakuyi cimanyinu aci to, cya mashi aci, yêyè uvwa ubutuka.

¹⁶³ Kaa, Nzambi ankwacisheku's we, ne apa ne mu mikaba ya mîyi, bwa mêmè kutuuta musonso kucibweja bikole!

¹⁶⁴ Nansha bishi, wêwè udi mufwanyine kwikala muyiishe Evanjeeliyo, udi mufwanyine kwikala mwipate badémons, udi mufwanyine kwikala mwakule mu myakulu, udi mufwanyine kwikala mwele mbila, muje maja mu Nyuma, kadi kuyi anu ne Cimanyinu aci to.

Wêwè udi wamba ne: "Ndi mwa kwenza nanku anyi?"

¹⁶⁵ Pôlò's ngudi mwambe ne wêwè udi mufwanyine kucyenza. "Nansha mêmè ngaakula mu myakulu bu bantu ne banjelo, nansha mêmè mfila bintu byanyi byônsò bwa kudiisha bapele, mubidi wanyi bwa kwoshiibawu bu mulambu, mwikâle ne diitabuuja dya kutentemuna naadi mikuna, ne bintu ebi, ncidi anu cintu cyanaana." Kanwikadi beeyemene pa abi to. Bwalu mbwa Cimanyinu! Byûdì mwenze nansha biikâle bûngì kaayi, nansha wêwè mwîmpè wa bishi; pààteemà ciiji cikole cya Nzambi, necijingulule anu Cimanyinu aci.

¹⁶⁶ N'Cimanyinu cya ne mushinga mmumana kufuta, ùvwa mulombiibwe awu. Ne mushinga uvwa mufuciibwe ùvwa m'Mwoyi wa Yesu Kilisto, ne Yêyè ngwâkafila Mwoyi Wende. Ne Nyuma Wende ngudi walukila pambidi peebe, bu Cimanyinu

cya ne wêwè witabiibu. Nenku ukààdi wenda ne Cimanyinu aci, muunya ne bufuku, kabiyi anu mu dyalumingu to. Ndibà dyônsò, dyûdì ne Cimanyinu. “PâNgìïkalà . . . Mashi neikale cimanyinu kunudi.”

¹⁶⁷ Wêwè udi wamba ne: “Mêmè’s ncidi mutungunuke anu ne kwitabuuya. Ndi mwena kwitabuuya.” Aci cidi anu cîmpè. Kadi wêwè ubenga Cimanyinu, dîbà adi newikale mwena kwitabuuya bishi? S’nyawu cyakula cibengangana neeba. Nwamonu’s, cidi cyakula cibengangana ne bujaadiki bwebe, bûdì ufila abu.

¹⁶⁸ Mulongi wa Bible, muntu mwímpè, cidimba cya ekeleziya, cyônsò cyûdì aci, kacyenaku ne cîdîci cyamba to. Eyowa’s, mukalenge. Pàmwäpa tatwèbè mmuyiishi. Pàmwäpa mamwébè—mamwébè uvwa munsantu. Cidi mwa . . . Aci cidi—aci cidi anu cîmpè, bikengela bwa kudilumbululabo bwabo bôbô biine. Anu mûngâmbì ne, kuteeta . . .

¹⁶⁹ Bantu badi bateeta kuwwija Nzambi ciikaaku kampanda cya cinene, cikulakaji, cinene cya katanku, cya dinanga dya cibwite kwîsù aci, nwamonu’s, ciikâle ne musùmbà wa twikùlù, twenze menemene anu mudi tu-Rickys ne tu-Elvis amu, ne: “Katwena ne ciditu mwa kwenzelangana cya cibi to.”

¹⁷⁰ Nzambi Yéyè to! Yéyè katu ne biikùlù to. Yéyè n’Taatù. Bikengela kulediibwa cyakabidi! Kî ncimuntu cya dinanga dya cibvwite kwîsù to.

¹⁷¹ Yéye n’Nzambi wa cilumbulwidi. Bible udi wamba ne ki cidiYe. Ciji Cyende cikole ncyâ cidya mici. Kwikadi wâdyatakaja Cyôcì aci kadi kushaala mutekemene ne bwîmpè bwa Nzambi dîngà dituku nebukwangate, mu mpekaatu webe awu, bwa kakufila mu Dyulu to. Bu Yéyè mwa kwikala mwenze aci, Yéyè nunku’s mmufwe luse byônsò ebi, ne mwangate Eva. Anyi newitabuuje Dîyì Dyende, anyi newikale . . . neubutuke. Nenku paudi witabuuya Dîyì Dyende, Cimanyinu neciikale pambidi peebe. Uh-huh.

¹⁷² Lufu lukaavwa pabwîpì ne kutuuta Ejipitu bufuku abu, pa dîbà kana dyônsò. Civwa ncikondo cya cikwacisha bwôwà; dyenza dya mishingà yabo yônsò adi, matuku abo ônsò a mafesto awu, ne matuku a dijila dya byakudya awu.

¹⁷³ Nzambi ukaavwa mubamwenekele. Nzambi ukaavwa muleeje bimanyinu Byende binene ne maalu a kukema munkaci mwabo. Ncinyi ciine aci? Mpindyewu anji imanaayi kakese. Nzambi ukaavwa mubaleeje ngâsà Wende. Ùvwa mubape mpunga.

¹⁷⁴ Kabavwaku mwa kuCidyombola to. Bavwa bamba ne: “Kaa, aci kacyenaku ne bwa nsongo bwine to. S’ndukutukutu. S’ncintu kampanda mu bibila mwamwa, muvwa mwenzeke difûkuka kampanda dya—dya bitoci bikunze bipatukamu biya muulu, s’ki cidi cyenze ne mbû ashaale mukunze.” Pashiishe mabwe a mvula kulwawu. Pashiishe ndimba kulwayi. Nzambi

ukaavwa mulongolole mwaba, ne muteeke Dîyì Dyende mukana mwa muprofeta kampanda. Ne civwa yéyè ewu wamba, cìvwà cyenzeka, ne bôbò bacimona. Kabavwaku mwa kucivila to.

¹⁷⁵ Civwà Môsà ubiikila aci, ki cìvwà Môsà upeta, ucipetela kudi Nzambi, bwalu yéyè uvwa wamba anu Dîyì dya Nzambi. KwambaYe ne: “Nénkuwvijè nzambi kampanda.” Môsà uvwa nzambi kampanda kudibo. Nwamonu anyi? Kabavwa bamanye dishiilangana to, pa nanku Yéyè kwamba ne: “Wewè newikale nzambi kampanda, ne Aalona neikale muprofeta webe. Wamonu’s, wewè newikale bu nzambi kampanda, bwalu Mêmè nênkwangâtè, dîyì dyebe adi, nenku Némfukè neebe. Mêmè nêngààkulè, bya bantu kabayi mwa kucivilaku to, bwalu anu mwaba awu cidi cyenzeka. Cyûdì wewè wamba aci, necyenzeke.” Kaa, ekelekele! “Mêmè nênkuleejè maalu awu.” Ekelekele! Ne Ejipitu kucimonabo. Kucimonabo anu kumpala kwa dîbà dya dilolo, anyi anu pa dîbà dya dilolo menemene.

¹⁷⁶ KubaleejaYe bwîmpè Bwende. KuleejaYe ne Yéyè uvwa mwa kucymusha, kucyondopa.

¹⁷⁷ Beena majimbu kuteetabo bwa kwenza cintu cimwecimwe aci, batentudi abu. Nutu misangu yônsò anu nubapeta. Kuvwa Yane ne Yambele, kwimanabo mwaba awu. Kadi paakalwabi bwa cintu cilelela, kabavwa naaci to. Ncya bushuwa’s. Bôbò baakalonda, katanci kakese. Kadi paanyima paa katanci, dikutakana dyabo dyakamweneshiibwa.

¹⁷⁸ Ne Bible kêna wambaku ne cintu cimwecimwe aci necyenzeke mu matuku a ndekeelu ne, “anu muvwa Yane ne Yambele bakandameene Môsà amu” anyi? Kadi’s dikutakana dyabo dyakamweneshiibwa, nenku ki mwenzekabi cyakabidi. Nwamonu anyi? S’ki cyôci aci, bantu baa meeji manyanguke, mooneke pa bidi bitangila Bulelela, Bwalu bwena dììnà. Mbafwanyine kwikala ne masangisha ne bintu binene, binene, bitumbuke, binene menemene bilengeja ne bilòngò, kadi ndekeelu wa byônsò dîbà nedilwe.

¹⁷⁹ Imanaayi kamungulu ne Cimanyinu aci! Ki cidi Nzambi muswe bwa twêtù kwenza. Shaalaayi bakwate ku Dîyì Dyende. KanuumukuKu to. Shaalayi anu naaDi. Ki cidi Bible mwambe.

¹⁸⁰ Lufu luvwa munkaci mwa kutuuta. Nzambi ukaavwa mubaleeja luse, mubaleeje makole ne bimanyinu.

¹⁸¹ Mpindyewu twänjâàyi kwimanaku bwa kasunsa kamwe anyi tubidi cyanaana, pa ntanku wawa. Twelanganaayiku anu meeji cyanaana mundamunda, kale wawa, cyakalayaYe ne necyenzeke mu matuku a ndekeelu. Ndi ndikonka ní katwenaku pabwípì, twêtù peetu. Nwamonu anyi?

¹⁸² Yéyè ukaavwa mwenze bintu byônsò ebi, kadi bôbò bavwa anu bajinga bwa kubenga kunyingalala, anyi kwitabuuja mukenji wa dituku adi. Kabavwa anu baswe kucyenza to,

nansha muvwaci cileejiibwe patooke kumpala kwabo amu, ne cimanyishiibwe anu mu bulelala.

¹⁸³ Kadi panudi numona bintu bya mushindu awu byenzeka, s'ncimanyinu cya cilumbulwidi cìlwalwà's. Cilumbulwidi ncyalonda bintu abi. Citu misangu yônsò anu cicìlondèlonde, ne eci kacyakwikala cya tushiya ku luseke to. Nwamonu anyi? Cilumbulwidi ncitù cilonda ngâsà. Padi luse lubengiibwa ku maditambishi, kakwena cidi cishaala to anu cilumbulwidi. Pa nanku cyôcì ki cyàlondà misangu yônsò.

¹⁸⁴ Mpindyewu, cyalu aci. Bwalu bwônsò bwa mu nyuma bütù bwènzekà ebu bütù ncimanyinu cya kudi Nzambi. Nwatapaayi ntaala nwadimuka. Nwatabaleelaayi cyôcì aci, nwamonu's. Tangilaayi, bwalu bwônsò bwa mu nyuma bütù bwènzekà ebu, cintu cyônsò cìtù cyènzekà eci, cìtù ncimanyinu. Twétù katwena mwaba ewu ku mpuukapuuka to. Maalu aa kaena enzeka anu ku mpuukapuuka cyanaana to. Ncimanyinu, bwa kuya—bwa kuya ku mwaba wa dikubiibwa, ne lukasa lwônsò. Noa uvwa cimanyinu bwa baa lwende yéyè; Yone uvwa cimanyinu bwa baa lwende yéyè. Nwamonu anyi? Bintu byônsò, Mukenji wa dîbà, ncimanyinu. Ikalaayi baWutabaleele, tangilaayi cidiWu wenza. Nwamonu anyi? Ncimanyinu. Kantu ne kantu kadi anu ne dyumvwija kampanda.

¹⁸⁵ Nenku kakuvwaku cikondo cikwabo kampanda cìvwà Mukenji wa mushindu ewu mufwanyine kwenzeka to. Kawuvwaku mwa kwikala mulwe mu dituku dya Luther to, kawuvwaku mwa kwikala mulwe mu dituku dya Wesley to, kawuvwaku nansha mene mwa kulwa mu dituku dya Mpenta nansha. Kawuvwaku mwa kulwa nansha. Nwamonu anyi? Kakwenaku...kakütukù cintu bu nanku cyenzeke to, kadi peetu's mbatulaye mu Bible. Nwamonu anyi? Tukaadi ku nshiikidilu. Cintu nansha cimwe kacivwaku cifwanyine kwenzeka to, kacivwaku cifwanyine kwikala cyenzeke to too ne dîbà edi. Ne cyôcì cidi munkaci mwa kwenzeka bu cimanyinu. Nudi nudikonka ne ncimanyinu cya cinyi?

¹⁸⁶ Kaa, nwêñù baakunyi baanyi, mwaneetu wa balume, mwaneetu wa bakaji, bwelaayi mwinshi mwa Cimanyinu aci, ne lukasa lwônsò. Nwamonu anyi? Kwangaciku, kwangaciku mupinganyi to. Kudidingi, kudidingi, kudidingi, kudidingi wêñzakù aci to. Wamonu anyi? Kudidingi wadifwanyikijilaCi cyanàànà to. Shaala wêwè anu mwaba awu too ne paudi umanya ne Cimanyinu aci cyâtéekiibu, too ne piìkalà (wêwè mujima) meeji avwa munda mwa Kilisto awu miikâle munda mwebe, too ne piìkalà lukutukutu lwônsò lwa pa buloba luye, wamonu's, too ne piìkalà dijinga dijima dya mwoyi webe dishaale anu Yéyè. Nwamonu anyi? Aci, dîbà adi, udi umanya, dîbà adi udi umanya ne cintu kampanda cidi munkaci mwa kwenzeka. Yesu wakamba ne: "Bimanyinu ebi nebifile badi

biitabuuja,” kî mbeena kwitabuuja baa budìngìbudìngì to, kadi beena kwitabuuja. Nwamonu anyi? Mpindyewu, katwena baswe kunaya ne mudilu to nansha kakese, pa bwalu abu; kwêna ne cya kucyenza to.

¹⁸⁷ Mukenji wa dîbà ncimanyishilu kudi maekeleesiya. Ncimanyishilu kudi bantu. Kanwikadi...Nudiku, nudiku nucyumvwa anyi? [Disangisha didi dyamba ne: “Amen.”—Muf.] Ndi ntekemena ne, pa mukaba wa mêtì, badi benza cintu cyôcì cimwecimwe aci, nwamonu’s, ne mu bitupa bikwabo bya buloba. Nwamonu’s, cimanyishilu cya dîbà cidi mwaba ewu. Kudi Cimanyinu cidi cikengela kuteeka, ne kakuvwaku cîngâ cikondo civwaCi cifwanyine kwikala cilwe to.

¹⁸⁸ Monaayi didilongolola divwa Nzambi mufile bwa ciine cikondo aci. Mpindyewu, bu mutudi bamanye ne Bible mmwambe ne: “Maalu ônsò awu akenzeka bu bileejilu, nwamonu’s, kutudi twêtù.” Monaayi ne, pakaavwa Nzambi mudilongolole bwa kulumbulwisha Ejipitu, Yêyè wakanji dyambedi kufila didilongolola. CyàkanjìYe kwenza dyambedi ncinganyi? Yêyè kacya katu ushintululaku ndongamu Wende to.

¹⁸⁹ Musangu wa kumpala, paakamanaYe, paakenzaYe didilongolola Dyende adi, Wàkatùma muprefeta ne mukenji. Cintu cya kumpala cyakenzelaYe cisamba Cyende civwa ncya kutuma muprefeta ne mukenji.

¹⁹⁰ Cintu cyàkalondà cyakenzaYe, bwa kumanyishisha mwine muprefeta ewu, Wàkatùma Dikunji dya Kapya bu dimanyishiibwa, bwa kucimanyishisha.

¹⁹¹ Nenku cintu ciisâtù cyakatumaYe civwa ncimanyinu. Aci ncya bushuwa menemene. Cimanyinu, cimanyinu civwa cyumvwija cinyi? Ditwishiibwa!

¹⁹² Dyambedi, muprefeta Wende mwikàle ne mukenji; kudimanyishaYe Yêyè mwine munkaci mwa...ku—ku Dikunji dya Kapya ne ku muprefeta Wende; pashiishe kutumaYe cimanyinu, bwa kuditeekabo mwinshi mwa mashì aa, cya ne Yêyè uvwa mwitabe lufu lwa mupinganyi ewu pa kaaba keebe. Pashiishe, mashì avwa ncimanyinu cya ne Yêyè wakatangila, ne wêwê wâkatèeleja mukenji, wâkiitabuuja Dikunji dya Kapya, ne wâkiitaba mupinganyi wâkakulongwelàYe awu, ne wêwê uvwa usanganyiibwa mwinshi mwa mwengungù wà mashì mwine wa mwoyi wâkapàtukà bwebe wêwê awu. Ekelekele! Ncintu kaayi cipwangane, ncintu kaayi cipwangane aci’s we, nwamonu’s, wêwê udi mwinshi mwa mashì.

¹⁹³ Mpindyewu udi mwinshi mwa Nyuma, mwinshi mwa Nyuma Mwîmpè. Nwamonu anyi? Nwamonu anyi? Udi mwitabuuje Mukenji wa dituku, wamonu’s, udi mwitabuuje bu—bu—bu—bu—bukole, Dikunji dya—dya—dya Kapya. Udi mwitabuuje Cyôcì aci, wamonu’s, ne udi witabuuja.

¹⁹⁴ Mpindyewu, mpindyewu tangilaayi, kuWitabuuja cyanaana kî nkukumbane to. Kî nku—nku...Bwa kwikalà kwendela mwaba udiWu awu, kî nkukumbane to. Wamonus, aku nkudivwija wêwè mwine mutambe kubiipa: “Bwalu ewu udi mumanye mwa kwenza cidi cîmpè, kadi kayi ucyenzo to, bwende yéyé mmpekaatu.” Nwamonu’s, beena kwitabuuja baa ku mikalu abu, Yesu wakamba cintu cyôcì cimwecimwe aci.

¹⁹⁵ Ebelu, nshapita mwi6: “Bwalu kabyena mwa kwenzeka to bwa aba bakaavwa bamana kukenkeshila musangu kampanda, ne bavwijibwe baabanyanganyi baa Nyuma Mwîmpè, ne balabule Dîyì dîmpè dya Nzambi, ne buloba büçilwalwà, bôbò badishinde, bwa kudyalujululabo cyakabidi ku kanyinganyinga; bu mudibo bapoopela bwabo bôbò biine Mwânà wa Nzambi pa nkuruse; ne biikâle bàbala cipungidi cya Mashi, ciine civwabo bajidiibweku aci...” Mwengùngù udi ujidila. Wôwò awu kî ngudi Cimanyinu to. Mashi kî ngâdì Cimanyinu bwa mpindyewu to. Mwoyi ngûdì Cimanyinu.

¹⁹⁶ Mwoyi kawuvwa mwa kwikalà kwaka to, bwalu civwa nnyama. Mwengùngù awu ngùvwà cimanyinu, bivwa bikengela bwa wêwè kwikalà ne mashi etu a cya bushuwa aa malaaba ku ciibi. Kadi bwa mpindyewu n’Nyuma Mwîmpè. Netukufike, anu mu katanci kakese emu, bwa kujaadika cyôcì aci, nwamonu’s. Mwoyi ngûdì Cimanyinu.

¹⁹⁷ Mwoyi webe wêwè mmuye, ne wêwè ukààdi mufwe, ne mwoyi webe ùkaadi mufwe. Wêwè udi musokoka mu Nzambi, kupicila ku Kilisto, ne mutwibwemu citampi kudi Nyuma Mwîmpè. Meeji avwa munda mwa Kilisto adi munda mwebe. Ne Kilisto, ne Bible, ne Dîyì, bidi cintu cimwe. “Ku cibangidilu kwakadi Dîyì, ne Dîyì dyakadi ne Nzambi, ne Dîyì dyakadi Nzambi.” Dibà adi wêwè, ne Dîyì, ne Nzambi, ne Kilisto, nudi cintu cimwe. “Nenku nwénù basòmbèle munda Mwanyi, ne Dîyì Dyanyi munda mwenu, nulombe cinwaswa aci, necyenjibwe.” Nwamonu anyi?

¹⁹⁸ Yéyé wakeela bucole anu mu mishiku ya Môsà menemene amu, bwa kupatuka kuyaye kuntwaku ne Dîyì Dyende bwa kwakulaye, ne ndimba yilwa; wàkula, ndimba yumuka; wàkula, nkùsù yilwa; wàkula, mwoyi—nkùsù yumuka. Amen!

¹⁹⁹ Kadi pashiishe mpààkalòmbiibwà cimanyinu kudi Izaleela yônsò. Izaleela yônsò musanga ntete wakalombiibwa cimanyinu eci. “Nenku pâNgààmònà cimanyinu, Némpicilè pamutu peenu.” Kaa, ekelekele! ekelekele! Ditwishiibwa kaayipu’s we!

²⁰⁰ Izaleela mwikâle upatuka mu Ejipitu, ûvwa ncimfwanyi, mubidi wa bwalu ndeelu ewu. Ejipitu uvwa ng’ekeléeziya, ne Izaleela uvwa uléeja Mukaji-musela. Nenku anu muvwa Izaleela upatuka mu Ejipitu amu, ki mudi kabidi Mukaji-musela upatuka mu ekelezeziya. Nwamonu anyi? Bwalu, bikengela kwikalà cintu kampanda mwaba awu cidiYe ne cya

kupatukamu, nenku bidi bikengela bwa Yéyè kupatukamu, pa nanku, piikalabi ne civwa ncimfwanyi. Ekeleesiya udi—udi usanganyiibwa mu Ejipitu, mu maalu a pa buloba ne mu mpekaatu, ne kêna ucyukaku nansha—nansha—nansha kakese bwa Cimanyinu cyenu ciine aci to. Kabeena nansha baCiitabuuja mene to. Kadi Izaleela yéyè wakacinanga, bwalu civwa ndupandu kudibo. Kaa! Kaa! S'bivwa bikengela kutuvwijaci ne disanka's, s'bivwa bikengela kuvwijaci myoyi yetu...Kaa!

²⁰¹ Citèèkaayi's, ekeleesiya! Mpindyewu kanupangidiku to. NenuCitèèka mpidyewu anyi? Kanudidingi, kanudidingi, kanudidingiku nwâlekela dîbà dibwela to. Kanudidingi, kanudidingi, kanudidingi, kanudidingiku nwâpeta diikisha to, nî mmuunya nî mbufuku. Kanudidingiku nwanaya ne mudilu to. Abi kabyakukumbanaku to, bânà wetu. Kabyakukumbanaku to. Nudi ne cya kwikala ne Cimanyinu!

²⁰² Wêwè udi wamba ne: “Mêmè ndi mwitatuuje. Eyowa, ndi nya. Mêmè, eyowa, ndi mwitatuuje Mukenji. Ndi...” Aci neya bushuwa, kadi, aci—aci's cidi anu cîmpè.

²⁰³ Kadi udi ne cya kwikala ne Cimanyinu! Nudi bateeleje anyi, nwénù beena Branham Tabernacle? Udi ne cya kwikala ne Cimanyinu aci cileeja patooke! Kuyi naaCi to, diitabuuja dyebe dyônsò diine adi didi cyanaana. Nwamonu anyi? Newikale ne nsòmbelu mwîmpè; udi uteeleja cidi Dîyi dyamba; udi uya mu ekeleesiya; udi uditacisha bwa kwikala ne nsòmbelu mujaalame; abi bidi anu bilenga, kadi aci kî n'Cyôci to. “PâNgàämònà Mashi,” ki Cimanyinu neyôcì aci. Ne Cimanyinu mwaba ewu kacyena...

²⁰⁴ Bwalu, cidi, bivwa bikengela bwa Yéyè—Yéyè kumona mwengùngù wa cya bushuwa awu, bwalu mwoyi ukaavwa muye, yéyè...ükaavwa mushiyangane naawu, bu muvwaye nyama.

²⁰⁵ Kadi apa Cidi m'Mwoyi Wende Yéyè mwine ùvwà mu Mashi awu. Ne mwengùngù uvwa anu cimanyishi cyanaana anyi cimanyishilu cya dijidiibwa, kadi Mwoyi Wôwò mwine ki Cimanyinu; bwalu kakuyi ditengudiibwa to, kakuyi Cimanyinu to, wêwè kwêna nanshà mu cipungidi to. Cintu cyônsò mu kaabujima cidi cikwata mudimu pamwe. Wêwè wamba ne udi mutengudiibwe ku Dîyi, ne anu Dyôdì nkaayaadi, dîbà adi's newitabuuje Dîyi; pawikala witabuuja Dîyi, dîbà adi's bidi bikengela bwa Cimanyinu kulwaci, bwalu yéyè mmwambe ne: “Nyingalalaayi, nubatijiibwe muntu ne muntu wa kunudi mu Dînà dya Yesu Kilisto bwa dilekelediibwa dya mpekaatu, nenku nenupete kupà kwa Nyuma Mwîmpè.” Ki bwalu mbwabu's. Kaa, ekelekele!

²⁰⁶ Monaayi dîbà adi didilongolola bwa cisamba Cyende cya buloba bulaya aci. Monaayi cyakenzaYe. Dyambedi, Yéyè uvwa ne cisamba cikaavwaYe mwenzele buloba kampanda. Üvwa

mubalongolwele buloba kampanda. Nenku mpindyewu Yéyè kutuma didilongolola kampanda ku ciine aci, bwa cisamba cya buloba bulaya aci. Civwa anu bwa aba bàkaavwà badyanjila kulongololwela bwine buloba bulaya abu, dituku dya Mukaji-musela. Ne mushindu wàkacyéñzà Ye, Yéyè wakatuma muprofeta mwikàle ne mukenji, ucimanyishila ku Dikunji dya Kapya, ufila cimanyinu cya ne bavwa mwa kushala ne myoyi mituuje ne civwa ncyə bushuwa. S'ncya bushuwa. Civwa mbusambi bwa cisamba aci.

²⁰⁷ Izaleela, upatuka mu Ejipitu mwine musangu awu, civwa nci-ncimfwanyi. Eci mmubidi wa bwalu, wa Ekeleesiya mwikàle upatuka mu mangumba. Mpindyewu, kì mbwena kwamba ne ànu yônsò yidi midyéñzè mangumba eyi to. Mémè ndi njinga kwamba Mukaji-musela. Nwamonu anyi? Bamwe bantu, kudi bamwe baa ku badi badiikàdile kadi biikale babi anu mudi mangumba amu, misangu mikwabo babi kupita ne piine apu.

²⁰⁸ Mémè ndi ngaakula bwa Cimanyinu cidi citeekiibwe. Cimanyinu cidi cipetangana ne Diyì dyônsò. Nwamonu anyi? Bidi bikengela anu bipetangane, bwalu Cidi Diyì. Cidi m'Mwoyi uvwa munda mwa Diyì. "Méyì Àànyi ngaa Nyuma; Ádi Mwoyi," mwàkambà Yesu. Nwamonu anyi?

²⁰⁹ Pààkabangà Môsà mudimu wende wa bwambi mu Izaleela, ne bimanyinu binene, nudi numona's, ne lukasa lwônsò Izaleela wakadisanga umukila myaba yônsò mu Ejipitu, kulwa mu Goshen, baalukila batangile kwabo kubalela, bwalu bavwa bamanye ne cintu kampanda civwa pabwîpì ne kwenzeka. Kaa, ncimfwanyi kaayipu's we!

Kaa, badi bafumina ku Esete ne ku Wesete,
 Badi bafumina ku malaba a kule, (Neya
 bushuwa, nukaadi bumvwe musambu awu.)
 Bwa kwenza fête ne Mfumu, bwa kudya bu
 babikiidiibwe Bende;
 Mushindu mwine udi beena lwendu aba
 babeneshiibwe's we!
 Bàbandila mpala Wende mujidila
 Udi ubàlakana ne dinanga dya Nzambi awu;
 Baabanyanganyi babenesha baa ngâsà Wende,
 Bwa kubàlakanabò bu mabwe a mushinga
 mukole a ku cifulu Cyende cya butumbi.

Kaa, Yesu ùlwålwa kataataka,
 Dibà adi mateeta etu neajike.
 Kaa, kadi bu byôbì bikengela bwa Mukalenge
 wetu alwe pa dibà edi
 Ùlwila aba badi buumuke ku bupika bwa
 mpekaatu?

Kaa, ncifwanyine kukutwadila disanka dîbà
adi,
Anyi tunyinganyinga ne diteketa dikole dya mu
maboko?
Paalwa Mukalenge wetu mu butumbi,
Netutuutakeene Nende muulu mu mpeepele.

²¹⁰ Biikâle tuleeja patooke Cimanyinu aci! “Nenku Mêmè nêmmubìishè ku lufu mu matuku a ndekeelu.” Cya bushuwa’s! S’tukaadi mu miine matuku awu.

²¹¹ Bantu baakaadisangisha mu Goshen. Bavva badilongolole. Bavva bamanye ne cintu kampanda civwa pabwîpì ne kwenzeka. Bavva menemene anu bu mudi . . .

²¹² Angataayi mabata, pakaadibi ne ki cikondo cya dilwa mbimbimbi ncyôcì eci, adi ônsò adisanga lubilu. Mbulubulu, ne bikwabo byônsò, pakaadiyi yidlóngolola, kudi disakiibwa kampanda dìdî diyikoka.

Nyuma Mwîmpè ngudi ukoka bantu!

²¹³ Kaa, pààkalwà cikondo cya ciji cikole cya Nzambi bwa kudikumaci, yônsò . . . Ki mabata abidi àlwâlwà aa, dilume ne dikaji. Ki byôkosò bibidi bìlwalwà ebi, cilume ne cikaji; ki tubalu tubidi túlwalwà etu, kalume ne kakaji; cintu kampanda ciikâle cibikoka, bidyànjila kulongolola. Bikwabo byônsò byakabutuka. Kaa! Bikwabo byônsò’s byakabutuka! Kadi byônsò byàkumvwà dikokiibwa adi bwa kubwela abi, byakamanya ne bwâtù abu bukaavwa bumana kulongolola. Civwa ncimanyinu cya ne kuvwa kulwa mvula. Byakamanya byôbì ne kuvwa kulwa mvula, nansha dileeja dya patooke diikâle cinyi ne nansha meeji avwa bakwabo bantu beela miikâle cinyi. Byôbì byakamanya.

²¹⁴ Kuvwa cintu kampanda munda mwabi amu, civwà cyàmba ne: “Bwelaayi muntu mwamwa, ne lukasa lwônsò! Bwelaayi muntu mwamwa, bwalu mwômò amu ki mwaba umwepele mwìkalà dikubibwa.” Bwalu, Nzambi uvwa mulongolole muprefeta, kutumaYe bwâtù abu bu cimanyinu, wamba ne: “Bwelaayi muntwamu,” nenku mvula uvwa ulwa. Nenku byôbì abi byakabwelamu, ku bibidi ku bibidi. Nyama yônsò yakabwelamu, ku yibidi ku yibidi, mu bwâtù amu, bwalu yiakaavwa mibwele mwinshi mwabu amu. Kayiyi yicyuka civwa mikwabo . . .

²¹⁵ Ne bônsò bavva pambelu paa bwâtù abu baakabutuka. Bônsò bavva pambelu paa cimanyinu, paa mashi, baakabutuka, muntu ne muntu. Nenku yônsò udi pambelu paa Cimanyinu, paa Nyuma Mwîmpè, neabutuke.

²¹⁶ Nansha biikâle bîmpè baa bishi, nansha biikâle bidimba bya ekeleesiya bya bishi! Bavwaku bûngì cyanaana mu matuku a Noa. Bavwaku bûngì cyanaana mu matuku a Môsà; kadi muntu uvwa mupangile bwa kulaaba mashi awu, bu cimanyinu, uvwa, wakabutuka. Aba bààkapangilà bwa kubwela mu bwâtù abu,

baakabutuka. Aba badi bàpangilà bwa kubwela mu Kilisto abu, bwalu's Yéyè ki Bwâtù!

²¹⁷ Kolinto wa Kumpala 12, mmwambe ne: "Ku Nyuma umwe nkutudi bônsò babatijiibwe mu Mubidi umwe." Ùdi musokome awu, kí ng'ekeleesiya to; kadi ngùdi musokome awu, kí mmangumba to; Mubidi musokome wa Yesu Kilisto! "Ku Nyuma umwe" N-y-u-m-a, Nyuma ne dileeta dinene, "nkutudi bônsò biinyijiibwe mu Mubidi umwe." Dibà adi Cimanyinu cidi ku ciibi, bwalu wêwè udi munda mwa Kilisto. Ne Yéyè nguvwa Wôwò awu, Mulambu webe, Yéyè mene wâkapangisha dinyooka awu. Nenku padi Nzambi utangila pa cyôcì aci, Yéyè kénéna mwa kwenza cintu to. Wêwè udi mu dikubiibwa anu dyebe dya menemene edi, bwalu Nzambi ne Kilisto badi Mupersona umwepele, Nyuma mwine wâkavvijiibwa mubidi ne kusòmbela munkaci mwetu awu. Nenku ki Nzambi awu ne Bu Yéyè Bwine, ne nwénù, bânà Bende Yéyè mwine, babwele mu Mubidi awu. S'ki bwalu mbwabu's, kaciyi mwengùngù to, kadi Nyuma! "Némpicile pamutu peenu."

²¹⁸ Baakafumina mu Ejipitu mujima, bwa kudikungwijila mu mwaba umwepele ewu, bwa baamona mwa kwikalabo mwinshi mwa cimanyinu.

²¹⁹ Ne bôbò mbafumine mu ba-Méthodistes, mu ba-Baptistes, mu ba-Prebytériens, mu ba-Luthériens, mu beena Mpenta, ne bikwabo byônsò, bwa kubwelabo mwinshi mwa Cimanyinu. Anu mwakadibi musangu awu menemene!

²²⁰ Dikunji dya Kapya ndivwa dileejijiibwe kuntwaku adi. Nenku muntu wambila mukwende, mukwabo wambila mukwende, mukwabo wambila mukwende, nenku, katanci aka anyi, s'ki bôbò bônsò bààkabangà kulwa aba. Baakabanga kulwa, ne kutangilabo cimanyishilu cya Nzambi. Kwambabo ne: "Cilumbulwidi cikaadi pabwîpì."

²²¹ Pashiishe muprefeta kwambaye ne: "Mêmè ndi muumvwile kudi Nzambi. Nekwikale cimanyinu. Nenku nwénù laabaayi mashi ku ciibi. Nushipe mwânà wa mukooko, nulaabe mashi ku ciibi, nenku aci neciikale cimanyinu, bwalu lufu lukaadi pa kudikuma."

²²² Lekelaayi nnwâmbilè leelu ewu, mêmè bu musadidi Wende ne, padi anu Cimanyinu kaciyi ku ciibi to, kudi lufu lwa mu nyuma lwìkalà mwa kudikuma. Ne maekeléeziya ônsò adi ààlukila mmatangile ku-ku nsangilu awu, ku Nsangilu wa Maekeleesiya wa Buloba bujima awu. Badi bônsò munkaci mwa kwalukila batangile ku cyena Katolike. Nenku anu aba badi bashuwashuwale, balediibwe cyakabidi abu, ki baashaala pambelu!

²²³ Vulukaayi ne, kí mmangumba enu a beena Mpenta awu to, bwalu ôwò awu akaadimu. Bidi bileeja ne akaadi mafwe! Akaadi mabutuke. Akaadi mafidiibwe bu mulambu. Akaadi maalukile

cyanyima. Akaadi maMwele pambelu paa ciibi, kadi Yêyè udi ukeba bwa kumona Cimanyinu. Bwalu bôbò, cintu cimwepele civwabo beeyemene ndyakula dya mu myakulu.

²²⁴ Wêwè kweyemenyiku dyakula dya mu myakulu, anyi cikwabo cintu nansha cimwe to. Kadi enza bwa Cimanyinu Cyôcì ciine ciikâlekù, Mupersona wa Yesu Kilisto awu, Mwoyi Wende Yêyè mwine awu munda mwebe. Kutengulu anu *cikampanda*, *cikansanga* to; kadi tengula buumuntu bwebe bujima, too ne pawikala wêwè ne Kilisto bashaale Umwepele. Kilisto udi munda mwebe, ne Mwoyi Wende udimweneshila patooke ku wêwè aku.

²²⁵ Mpindyewu, mpindyewu, bafumina mu Ejipitu mujima! Kadi tangilaayaaku mpindyewu, patudi tumona cyakenzabo aci apa, patudi tumona cikondo cyenda cimweneka apa, twêtù mbatutumine dîyì bwa kwenza cintu cyôcì cimwecimwe aci. Nukaavwaku bamanye aci anyi? Tangila numonaayi cyàkambà muprofeta.

²²⁶ Nenku netwikale mwa kubala mpindyewu, panwikala baswe kubala, mmu Ebelu nshapita wa 10. Nenku panwikala baswe kubala pamwe naanyi, ndi muswe kubala mvensa umwe anyi yibidi mwaba ewu kumpala kwa twêtù kutungunuka. Ebelu nshapita wa 10, nenku tubangilaayi ku mvensa wa 26 wa nshapita wa 10 wa Ebelu. To, ndi... Twânjìbi kumona tûng. Eyowa. Eyowa's, mukalenge! Ebelu, nshapita wa 10, ku mvensa wa 26, nwamonus.

*Bwalu twêtù twenza mpekaatu ku bukole paanyima
paa twêtù bamane kupeta...*

²²⁷ Twânjìbi kumona tûng, ndi mucyângâté mu cyôcì anyi? Eyowa. Nyca bushuwa. Eyowa.

*...twêtù twenza mpekaatu ku bukole paanyima
paa...twêtù bamane kupeta dimanya dya bulelela,
kakweana kushaala kabidi mulambu bwa mpekaatu to.*

*Kadi anu dindila ditwishiibwa didi dikwacisha
bwôwà dya cilumbulwidi aci, ciji cya cilakuka kapya
aci, cyabutula mulwishi.*

*Tangilaayi kuneeku! Ewu uvwa upeetula mikensi ya
Môsà uvwa ufwa kakuyi luse to ku bujaadiki bwa
bantemu babidi anyi basatu;*

*...ambaayi tûng ne ndinyooka ditambe kwikal
dikole dya mushindu kaayi, nansha nanku, munudi
nucinka, dyebiibwe meeji ne ndikumbanyine ewu udi
mudyatakaje mwinshi mwa dikâsà— mwinshi mwa
dikâsà Mwânà wa Nzambi, ne...mubale...cipungidi
cya mashi...kudiye mujidiibwe aku, bu cintu cidi
kaciyi cya cijila, ne mwenze kayi utanga Nyuma wa
ngâsà udi mufumine ku Mashi awu?*

²²⁸ Mwambi, cidimba, muntu mwîmpè, muntu wa nsòmbelu mulenga, cyônsò cyûdì aci, cibì udi mumanye ne Nzambi ukaadi mukutuule ku mfwanka. Nwénù bakaji, wéwè udi mumanye ne Yéyè ukaadi mukutuule ku tuputulu, ne ku—ne ku nsuki mîpì, ne bikwabo byônsò, ku... Udi mumanye ne Yéyè ngudi mwenze aci. Kadi pashiishe wêwè mukudimuke mudyombole, ne mubale Mashi a cipungidi awu, bu ne Adi, “cintu cidi kaciyi cya cijila,” Yéyè mwine wâkakujidila ne mukufikishe too ne mwaba ewu awu!

²²⁹ Bu muvwa batentekedi abu, piikalabi ne baakalwa too ne ku mukalu eku, ne baakatangila, ne kwamba ne: “Ee, ndi mumanye ne buloba abu budiku, kadi cipumbishi ncipite bunene. Twêtù tudi tumweka anu bu tupasu,” s’baakabutukila mu cipeela. Beena kwitabuuja baa ku mikalu!

²³⁰ Kulu anu too ne *apa* nunku, wamba ne: “Ndi mwitatuuje Mukenji” to. Tumikila musanjeela. Bwela munda mwa Kilisto! Wéwè udi wamba ne: “Ee, s’ndi ngiitabuuja Díyì dyônsò didi dyàmbiibwà’s, Mwaneetu Branham.” Aci’s ncîmpè, kadi aci cidi anu—aci cidi anu kwikala mumanye mwa kubala cyanaana.

²³¹ Angata Mukenji, uWubweje munda mwa mwoyi webe, bwa wikale ne cya kupeta Cimanyinu, bwa Mwoyi mwine uvwa munda mwa Kilisto awu wikale munda mwebe. “Pângààmònà Cyôcì aci, Nêmpicilè pamutu peebe.”

²³² Patudi tumona bimanyinu binene bya cikondo cya ku nshiikidilu pa buloba leelu ewu, tudi tumanya ne ncyá bushuwa. Mpindyewu tangilaayi, mêmè mvwa mwindile ciine eci, kukaadi ntanta mule, mule, bwa kunutwadila Mukenji ewu. Nwamonu anyi? Nenku nwamonu bimanyinu bya cikondo cya ku nshiikidilu. Ne mêmè ngänüyiishìWu, ne ngänüleejìWu, ku byônsò byakamba Kilisto. Mmwômò anyi? [Disangisha didi dyamba ne: “Amen.”—Muf.] Nudi nwitaba aci anyi? [“Amen.”] Tukaadi ku cikondo cya ku nshiikidilu. Ncyêna mmona cidi cishaale to.

²³³ Wéwè udi wamba ne: “Kadi bishi bwa cimanyinu cya nyama wa lwonji?” Aba badi babenga Nyuma Mwimpè bakaadi bamane kutwibwa cimanyinu aci kudi nyama wa lwonji. Dinyooka nedishiishe kulwa paanyima. Nwamonu anyi?

²³⁴ Mu Izaleela, pavwa mpungi udila mu cidimu cya Disanka, muntu yônsò... Nudi numona Kilisto, mu dibala dya cyôcì aci anyi? Yéyè wâkabala anu cyabibidi cimwe cyaci, bwalu anu cyabibidi cimwe cyaci ncivwa cikumbanangana ne ciine cikondo aci. Nwamonu anyi? “Yéyè mmuNtume bwa kwondopa beena myoyi micibuluke, kuyiisha disungidiiibwa,” ne bikwabo, nwamonu’s, kadi, Yéyè, “ne cidimu cya ngâsà cya Mukalenge.” Cikwabo citupa aci, Yéyè kaakabalaku—Yéyè kaakacibalaku to; Wâkatèèka Mukanda muvunga awu pansi, bwalu aci ncyá

dituku edi. Nwamonu anyi? Yéyè wàkabala anu citupa cyaci, citupa cìvwà bwa dituku Dyende aci.

²³⁵ Mpindyewu eci nciikalaYe mwa kwenza leelu ewu. Eci ncidiYe munkaci mwa kwakula, wakwila ku Nyuma Wende mulaaba, wambila ekeleesiya leelu ewu: Mpindyewu ki dyôdî dîbâ adi. Mpindyewu ki cyôcî cikondo aci. Cyâkidilaayi, nwênu cisamba. Cyâkidilaayi!

²³⁶ Cinyi? Tudi tumona bikondo binene bya nshiikidilu, makénkè makunze àdì àpòdfa, myaba yônsò. Pa bufuki, tudi tumona bufuki buteemesha bukénkè bùdì bùpòdfa ne: "Cikondo cikaadi pabwîpi." Tudi tucimona pa ekeleesiya, citeemesha bukénkè bùdì bùpòdfa. Yéyè ukaadi mupiishiibwe. "Cikondo cikaadi pabwîpi." Ùkaadi mu maalu a pa buloba. Tudi tucimona pa—pa maulu, pa mbû, pa matunga, pa myaba yônsò; mu dîbâ, mu ngondo, mu mitooto. Bimanyinu!

²³⁷ Tudi tumona bimanyinu bya cikondo cya ku nshiikidilu bya Nyuma Mwîmpè mwalukile pa bantu. Anu mwakadibi mu matuku a Lota, mushindu wakawacila Nyuma Mwîmpè mudimu mu mubidi wa buntu awu kuntu kwaka, ûvwa n'Nzambi mumweneshiibwe mu mubidi. Mushindu uvwa Nzambi mwa kudikwacila mudimu Yéyè mwine mu—Yéyè mwine mu Mukaji'Ende musela mu dituku adi, ne kuleeja cimanyinu cimwecimwe aci, Yesu mmwambe ne neciikale cintu cimwecimwe aci mu matuku a ndekeelu. Nyewu tucimona. Tudi tumona Dikunji dya Kapya dimwedimwe adi. Nansha maalu a mamanya mmaDikwate fôtô, ne bikwabo. Tudi tumona ne bimanyinu bya cikondo cya ku nshiikidilu bikaadi pabwîpi. Tudi bamanye ne bikaadipu.

²³⁸ Nenku dîbâ adi, pa kumona cyôcî eci, panwikala nungitabuuja! Panwikala kanuyi nungitabuuja mêmè to, itabuuyaayi bimanyinu, itabuuyaayi Dîyi, bwalu byôbi mbìdî byamba cîndî mêmè nnwambila aci. Bu nciyi nnwambila Bulelela to, kabivwaku mwa kwakula bifila dyandamuna to. Nzambi kaadyakufidilaku mashimi bujaadiki to. Nzambi utu ufidila anu Bulelela bujaadiki. Ne Même aa adi afila bujaadiki bwa ne ndi nnwambila Bulelela. Ówò awu ngàdî afila bujaadiki bwa Mukenji wûndî munkaci mwa kuyiisha ewu. Kî ng'anu Mwanjelo ku musulu kwaka dituku adi, wâkamba ne, "Mukenji webe newudyanjidile Dilwa diibîdi dya Kilisto" to, byenzedi byôbì biine! Panwikala kanuyi mwa kwitabuuja ne Mwanjelo awu mmwambe Bulelela to, itabuuyaayi byenzedi, bwalu Bible mmwambe ne bintu ebi nebyenzeke ku cikondo cya ku nshiikidilu. Byôbì mbidi bifila bujaadiki. Byôbì mbidi byakula ne dîyi dikole kupita mêtì aanyi mêmè anyi a nî nganyi mukwabo yônsò. N'Dîyi Dyende Yéyè. Byôbì mbidi bifila bujaadiki bwa cikondo.

²³⁹ Nenku nyewu tumona bimanyinu binene, bìdì bìkwàcishà bwôwa ebi pa bantu, ne bimanyinu bya cikondo, pa buloba, dikenga munkaci mwa matunga.

²⁴⁰ Tudi tumona Izaleela mu buloba bwende. Dibendela adi, dya Davidi dya Mutooto wa matumba asambombo adi, dipeepa, dibendela dya kale ku ônsò pa buloba, dibendela dya kale ku ônsò pa buloba. Yéyè ukaadi ditunga. Ùkaadi bukalenge. Ùkaadi cisamba cyende yéyè mwine. Ùkaadi mu Nsangilu wa bukwamatunga. Yéyè, ùkaadi, ùkaadi bintu byônsò ebi. Ùkaadi mu O.N.U. Ne yéyè ukaadi ne lwende lupetu, bintu byônsò. Yesu wàkamba ne: "Lukongo elu kalwakujika bintu byônsò kabiyi byûle to." Nenku, vulukaayi ne, bufuku bumwebumwe bwàkavvijiibwà Izaleela ditunga abu, mbwôbù bufuku abu mene bwakammwenekela Mwanjelo wa Mukalenge kuntu kwaka. Ncya bushuwa. Kî mwaba utudi bônsò awu.

²⁴¹ Bintu byônsò mbifunkunyibwe anu ne m'Bulelala bwa menemene. Ncitu munushimeku to. Ndi munwàmbile Bulelala, ne Nzambi mmufile bujaadiki bwa ne ndi munwàmbile Bulelala. Mpindyewu, vulukaayi ne, mêmè ewu ndi mwaneenu. Ndi muntu, nwamonu's. Ndi muntu anu munudi nwêñù bônsò amu, kadi bikengela bwa kampanda aButwale, bikengela bwa muntu kampanda àBwàmbè. Kacivwa disungula dyanyi mêmè to; civwa disungula Dyende Yéyè. Nenku nganwàmbidi Bulelala, ne Yéyè wàndàmùnù buludi mwikàle ufila bujaadiki ne Cidi m'Bulelala.

²⁴² Patudi tumona bintu ebi pa buloba leelu ewu, kaa, balumyana wa yaaya, dîbà dya ndekeelu's ndyôdì edi. Petaayi Cimanyinu aci pambidi peenu, ne lukasa lwônsò; anyi, nwêñù bwelaayi mu Cimanyinu, bwelaayi mu Cimanyinu. Patudi tumona cimanyinu cinene cya nshiikidilu apa, kabidi cikondo ciikàle pabwîpi, citudimwija ne: "Cikondo cikaadi pabwîpi."

²⁴³ Kaa, angataayi bwalu ebu kakuyi tuseku to! Bivwa bikengela twêtù kwikala banangangane muntu ne mukwende. Kaa, ekelekele! Bivwa bikengela twêtù kwikala mu dinanga dya menemene! Musangu nansha umwe kanwikadiku nwakula bibi muntu bwa mukwende to. Muntu yéyè mwenze cilema, musambidilaayi ne lukasa lwônsò. Tudi pamwe mu cyôcì eci, ne Nzambi. Tudi bânà baa muntu balume ne bakaji. Kaa, ikalaayi ne nsòmbelu wa difwana dya Nzambi. Ikalaayi ne nsòmbelu, ikalaayi ne nsòmbelu bu bânà baa bakaji baa Nzambi, ikalaayi ne nsòmbelu bu bânà baa balume baa Nzambi. Ikalaayi ne nsòmbelu wa kalolo, wa musangeelu, wa didipwekesha.

²⁴⁴ Bubi nansha bukese kabukuvwidu mu meeji to, mu ngeelelu webe wa meeji. Anu, ùbwipâtè anu kubwipata. Bwôbù bukookole ku ciibi cyebe, ùbûmùshè. Amba anu, leeja wêwè anu Cimanyinu cyebe aci, utungunuke anu ne kwenda kuya ne: "Ndi mwinshi mwa Mashi!"

²⁴⁵ Wavuluka ne, kuvwa bààbûngì bàvwà balwe kudi bakaji abu dilolo adi, bamba ne: “È, Gertie, Lillie, bamwe baa kunudi aku, patuka lwâyi apa, tuyaya mu fête dilolo edi.”

²⁴⁶ “Huh-huh! Mêmè ndi mwinshi mwa mashi. Ndi mwinshi mwa cimanyinu, bwa kushaala apa. Dyanyi dinanga didi kudi Mufuki wanyi. Lufu ludi mu ditunga dilolo edi.”

²⁴⁷ Ne lufu ludi mu ditunga leelu ewu. Dinyooka ndindile, ndilembelele. Bombe bwa mushinda, ne bwa hydrogène, ne dikenga dya mishindu yônsò, mbindile matunga.

²⁴⁸ Nenku Nzambi udi munkaci mwa kunyungisha Ekeleезиа Wende, ne mmuleeje byônsò. Tudi bashaale balame Mwânà wa mukooke mpindyewu kukaadi cikondo ndambu, batangile, munkaci mwa kumona cidiYe wenza, tutângila bufuki Bwende ne bikwabo byônsò, kadi patudi twakulangana apa bidi bikengela Cimanyinu citeekiibwe. Bikengela citeekiibwe. Ki cintu cimwepele ncyôcì aci. “Muntu yéyé kayi mulediibwe kudi Nyuma, ne kudi mâyì to, kaakubwelaku to nansha kakese.” Nenku bivwa bikengela kwikala banangangane munkaci mwenu. Bivwa bikengela bwa beena kwitabuuja kwikalabo batapuluke ne maalu a pa buloba. Kanwikadiku nwadidinka kwangata bwalu ebu ne mapeepelela to.

²⁴⁹ Mpindyewu, nwénù bàdì bàtèèlejà Eci, pa mukaba wa mêtì, nwénù bakaji, nwénù balume, teeleejaayiku katanci. Piikalabi ne nutukù bangiitabuuje, NùCítâbùjaayi mpindyewu.

²⁵⁰ Cikondo cyâkànyì cya kulekela dikokangana muntu ne mukwende. Itabuujaayi Mukenji wa Bible! Itabuujaayi Yesu Kilisto! Nenku nunanganganaayi, nutwanganaayi mushinga, ne nuneemekanganaayi muntu ne mukwende. Nwénù balume nuneemekaayi bakaji beenu. Nuneemekaayi mékù enu. Ukungwije díkù dyebe, bwalu, vuluka ne, Mwânà wa mukooke ewu uvwa mbwa díkù, kavwa bwa muntu anu umwepele to; mbwalu díkù dijima, dyôdî paadi, bivwa bikengela kukungwijiibwadi. Bivwa bikengela bwa bintu byônsò kubwejiibwabi munda. Bivwa bikengela bwa twêtù kunangangana munkaci mwetu. Né bivwa bikengela bwa beena kwitabuuja kwikalabo batapuluke ne maalu a pa buloba.

²⁵¹ Monaayi, kabaakalwa kudisangisha anu cyanaana bwa kuyiikilangana pa bidi bitangila mukenji to. Baakadisangisha mbwa kulaababo mashi, bwa kuteeka cimanyinu.

²⁵² Cyôcì aci ki cinudi ne cya kwenza. Mpaasata Neville, ne disangisha edi, balubuludi, balami, nwénù bânà beetu, díbâ dyâkànyì dya twêtù kuteeka ku luseke dikutakana dyônsò dya pa buloba adi, dyâkànyì dya twêtù kuteeka ku luseke bintu bikwabo byônsò abi. Tukaadi babimone bûngì bukumbane mpindyewu, mu mushindu wa bashindike, batwishiibwe. Ne Cimanyinu cidi ne cya kwikala citeekiibwe. Kuyi naaCi to, newikale wa kabutu; udi ne cya kubutuka, ki cintu cimwepele ncyôcì aci.

²⁵³ Kaa, kanwikadi nulwa kudisangisha, nwamba ne: “Ndi muCítàbùùje” to. Bwelaayi mwinshi mwaCi, bwelaayi munda mwaCi! [Méyi a ku cisanji cya tudyomba adi umvwika—Muf.] Nudi nufika ku dicyenza bishi? “Ku Nyuma umwe nkutudi babatijiibwe mu Mubidi wa Yesu Kilisto.” Muntu ne muntu itabuuje, ne mwoyi wende wônsò. Nwamonu anyi? Yéyè kavwa mwambule bujitu bwa nî nganyi yônsò uvwa pambelu kayi mwinshi mwaCi to.

²⁵⁴ Nganyi mwine uvwa wakula awu? [Muntu kampanda udi wamba ne: “Mmêyi a ku cisanji cya tudyomba, Mwaneetu Branham.”—Muf.] Méyi a ku cisanji afumina kuulu anyi? [“Apicila mu cikolokolo.”] Apicila mu cikolokolo. Badi naawu muntwamu anyi? Mêmè mvwa muumvwe kampanda wakula. [“Mwaneetu Branham, ngeela meeji ne avwa mmêyi a ku cisanji mabwelelemu lwà paanyima pààpa.”] Méyi a ku cisanji, eyowa. Kaa, badi—badi bateelejila ku nshinga. Ngeela meeji ne mbangate... Kaa, ku mashinyi? Mfwilaayiku luse. Ndi mumanye ne muntu mmwambe cintu kampanda. Nenku mvwa mwele meeji bu ne muntu kampanda uvwa uswa kungambilà mêmè bwalu, kadi kayi mufike ku dicingambilà to, nudi numona’s, nenku ki bwa cinyi ndi—ndi mwambe cîngâmbì aci. Mvwa munumone nukenzakana. Mêmè kuumvwa dîyì. Mêmè kwela meeji bu ne muntu uvwa mujuuke kuulu bwa kwamba bwalu kampanda, kadi nciyi mumanye ne civwa ncinyi to. Mpindyewu, mpindyewu, twasakidilaayi.

Kadi, itabuujaayi, bwelaayi mwinshi mwaCi!

²⁵⁵ Izaleela kaakadikungwija, kwamba ne: “Tuyaayi bônsò ku Goshen leelu ewu. Netwásààyi lwendu batangile ku Goshen. Bandaayi pa tuumeelu twenu, nenku netwangate ditempu dya ngombe. Nenku netwangate ba-Jones, lwà kuntweku, ne bikwabo, ne—ne ba-Goldbergs, nenku netubande batangile bônsò ku—ku Goshen. Nenku nudi bamanye mudi bwalu anyi? Môsà’s neakule leelu ewu.” Kacivwa aci to. To, mukalenge, mwaneetu! Bwalu budi ne, kubwela mwinshi mwa mashi awu! Eyowa, bushuwa.

Kî nkuyikilanganaPu to; kubwelaMu!

²⁵⁶ Umwe wabo wamba ne: “Udi mumanye’s, Mukalenge Goldberg, ncyá bushuwa ne ndi mumanye ne m’Bulelela.”

²⁵⁷ “Eyowa’s, mwaneetu wa balume, mêmè ndi ngiitabuuja ne m’Bulelela. Ndi mumanye ne m’Bulelela.”

“Mukalenge Lavinski, udi wela peebe meeji bishi pa bwalu abu?”

²⁵⁸ “Cintu’s m’Bulelela bwa kabuyi dyela mpatà! Mêmè’s ndi mumone bukole bwa Yehowah Nzambi bwakula. Ndi mumone ndimba ayi yipatuka mu buloba abu. Ndi mumanye ne kacivwaku cyenzeke to anu too ne paavuye kucyamba, ne ndi

mumanye awu n'Yehowah Nzambi." Mpindyewu, byônsò abi's bidi anu bilenga.

"Wêwè ukààdi mutengudiibwe anyi?"

"Eyowa's, mukalenge!"

"Udi mwena kwitabuuja anyi?"

"Eyowa's, mukalenge!"

²⁵⁹ Nenku pashiishe paakumvwaye Mpaasata Môsà wakula, dituku adi, yéyè kwamba ne: "Kadi bikengela bwa nwêñù kubwelaayi mwinshi mwa mashi awu, bwalu Nzambi mmwambe ne: 'Mashi ncimanyinu.' Ncimanyinu's! Nansha wêwè mwitabuuje bya bishi, nansha wêwè mutengudiibwe bya bishi; ncipungidi civwa Nzambi mupeeshe Abraham, ne bikwabo, aci ncipungidi. Kadi bidi bikengela bwa nwêñù kubwela mwinshi mwa mashi, ki cimanyinu ncycôci aci, bwalu Yéyè mmwambe ne: 'Pângààmònà mashi, Nêmpitè.' Mwena Izaleela, anyi nî nganyi yônsò!"

²⁶⁰ Mmumwe ne wîkale wa mudingumba anyi kayi wa mu dingumba, anyi ewu anyi wawa, udi ne cya kubwela mwinshi mwa Mashi. Méthodiste, Baptiste, Presbytérien, mwena Mpenta, wa kuyi usungulujangana bilondeshile mangumba, cyônsò ciwikala aci, bwalu mbwa kalume nkaaya. Bidi bikengela ubwele mwinshi mwa Mashi. Kadi kwikadi anu wakula bwa Cyôci aci cyanaana to; uCipete! Ikalaayi banteeleje! Ikalaayi banteeleje! Mu Dînà dya Mukalenge, ikalaayi banteeleje! Nwamonu anyi? Bikengela ubwele mwinshi mwa Mashi!

²⁶¹ Yéyè kavwa mwambule bujitu bwa bantu kana bônsò bavva kabayi mwinshi mwa mashi to. Nzambi wakacitookesha ne bônsò bavva kabayi mwinshi mwa mashi bavva babutuka.

²⁶² Ndiku mwa kwamba Méyi Ende anyi? Bônsò badi pambelu paa Kilisto nebabutuke. Udi ubwela munda mwa Kilisto bishi? Kolinto wa Kumpala 12: "Ku Nyuma umwe!"

²⁶³ Kî nne, "ku dilabulangana dimwe dya ku cyanza, ku buumambala bumwe, ku dingumba dimwe" to. Aci's ki cidibo bôbò bateeta kucivwija. Bôbò badi mwa kwenza aci.

²⁶⁴ "Kadi ku Nyuma umwe nkutudi bônsò babatijiibwe mu Mubidi umwe." "Mwanjelo kampanda mufumine mu Dyulu yéyè mulongeshe cintu kampanda cikwabo," mudi Pôlò mwambe, "ediibwe mulawu." S'ki Mukenji ngwôwò awu, bwelaayi munda mwa Kilisto!

²⁶⁵ Tangilaayi, bantu nansha bôbò banganyi pambelu paa cimanyinu, Nzambi kavwaku mwambule abu bujitu to. Ne Nzambi kî mmwambule bujitu bwa muntu nansha umwe to, munene anyi mukese, wa mumanyike anyi kayi mumanyike, mubanji anyi mupele, mupika anyi mudishikamine, mulume anyi mukaji; Yéyè kî mmwambule bujitu bwa nî nganyi nî nganyi

udi kayi mwinshi mwa cipungidi cya Cimanyinu to. Yéyè kí mmwambule bujitu abu to.

²⁶⁶ Wêwè udi wamba ne: “Kadi, Éyì Mukalenge, mêmè ewu’s nkaadiku mwenze *cikampanda*. S’nikaadi mwipate badémons. Mukalenge, s’nikaadiku mwenze *cikansanga*. S’nikaadiku—nkaadiku muysihe Evanjeeliyo.”

²⁶⁷ “Nguumukila kwaka, wêwè mwenji wa bubi. Kacya Ncituku mene mukumanye to.” Yéyè udi umanya anu Cimanyinu.

²⁶⁸ Nudi baCiteeleje anyi? Ambaayi ne: “Amen.” [Disangisha didi dyamba ne: “Amen!”—Muf.] Mpindyewu, pa nanku aci cidi pambidi peenu. Yéyè . . .

²⁶⁹ Musòmbèle pansi mu diit u dituku adi mwab’ewu, ne nsongaalume yidikonka, yamba ne: “Matuku abidi majima ngôwò aa, wêwè kuyi . . .” Ncivwaku mwase nansha nshindi wetu ewu to. Bôbò ne: “Civwa mbwalu kaayi?” Nwamonu’s, ki civwa bwalu ncyôcì aci. Nwamonu anyi?

²⁷⁰ Yéyè ne: “Bélè bôbò bwalu abu pambidi, bôbò.” Yéyè ne: “Wêwè ukaadi mwakule—mwakule Naanyi pa bwalu abu.” Nwamonu anyi? Mpindyewu bwalu abu budi pambidi peenu nwénù. Budi pambidi peenu nwénù.

²⁷¹ Yéyè kaakwitabaku cîngà cintu to anu Cipungidi aci, cya Nyuma Mwîmpè. Ne wêwè kwêna mwa kupeta Cipungidi aci paudi kuyi musungidiibwe, mujidiibwe, ne pashiishe mubatijiibwe mu Mubidi to. Yéyè kaakuciitabaku to.

²⁷² Udi mufwanyine kwikala ne ditentula, udi mufwanyine kudyumvwa bîmpè, ne kutupika *muulu ne pansi*, kwakula mu myakulu, ne kuja maja mu Nyuma. Abi kabyenaku ne dipetangana nansha dya kânà ne Cyôcì aci to. Ikala muCiteeleje, mu Dînà dya Mukalenge! Nzambi kêna witaba abi to. Bampangaanu batu babyenza. Baamwamulopo batu babyenza.

²⁷³ Wêwè udi wamba ne: “Mêmè ndi mumanyi wa dibâla. Ntu ngenza *bikampanda*, *bikansanga*, anyi *bikankenga*.” Bwende Yéyè nansha wêwè mwikâle mumanyi wa dibâla wa bishi. S’ki cidi dyabulu, yéyè pende, wamonu’s.

²⁷⁴ Yéyè udi umanya anu—anu Cimanyinu. Cyôcì aci ki Mukenji wa dibâ edì! Cyôcì aci ki Mukenji wa dituku edì! Cyôcì aci ki Mukenji wa cikondo eci! Mu Dînà dya Yesu Kilisto, Cyâkîdile!

²⁷⁵ Pa kuumusha mupinganyi . . . mupinganyi to, cintu kampanda cidi dyabulu mwa kuteeka pambidi peebe; bu mudi dinanga dya mafi, bwa kwenza ne mulume anange mukaji mukwabo kampanda pamutu paa mukajende yéyè, anyi mukaji unanga mulume wa cyanaana, anyi cikampanda mwaba ewu, cintu cya cifwisha bundu. Adi kí ndinanga dilelela to. Awu’s ndyabulu. Ki byende byenzedi mbyôbì abi. Ncintu kampanda cidiye muteete bwa kukupeesha mu cyanza, pamutu

paa dinanga; disanka kampanda, bwa kunwa maala kadi kudyumvwa bîmpè bwa cyôci aci, wamba ne: “Ndi kabungame; nêmpatukè nkanweku ndambu wa cicyampa’s, bwa mbipweku mwoyi.” Aci’s ndufu.

²⁷⁶ Nzambi ki dyebe disanka. Nzambi ki dyebe dikanda. Kumanya Mukenji, kumanya Bulelela, ki cyetu cidi citukumbane bwa mpindyewu. Yéyè ki cyanyi paanyi cyônsò cidi cinkumbane. Munda Mwende, bintu byônsò bîndì naabi dijinga bidi munda Mwende Yéyè. Ki dyetu dikanda ndyôdi adi. “Dyanyi dikwacisha didi difumina kudi Mukalenge.” Nwénù beena Kilisto, ikalaayi baMweyemene Yéyè bwa dyenu disanka, ikalaayi baMweyemene Yéyè bwa dyenu dikanda, ikalaayi nuMukeba Yéyè bwa dyenu dyakalenga. Yéyè ki dyanyi ditalala. Yéyè ki dyanyi disanka. Yéyè ki dyanyi dinanga. Yéyè ki wanyi Mwoyi. Ki Cipungidi ncyôci aci, Cimanyinu ku ciibi!

²⁷⁷ Kî mmwambule bujitu bwa muntu to, muntu nansha umwe, nansha wêwè mwikâle nganyi, Yéyè kî mmwambule bujitu bwende to, padiye kayi mwinshi mwaCi to.

²⁷⁸ Nenku vulukaayi ne, famiye mujima uvwabo nende, musanga pamwe. Kaa, ekelekele! Kaa, nwavulukaayi’s!

²⁷⁹ Wêwè udi wamba ne: “Ee, papa wanyi’s mmuyiishi. Tùùtwânyi! Mpasaata wanyi! Wanyi...” Bwa aci ncifwanyine kabidi kwikalà cilelela, cyôci aci, kadi wêwè?

²⁸⁰ Vulukaayi ne, bavwa mu dikubiibwa anu pavwa cimanyinu cileejiibwe patooke! Bu ne muntu uvwa mwaba ewu mwinshi emu, ne mwanende wa balume mwikâle dinsambu dya mùsèèsù, ùvwa mu njiwu, yéyè awu ùvwa ne cya kufwa. Papa wende yéyè ùvwa ne cya kupânda. Anyi, bu ne mwânà wa balume awu ùvwa yéyè apa, kadi papa wende mwikâle kwaka naka, papa wende awu ngudi ne cya kufwa. Anu cimanyinu! “PâNgààmònà cimanyinu, Nêmpicilè pamutu peenu.” Ki cintu cimwepele ncyôci aci.

²⁸¹ Wêwè udi wamba ne: “Ee, mwanaanyi wa balume’s mmuyiishi.” Nwénù baamaamù nutu nwamba ne: “Mêmè ndi ne mwânà wa balume mutambe bwîmpè,” anyi “mwânà wa bakaji mutambe bwîmpè. S’ki mêmè udi ukwambilà awu, yéyè awu ngwa kalolo wa kakuyiku mukwabo to. Mmuuijibwe tente ne Nyuma Mwîmpè, ne dinanga dya dikema! Mmutumikidi. Kacya ncituku mwanji kumona wa mushindu wawa to!” Kadi wêwè, maman?

²⁸² Wêwè udi wamba ne: “Wanyi mààmù ngwa kalolo mutambe bônsò. Ndi mumanye ne, bu yéyè mwa kufwa, neaye mu Dyulu, bwalu ncyâ bushuwa ne yéyè mmupete Cimanyinu, Mwaneetu Branham.” Kadi wêwè, mwaneetu wa bakaji? Famiye mujima’s udi ne cya kuteekiiibwa mwinshi amu.

²⁸³ Nwacyoku anyi? [Disangisha didi dyamba ne “To.”—Muf.] Nêngiikâlè...Tukaadi dîbâ dikumi ne ibidi...Indilaaiyi

kakese cyanaana. Ndi mufwanyine kucikosa kadi kubangulula cyakabidi dilolo edi. [“To.”] Kadi panwikala—panwikala baswe kwanji kwindilaku kabidi ndambu, nênditâcishèku bwa kulwijakaja mpindyewu. [“Amen.”] Nêmbwejèku munda amu mene, bwalu ndi ngeela meeji mpindyewu mene panucidi mu dilaabiibwa dyaci apa ne, mbifwanyineku kwikala bilenga bu nwénù mwa kicipeta mpindyewu mene.

²⁸⁴ Anu padi Cimanyinu cileejiibwe patooke! Dîbà adi, famiye mujima udi ne cya kwikala mwinshi mwa Cimanyinu aci, Mashi. Papa ne maman, ndi mumanye munudi nudyumvwa’s. Ndi paanyi ne bâna’s, mêmè ewu, bikengela mbamone basungidiibwe. Ndi ndyambila mêmè mwine leelu ewu. Nwamonu anyi? Ndi ne bâna beetu baa balume. Ndi ne mwaneetu wa bakaji. Ndi ne bananga baanyi. Ndi—ndi muswe kubamona basungidiibwe, bôbò paabo. Kadi, vulukaayi ne, kakuyi dileeja patooke dya Cimanyinu to, nebabutuke. Kakwenaku dibiika dya ku lufu bwabo bôbò to. Aci ncya bushuwa. Bwabo mbantuuke. Anu padi Cimanyinu cileejiibwe patooke!

²⁸⁵ Tangilaayi, Yoshuwa, mvw’ a kujinga bwa twîkalakù kabidi ne dîbà dya kucibala’s. Cifundaayaaku, Yoshuwa nshapita mwi2; ndumba wa baa Bisamba bya bende mwena kwitabuuja awu, Laahaba.

²⁸⁶ Kaa, mvw’ a kujinga bwa twîkalakù nanshà pa dîbà dya citeema’s we. Ndi muswe—ndi muswe kwangata cyôcì aci bwa kunuleeja muvwa cyôcì aci kuntwaku, nwamonu’s.

²⁸⁷ Ndumba ewu, wa baa Bisamba bya bende, tangilaayi numone, famiye wende yônsò mujima. Yéyé’s uvwa mwena kwitabuuja. Bivwa bikengela bwa famiye wende yônsò mujima abwele mwinshi mwa mukusu mukunze awu, cimanyinu aci. Bivwa bikengela bwa kubwelabo mwinshi mwawu amu, bwa cyanaana bavva mwa kubutuka. Bakaavwa bumvwe bamba bwa ciji cikole cya Nzambi. Bakaavwa bumvwe bamba bwa dileeja patooke dya bimanyinu ne bishima bya Nzambi munkaci mwa cisamba Cyende, ne bôbò bivwa bikengela kubiitababo. Bivwa bikengela bwa yéyé kubiitabayé. Nzambi, mwanjelo mubutudi awu, ûvwa wenda ulwa. Bôbò bavva bacimanye. Ne Yoshuwa ki uvwa mwine mwanjelo awu. Bôbò bavva basanganyiibwa mu njila awu.

²⁸⁸ Nenku ki mudi kabidi ditunga ne ditunga dyônsò, pa buloba, mu njila wa Cilumbulwidi cya Nzambi!

²⁸⁹ Ndumba mukese, wa kale ewu, yéyé ukaavwaku muumvwe bacyamba. Diitabuuja didi difuma ku dyumvwa! Kwambaye ne: “Ditunga dijima ndipete kàyùmbayùmba anu bwenu nwénù.” Aci ncya bushuwa.

²⁹⁰ Mpindyewu, batentekedi bààkatùmiibwà muntwamu bwa kudyanjila kulongolola maalu abu, ne bikwabo, yéyé wakatwa

bantu abu mushinga. Nenku, yéyè, civwaye muswe nkupànda. Kwambaye ne: “Ndi mumanye ne wenu Nzambi awu ngudi Nzambi, ne mêmè ndi muumvwe bamba bwa bintu binene bidiYe mwenze. Ndi mumanye cidiYe mwenzele Oga, ne ndi mumanye cidiYe mwenzele matunga mashiileshilangane. Ne ndi mumone ne aba badi baMwitaba badi bàpànda, ne aba badi kabayi baMwitaba badi babutudiibwa. Kadi cîndì mêmè nkeba nkwikala ne mwoyi,” mwakambaye. Kaa, ekelekele! S’ki bwalu mbwôbù abu. “Cîndì mêmè nkeba nkwikala ne mwoyi.” Bwalu bavva anu... .

²⁹¹ Monaayi, Yeleko ukaavwa muumvwe bivwa Nzambi munkaci mwa kwenza, kadi kabaakaswa kwangata didimwija adi ne mushinga to.

²⁹² Ne kakwenaku dingumba nansha dimwe mu ditunga emu, mu nyungulukilu emu, didi kadiyi dyumvwe bidi Nzambi munkaci mwa kwenza to. Bôbò kî mbaswe kwangata didimwija ne mushinga to.

²⁹³ Bukole Bwende bunene ne bimanyinu byakaleejibwa patooke. CyakenzaYe, Yéyè wàkabàpicishila buludi mu Mbû Mufwe, byenze anu bu ne mpa buloba bûme. Yéyè kupatwisha, Yéyè kufuka bintu, ne kwenza ne ndimba, ne nkùsù, ne nkùpà bwa kupatukayi mu lupeepele; mubifuke ku Dîyì Dyende, ku muprofeta Wende. Aci kacivwa cya mu musokoko to. Bôbò bavva bacimanye.

²⁹⁴ Ki Laahaba kwambaye ne: “Nkaadi muumvwe bwalu abu. Neyêna muswe kubutuka pamwe ne beena bupidya aba to. Bwâlâ, mukalenge!” Ùvwa mumanye ne cilumbulwidi civwa ne cya kubilonda, bwalu bôbò bavva anu mu njila awu menemene. Yéyè uvwa mucimanye. Pa nanku, ki kupengabo njila wa yéyè kupandukaku.

²⁹⁵ Bôbò bavwa ne cya kwikala biitabuuje ne dingumba dyabo dinene dya mu Yeleko adi divwa ne bukole bwa kukandameena ciiji cikole cya Nzambi aci, nwamonu’s, dingumba dyabo bôbò biine dinene adi.

²⁹⁶ Ki cidi bààbûngì badyambilila leelu wa Ndaaya ewu. “Kaa, ncyâ bushuwa ne Nzambi kaakwenzaku aci to.” S’ki cyakambilabo Eva kudi Sataana ncyôci aci. “Kaa, ncyâ bushuwa ne Nzambi kaakucyenzaku to.” Neàcyénzè, bwalu Yéyè mmwambe ne Neàcyénzè, nwamonu’s, ne cyôci aci ki Dîyì Dyende. Eyowa’s, mukalenge.

²⁹⁷ “Muntu yéyè kayi mulediibwe!” “Ne bimanyinu ebi nebifile badi balediibwe!” Nwamonu anyi? “Ku cyôci eci nkwanmanyina bantu bônsò ne nudi bayiidi Baanyi,” ne bikwabo, nwamonu’s. Eyo, ki civwabo bôbò baswe kwenza’s. Kaa!

²⁹⁸ Cyàkenzekà ncinyi? Mpindiyewu kadi kubabwidijabo mukana’s. “Ditabuluja nansha dimwe kadyakwenzekaku muneemu to. Dyetu dingumba kadyakutuulaku yadi mfranga

bwa cintu cya mushindu awu nansha. Twêtù katwakwikalaku ne lukutukutu lwa mushindu awu munkaci mwetu to. Ndi nkandika yônsò wa kunudi bwa kuya ku diine disangisha adi.” Huh! Yeleko, anu mu njila wa bapiishiibwe menemene!

²⁹⁹ Kadi kuvwa ne cya kwikala nsongaalume myeledyanganyi ya mikaba ya mèyì mimane kudifindila mu mwaba kampanda, bwa mamiinu madyanjila kulongolola. Bôbò kudifinda too ne ku nzubu kwende aku ne kumwelelabo ndambu wa mikaba ya mèyì. Yéyè kadi kuvwijaye nzubu wende—wende yéyè mwine awu mushaale ekeleesiya, bwa kwakidila mukenji.

³⁰⁰ Bâcìtu anu ne baa nanku's, nudi bamanye. Mukenji's ukaadi mukafike too ne kudi Dimiinu didyànjila kulongolola adi, nansha bishi. Katwena bamanye ne Wôwò mmukafike too ne kwine aku bishi to, kadi mMukakùfikè, bwa Mwakane kalu kubutuka pamwe ne mubi to. Nzambi ngudi munkaci mwa kutabaleela cyôci aci, leelu wa Ndaaya ewu. Eyowa's, mu mushindu kampanda Wôwò udi udifindamu. Twêtù katwena bamanye ne mbishi to. Nansha bôbò kabayi baswe kuWutuudila mfranga to, kadi kudi Dimiinu kampanda kuntwaku didi didyànjila kulongolola.

³⁰¹ Yônsò utukù mumanye cintu kampanda pa bidi bitangila Bible, mmumanye ne ndumba awu ukaavwa mudyànjila kulongolola. Ncya bushuwa nanku! Yéyè kavwa...Bible mmwambe ne: “Yéyè kaakabutuka pamwe ne bavva kabayi biitabuuje to.” Ncya bushuwa. Kadi yéyè wakiitabuuja mukenji wa dîbà adi.

³⁰² Nenku Nzambi wakamupa cimanyinu, ku baamisanjeela Bende abu. Baakamba ne: “Angata mu—mukusu mukunze, mukunze uwuswikile ku webe...” Bôbò ne: “Uvuluke ne, wêwè kuyi muswike mukusu awu kuntwaku to, anyi kuyi muwushiyezu to, kutudi twêtù bapandukile eku, katwena twambulaku bujitu bwa mucipu wètù awu to.” Ki bôbò ne: “Nwêñù basanganyiibwe pambelu paawu, twêtù katwenaku twambula abu bujitu to.” Kaa, ekelekele! “Laahaba, dimiinu dyônsò didyànjila kulongolola didi mûneemu adi, patuka kwaka uye wenda ukebangana naadi. Nda ukangate papa webe, mamwèbè! Bwalu, twêtù twafumu ku dipatuka, biikâle mwinshi mwa difuta dya cibawu aci, mu Ejipitu mwamwa, ne byônsò bituvwa katuyi bateeke mwinshi mwa cimanyinu aci mbibutuke. Laahaba, nyawu nkupreesha cimanyishilu. Ncimanyinu. Nenku ki mêmè udi wamba awu, mu Dînà dya Mukalenge, bwa kwamba ne, pawikala muswe kuteeka cyôci aci! Mêmè ngudi mumanye cyôci aci, mumanye musanjeela awu. Ndi mumanye mwanjelo wa ciji cikole awu, Yoshuwa. Yéyè ki musanjeela mubutudi wa Nzambi. Mêmè ndi mumumanye, ne yéyè mmumanye ne bidi bikengela kwikale cimanyishilu cya cimanyinu. Nenku ucilembeleje kuntu kwaka, ndi nkuaadikila. Ndi ngenza mucipu.” Ne Nzambi pende kwenzaye mucipu, ne, ewu yônsò

uvwa usanganyiibwa pambelu paa cyôci aci uvwa ubutuka, ne ewu yônsò uvwa usanganyiibwa mwinshi mwaci uvwa ushaala ne mwoyo.

³⁰³ Mpindyewu, mucipu umweumwe awu ngudiku leelu ewu ewu, cintu anu cyôci cimwecimwe aci, nwamonu's: "Mêmè ncyakukulekelaku ubutuka pamwe ne badi kabayi biitabuuje Mukenji to." Nenku bôbô . . .

³⁰⁴ Mukaji awu uvwa muumvwe bamba bwa byenzedi bìkaavwà byenjiibwe, ki kuciitabuujaye. Kadi, bwa apu, yêyè uvwa . . . Yêyè ne tatwèndè, ne bânà baabo baa balume babidi, anyi cintu kampanda, anu bôbô abu nkaayaabo ki bâàkaciitabuujà, mu cimenga cijima aci.

³⁰⁵ Nudi numona mudibo banyààbanyà anyi? Anu umwepele *apa* ne umwepele *pààpa*, kaafamiye kakese nkììkalà mwa kupatuka mu ditunga. Ncya bushuwa anyi? Anu menemene nanku mpindyewu, apa tudi twamba maalu mudiwu enzeka. Tudi . . . Panwikala baswe kumona cidi mubidi wa bwalu, bikengela nwânjì kumona dyambedi cìvwà cimfwanyi. Bidi bikengela numone cidi mundidimbi, dîbà adi nudi numanya ne cintu cilelela necikale bishi. Nwamonu anyi?

³⁰⁶ Bukole Bwende bukaavwa bulleejiibwe patooke. Cilumbulwidi cikaavwa mu njila cyenda cilwa. Bavwa ne cya kwitabuuja, bwa kupàndabò. Eyowa's, mukalenge. Nenku bakese aba . . .

³⁰⁷ Balumyana aba kubwelabo muntwamu, baamisanjeela aba, ne—ne kukwatabo dimiinu didyànjila kulongolola dìkaavwà diitabuuje adi. Mukaji awu kukwataye mudimu ne nzubu wende bu ne ng'ekeléeziya, bwa kwakidilaye baamisanjeela aba. Kabavwaku bafwanyine kubalekela babwela mu ekeleesiya ayo to. To, mukalenge. Nwamonu anyi? Pa nanku yêyè . . .

³⁰⁸ Nansha wêwê peebe, kabaakukulekelaku ubwelamu to. Badi bakwipatamu wêwê anu mudidinge mwambe nî ncinyi nî ncinyi pa bidi biCitangila. Eyowa's. Nwamonu anyi?

Kubwejabo bônsò baa mu cimenga cyende aci, bàvvà baswe kwitabuuja abu, mwinshi mwa cimanyinu aci.

³⁰⁹ Ki cyôci aci menemene cidi cîmpè twêtù kwenza leelu ewu. Pawikala muswe bwa munanga webe kampanda apande, bidi bîmpè bwa umubweje anu patudi twakulangana apa. Nwamonu anyi?

³¹⁰ Ciji cikole cya Nzambi paakabutulaci cimenga cinene aci, cimanyishilu cya cimanyinu cyakashaala cilame nzubu wende awu mu dikubiibwa. Amen. Bwa cinyi? Cimanyishilu cìvwà pa cimanyinu cyende apu . . . Anyi, cimanyinu civwa pa nzubu wende, pâàkuupukà cimenga cijima aci pansi. Civwa ncinyi? Civwa ncinyi? Yoshuwa, musanjeela wa Nzambi! Nzambi Yêyè mwine wakatwa mukenji wa musanjeela Wende awu

mushinga. Amen! Cyakawujaadika. Cyakawujaadika. Bôbò abu baakajingulula mukenji. Yéyè wakatwa mukenji wa musanjeela Wende awu mushinga. Nenku pààkuupukà cimenga cijima aci pansi, ki cimanyinu cya mukusu mukunze cya Laahaba cyacya kumutu kwa ciibi, eku bakwabo bônsò bafwe.

³¹¹ Dîbà adi, banjelo babutudi kuyabo buludi ne kubutulabo byônsò bivwa mu cimenga aci, kakwakashaalaku nansha kaacintu kamwe to. Bu muntu yéyè anu mudidinge mwangate kaacintu, bivwa bikengela kubutukaye naaku, kàà mu diine dingumba adi. Kwangatabo cintakanyi cijima aci e kucibutulabo! “Mulawu ukwate ewu yônsò wadidinga kuteeta kuciibaka. Mwanende mwanaabute neafwe anu piikalaye ucibangilaku apu,” ne bikwabo. Nzambi wakacyela mulawu mushindu awu, cintakanyi cinene aci cìvwà cibenge ngâs-... mukenji wa ngâsà ne luse, badyelela meeji ne bavwa balamiibwe mu dikubiibwa.

³¹² Leelu ewu, bantu bààbûngì badi badyelela meeji ne: “Bwalu ndi wa mu ekeleziya, ndi mulamiibwe mu dikubiibwa.” Kwitabuujiku lukutukutu lwa mushindu awu to.

³¹³ Padibi ne: “Mashi neikale cimanyinu kunudi.” Nyuma bwa mpindyewu ngudi Cimanyinu kunudi, Mwoyi uvwa munda mwa Mashi awu.

³¹⁴ Bya mwomumwe, twanjìbi kwelanganaayiku meeji pa bwine bwalu abu ne, cimanyinu cimwecimwe cyakakwatabo naaci mudimu mu Ejipitu aci, cimanyinu cimwecimwe cya mwoyi cìvwà mu Ejipitu aci, cìvwà mu Ejipitu aci, Nzambi wakakwata mudimu ne cimfwanyi cimwecimwe aci kwôkù aku. Yoshuwa, cimfwanyi cipwangane cya Yesu, ùvwa ne lulamatu ku cimanyishilu cya cimanyinu cìvwà baamusanjeela bende bayishe aci. Yoshuwa, paakambaye aci, wâkamba ne: “Kanulengiku awu nzubu anyi nî ncinyi nî ncinyi cîdimu to. Awu mmulamiibwe bwa Mukalenge.” Amen!

³¹⁵ Ndumba, wa baa Bisamba bya bende, mwendakanyi wa mu misèsù, kadi wâkuumvwa ne wàkiitabuuja, ne wàkateèka cimanyinu.

³¹⁶ Nansha wêwè mwikàle wa ciipansi mu mpekaatu bishi, cyûdì mwenze nansha ciikàle cinyi, kacyena ne dipetangana ne cyôci aci nansha dikese to. Teeka wêwè anu Cimanyinu. Cidi mbwebe wêwè. Wêwè umvwa munda mwa mwoyi webe amu cintu kampanda munkaci mwa kukoka, Cidi mbwebe wêwè. Teeka Cimanyinu. Ne Yosh-... munene awu.

³¹⁷ Mwaku *Yoshuwa* udi wumvwija ne “Yehowah-musungidi.” Ne *Yesu* kabidi, udi wumvwija ne “Musungidi.” Nenku, Yoshuwa, paakamanyaye ne baamusanjeela bende...

³¹⁸ Baamusanjeela bende abu e kwalukilabo, kwambabo ne: “Ndi mutumikile mêtì ebe matuma. Kadi nyawu kuvwa mukaji kampanda utudi bakasangane, patwèdì mikaba ya mêtì ayi,

udi mumanye's. Tudi bakasangane mukaji kampanda udi yéyè mwitabuuje. Ki twêtù kumwambila ne, bônsò biikalà mwa kulwa mwinshi mwa cimanyishilu cikunze aci muntwamu abu, cimanyinu aci, ncidi cifwanyine kwikalala ne mushinga. Mpindyewu ki cindi muyishe ncyocì aci. Udiku mwa kucitwa mushinga anyi, Yoshuwa?"

"Kadi's ki cîmvwà munutume bwa kuya kenza." Amen.

³¹⁹ Nenku dîbà adi, cyocì aci, paakacitwa Nzambi mushinga, nzubu awu kaakuupukaku to. Nenku dîbà adi pààkiimanà Yoshuwa kaaba aku ne kufilaye cikemu bwa kubutulabo cintakanyi cijima aci, pààkabàndàbo buludi kuntwaku, kadi Laahaba ne bende bônsò bavva basòmbe anu bilenga, ne bintu byabo byônsò, amen, amen, bintu byabo byônsò bivva mu nzubu amu, mu dikubiibwa. Bavva biimanyine anu muntwamu, ne kabiyiku bikengela bwa kwikalabo benza kutangidila pa dididiishi to. Bavva mwa kwikalala babala Mifundu pavwa mvita minunke apu.

³²⁰ Kwalukilaye buludi ne kumwelabo dîyì dya kumusela, dya kumuselabo kudi kalaala kaa cilwilu, e kubàndishiibwayè milongo, ne kulwabo nende mu Betelehema, ne bôbò kumwabanyina cyende citupa munkaci mwabo amu. Nenku kulelaye... kulelaye mwanende wa balume mwende luumu, ne mwanende wa balume mwende luumu awu kulelaye pende mukwabo mwânà wa balume mwende luumu, ne awu mwânà wa balume kulelaye pende mukwabo mwânà wa balume mwende luumu, too ne paakalwa Mwânà wa balume munene, mwende luumu awu. Kuyabi anu nanku, anu nanku too ne ku Obeda, ne ku Isaayi, anu nanku too ne ku Davidi. Ncya bushuwa, ndumba awu Laahaba, anu bwalu wàkiiatabuuja musanjeela. Wàkateeka cimanyinu, ne nzubu wende wàkapànda, bwa cyanaana nunku mmubutukile anu kuntu kuvwaye aku.

³²¹ Teelejaayi ne ntéma mpindyewu. Kaa, amba tûng, udi wêwè ucijingulula anyi? Bônsò bàvwà mwinshi mwaci bààkapànda mu Ejipitu. Bônsò bàvwà mwinshi mwaci bààkapànda mu Yeleko. Bônsò bàdi mwinshi mwaCi nebapande leelu ewu. Muswikiibwe ku mashi, mwânà wa mukooko mwena mashi awu, civwa ncimfwanyi cya Yesu Kilisto.

³²² Mu Ebelu 13.10 ne 20. Ncyeña ne dîbà dya kucibala to. Cifundaayi. Nkaavwa muswe kucibala. Ncibiikidiibwe ne "cipungidi cya kashidi." Mashi a Yesu Kilisto mmabiikidiibwe ne "cipungidi cya kashidi." Eyowa's, mukalenge! "Cipungidi cya kashidi."

³²³ Kacyakabiikidiibwa ne "ncipungidi cya Cyendeleele" bwa cinyi? Bwalu kacivwa cifwanyine kwikalala cya Cyendeleele to. Patwapikudiibwa, dîbà adi's cyajiki. Cidi cya kashidi, mbwena kwamba ne, "cipòòlò kampanda cya cikondo," too ne paajika cikondo. Kakwakwikala kabidi cikwabo to. Paajika cikondo,

katwakwikala kabidi dijinga ne cipungidi to. Kadi pamba cikondo kujikaci apu, tudi dijinga ne cipungidi aci.

³²⁴ Mpindyewu, vulukaayi ne, Ebelu 13.10-20, “cipungidi cya kashidi.” Mulayi wa Nzambi muswikiibwe ku Mashi awu udi utuvwija buumuke ku bupika bwa mpekaatu. Amen! Kakwena mpekaatu munda Mwende to; kakwena mpekaatu, budis, musunya to.

³²⁵ Ikalaayi nuMukuukwila nuleeja bukole Bwende bulaya! Cisamba cya Nzambi cya cipungidi ciswikiibwe ku Mashi, ciswikiibwe ku Cimanyinu aci, cidi ne Nyuma wa Yesu Kilisto munda emu, ne: “Ewu udi ungiitabuuja Mêmè, byenzedi bindi Mêmè ngenza abi, neàbyénzè pende,” mwikâle uleeja cipungidi patooke. Nwamonu anyi?

³²⁶ Dipungila Dipyadipya! *Dipungila* mbwena kwamba ne “cipungidi.” Ncya bushuwa, kî mmwômò anyi, Docteur Vayle? *Dipungila* mbwena kwamba ne “cipungidi.” *Dipungila Dipyadipya* mbwena kwamba ne “cipungidi cipyacipy.” Dipungila Dikulukulu divwa ndya kale, dya pa mwânà wa mukooko, mwena mwoyi uvwa kawuyi mwa kwalukila pa mwena kwitabuuja awu. Dipungila Dipyadipya divwa m’Mwânà wa mukooko wa Nzambi, ne Mwoyi Wende udi walukila pambidi peetu. Mashi adi Mwoyi! Nwamonu anyi? Mashi adi Mwoyi mu Dipungila Dipyadipya, nwamonu’s, Mwoyi mmufume ku Mashi a Mwânà wa mukooko, mbwena kwamba ne Dipungila Dipyadipya, cipungidi cipyacipy.

³²⁷ Cya ne, Nzambi: “Paanyima paa matuku awu Mêmè nêmfundè mikenji Yanyi pa bifundidi byà musunya byà myoyi yabo.” Nwamonu anyi? Nwamonu anyi? “Kî mpa bifundidi byà mabwe, ne mashi a mwânà wa mukooko to, àvwà akengela bwa nwénù kwikala nwamba ne: ‘Eyowa, nyewu ndi—ndi ne mashi *mwaba ewu*, kadi mpindyewu cidi cyamba ne ngénzè cinyi?’ to. Kadi pa bifundidi byà myoyi yenu, nwamonu’s, cipungidi cya Nyuma ki ciNgènzà ne cisamba.”

³²⁸ Nenku Cidi cileeja patooke bukole Bwende. Yone 14.12, udi wamba ne: “Ewu udi ungiitabuuja Mêmè, byenzedi bindi Mêmè ngenza abi neàbyénzè pende.”

³²⁹ *Dipungila Dipyadipya* didi “cipungidi cipyacipy,” Mwoyi mupyamupya, cileeja ne Yesu mmutukumbajile kantu ne kantu kavwa Nzambi mulombe, bwa kutwaluja, cya bushuwa, ku bâna baa balume ne baa bakaji baa Nzambi, mwinshi mwa Mashi, mudi kamuciyi kabidi dipila to.

³³⁰ Loomo 8.1: “Nenku kakucyena mpindyewu kabidi dipila bwa aba badi munda mwa,” kî ng’aba badi *biitabuuja Cyôci* aci to, “aba badi munda mwa Kilisto Yesu, badi kabayi benda bilondeshile mubidi to, kadi bilondeshile Nyuma.” “Ne Diyi Dyanyi didi Nyuma ne Mwoyi.” Nwamonu anyi? Kaa, ncyclaku mufwanyine kwangacilapu cyena-bwalu kadi

kushaalapu kabidi mêmà abidi. Kadi netulwijakaje naaci, nudi numona's.

³³¹ Kakuciyi kabidi dipiila to; buumuke ku bupika bwa mpekaatu, badishikamine ku diditacisha dya ku maalu a pa buloba, dipiila kadiyiku to. Bwa cinyi? "Kudi aba badi, ku Nyuma umwe, babatijiibwe mu Mubidi umwe." Mwaba awu Mashi a Mwânà wa mukooko mmalaabiibwe. Nzambi wa mu Dyuku wânwítâbì, nenku wenu... Mwoyi Wende udi munda mwenu, ne nudi bânà baa balume ne baa bakaji baa Nzambi.

³³² Ngiikadilu webe nyêyè ngiikadilu wa Nzambi awu. Neinyi ciine aci, kaamuntu kakese kaa kalendalenda anyi? To, mukalenge! Nzambi udi Nzambi wa cilumbulwidi. Yêyè n' Nzambi wa maalu malulame. Cidi ne cya kwikala anu mu cyôci. Kakwena cikwabo nansha cimwe ciîtâbibwà to. Ngiikadilu wa mushindu awu ki wûdi, bwalu wêwè udi ngiikadilu wa Tatwébè. Nwamonu anyi?

³³³ Cinyi? Mwoyi, tangilaayi numone padi (cyôci) mwoyi mwangaciibwe, bwa mashi. Nwamonu anyi? Mwoyi wôwò mwine mmwangaciibwe. Nwamonu anyi? Mwoyi, ki uvwa ukengediibwa, bwa mashi. Nwamonu anyi? Mashi avva malaabiibwe, kadi mwoyi kawuvwa mwa kulwa pa mwena kwitabuuja musangu awu to, bwalu uvwa mwoyi wa nyama. Kî mmwoyi...

³³⁴ Kadi, nwamonu's, pamutu paa muntu, civwa m'Muntu wa mutambidile, mutambidile, mutambidile. Nwamonu anyi? Nenku aci cidi civwija muntu mpindyewu kayi anu muntu patupu to, kadi mwikâle mwânà wa balume ne mwânà wa bakaji wa Nzambi, wa Mwoyi mutambidile, mutambidile, mutambidile, mutambidile, mutambidile ûwwa munda Mwende Yêyè awu, wàlukila pambidi peebe wêwè, ne ùkushintulula ùkuumusha ku bu ngènzhampèkâàtù, ne ku bintu bya pa buloba, ku bu cidimba cya ekeleesiya, ne ku muij wa mu dingumba, ùkufikisha ku mwena Kilisto mulediibwe cyakabidi, mûle tente ne Nyuma; Mwoyi wa Nzambi mwikâle anu ututa nkoka upatuka munda mwebe, byenze bu mudi tuntolantola tudi tutuuka ku cyamu cya dituucilapu ne nsandu, paudi wenda apu, mûle tente ne ngiikadilu mulenga, ne dinanga, ne kalolo, ne padi Nyuma Mwîmpè ukwata mudimu, wàkula apu. Kaa, ekelekele! S'ki bwalu mbwôbù abu. Nenku ne (ne cinyi?) mwikâle uteeleja Mukenji, ùbandila Dikunji dya Kapya, ne ditwishiibwa dibeneshiibwe ne: "Ndi muumuke ku lufu moye ku Mwoyi." Fundaayi nulame, ki bwa cinyi, kakwena dipiila nansha dya kânà to.

³³⁵ "Piïkalà myoyi yetu kayiyi yitupiisha to, dîbà adi tudi bapete dilomba dyetu adi," nwamonu's, "tudi bamanye" Kadi piïkalà mpekaatu munda mwa mwoyi wetu, dîbà adi ùdi utupiisha, abi's mbipiciibwe ne twêtù—twêtù katuyi nansha mene babange

to. Nwamonu anyi? Bikengela bwa wêwè kuumuka ku bupika bwa mpekaatu. Ne mushindu umwepele wûdì mwa kuumuka ku bupika bwa mpekaatu ngwa kubwela munda Mwende. Ki cibwikilu cimwepele cîdiku bwa mpekaatu ncyôci aci, n'Kilsto.

³³⁶ Vulukaayi ne, Mashi a cipungidi, Mashi a cipungidi awu kaena itabiibwa kakuyi Cimanyinu to. Kwêna mwa kukumbanaku to. Kwakukumbanaku to. Wêwè nyawu wamba ne: "Ee, mêmè—mêmè nkaadi mujidiibwe ku bintu kampanda." Aci kî n'Cimanyinu to. N'Nyuma, kî Cimanyinu, Nyuma wa Kilisto pambidi peebe. Úcítàbùùjè!

³³⁷ Mpindyewu, tangilaayaaku, Dîyì didi ditupeesha ditwishiibwa pa bidi bitangila mulayi. Byônsò ebi mmifundu yîndi mwadije mwaba ewu. Mbyenze anu bu ne, ndi mwa kutungunuka anu ne kuyiisha dituku dijima, nwamonu's, pa bwalu abu. Nwamonu anyi? Dîyì didi ditupeesha ditwishiibwa pa bidi bitangila mulayi, bwalu Dyôdì didi mulayi. Dîyì didi m'Mulayi awu, ne Dîyì didi Nzambi awu, ne Dîyì ndyetu-ndyetu twêtù. Ne twêtù tudi tulwa Dîyì, ne Dîyì didi dilwa twêtù. "Nwênu bashaale munda Mwanyi, ne Dîyì Dyanyi munda mwenu," dîbâ adi, nwamonu's, cidi cilwa anu famiye umwepele munene mutambe. Nwamonu anyi? Cidi citupeesha ditwishiibwa. Bwa cinyi? Ee, ncitupa cyetu's. Nwamonu anyi? Nwamonu anyi? Nwamonu's, Didi dilwa citupa cyetu. Mufundu kaayipu's we! Eyo. Ditupeesha ditwishiibwa, pa bidi bitangila mulayi.

³³⁸ Cimanyinu ncimanyishilu cya ne disumba dikaadi dyenjiibwe ne diitabiibwe. Mpindyewu, kwêna mwa kupeta cimanyinu cya mushinga wà lwendu wà njila wa kawulu paudi kuyi mufute mushinga awu to; ne mushindu umwepele uwikala mwa kufuta mushinga awu nkuwufuta. Ncya bushuwa. Cinyi? KuCiitabuua. KuCiitaba. Ditumikila mu kaabujima ku Dîyì dyônsò dya Nzambi ki dyakupeesha bukenji bwa kupeta Cimanyinu. Ditumikila mu kaabujima! Kaciyi citupa cya Dyôdì adi mu mushindu udi dyenu dingumba diya awu to, kadi Dyôdì dyônsò. Ditumikila mu kaabujima ku Dîyì, didi diikâle Kilisto, ki didi dikubweja munda mwa Kilisto.

³³⁹ Mpindyewu ambabi tûng bu ne udi wêwè yônsò munda, kadi makàsà ebe malembelele pambelu? Ambabi tûng bu ne udi wêwè yônsò munda, kadi byanza byebe bilembelele pambelu? Citupa cinene cyetu ciikâle munda, kadi mwoyi mulembelele pambelu? Nwamonu anyi? Nwamonu anyi? Mwoyi mucikâle mu maalu a pa buloba? Nwamonu anyi? Kadi katwena twenza nanku to.

³⁴⁰ Ditumikila mu kaabujima ne dikumbangane, ki didi dikuvwija wêwè ne Dîyì nulwa Umwe. Udi uDiitabuua, kantu ne kantu. Ne Dyôdì dyônsò diikâle munda mwebe, ne wêwè utangila umona mudiDi dikwacila mudimu munda mwebe.

³⁴¹ Kwêna wenda uwayawaya ne mushiki wa lukutukutu to. Wamonu anyi? Wêwè udi mwena Kilisto. Nansha cidi nî nganyi nî nganyi wamba, kaakukulengaku to. Wêwè udi munda mwa Kilisto. Udi mu dikubiibwa anu ne mwebe mwônsò.

³⁴² Paakookola lufu ku ciibi, kalwena ne bukole to, wamonu's, nansha bwa kânà. Bwa cinyi? Cidi anu kuumuka *apa* ne kubwela Mwamwa.

³⁴³ Bungì bwà bidimu byûdì naabi kabwena ne cidibu bwamba to. Wêwè ukààdi mumane kuumuka aku. Ukààdi mu Cyendeleele, bwalu udi munda Mwende. Yéyè ngwa Cyendeleele. Kabyena ne cîdîbi byamba to, nansha wêwè mwâñà, mukulumpe, nsonga, anyi cyônsò cyûdì aci. Wîkalè mulenga kwîsù, mubi kwîsù, wa katupa, munene, anyi cinyi, kacyena ne cîdîci cyamba to. To.

³⁴⁴ Kwêna ubanga kuwayawaya, ne bintu bikwabo byônsò ebi to. Wêwè, ukààdi mumane kupita abi. Ukààdi mufwe. Mwoyi webe mmusokoka munda mwa Nzambi kupicila ku Kilisto. Udi mutwibwemu citampi kudi Nyuma Mwîmpè, wenda wendakana munda mwa Kilisto. Cintu cimwepele cyûdì wêwè umona cidi anu Kilisto. Kwajiki. Ku Cyôcì aci nkaayaaci, nkûdì wendela. Kaa, ekelekele! Kabyena bikemesha to patuvwa kale wàwa twimba kaamusambu kakese aku ne:

Ujà dituku dyônsò njila wanyi ne dinanga,
Pândì ngenda ne Nkuci wa mu Dyulu apa;
Ngéndè dîbà dyônsò, mwikàle ne musambu ne
mimwemwe,
Ujà...

³⁴⁵ Ngiikaleku mwaneetu. Ngiikaleku ne nsòmbelu wa cileejilu cya cidi Kilisto mwanbe ne ncìvwà cikengela muntu ne cya kwikalaye aci. Ngiikale mwaneetu kudi mwaneetu wa balume, mwaneetu kudi mwaneetu wa bakaji. Ngiikaleku mwa—mwambi kudi bambi. Ngiikaleku cileejilu cya bileejilu. Ndeejeku baa pa buloba ne Dîyì edi n'Kilisto. Mushindu umwepele wûndì mwa kucyenza ngwa kubwela munda Mwende. Bwalu, ncyêna mwa kucyenza mêmè nkaayaanyi to, wêwè kwêna mwa kucyenza to. Kadi lekela Dîyì ne wêwè nulwe Umwepele, dîbà adi Dyôdì ndidi dileeja mwoyi wàdì pambelu. Wêwè udi mukanda mufundilangana wa Yesu Kilisto mwikàle wenda wendakana, pakaadiYe mumane kupeta bukontononyi mu kaabujim... bukontononyi bwônsò nkòòng pa wêwè, bwa kwenza Dîyì dyônsò.

³⁴⁶ PiikalaYe mwa kulwila *eku* ne: "Ndi muswe kwenza Eci," kadi wêwè wamba ne: "To, to, mêmè ncyêna ngiitabuuya Aci to," wamonu's, kwêna mwanji kwikala mu Dîyì to. Wamonu anyi?

³⁴⁷ Mu kaabujima, mpindyewu tangilaayi, mu kaabujima, mpindyewu, ditumikila mu kaabujima ku Dîyì dyônsò nkòòng dya Nzambi ndidì dikupeesha bukenji bwa kupeta Cimanyinu.

Dîbâ adi patudi tufuta, tusambila, tudi ne cya kwikala ne Cimanyinu cya kuleeja pamwe ne disambila dyetu adi.

³⁴⁸ Wêwè wamba ne: “Ndi nsambila, Mukalenge, kadi ncyâ bushuwa ne ncyêna ne...” Ee, kwêna usambilâ to. Abi’s mbipiciibwe anu ne wêwè mwimanyike, wamonu’s, bwa... Anji anu kutungunuka, dyambidi, upete Cimanyinu, wamonu’s, bwalu Cimanyinu aci ki ciitabaYe. Wamonu anyi? Eyowa’s, mukalenge!

³⁴⁹ Patudi tusambila, dîbâ adi tudi ne cya kuleeja Cimanyinu ne: “Mukalenge, nyewu ngaaKutumikidi, mu kaabujima. Ngaanyingaladi ku mpekaatu yanyi. Ndi ndyumvwa ne Wêwè udi mumfwile luse. Ndi mubatijiibwe mu Dînà dya Yesu Kilisto. Nyuma Mwîmpè udi pambidi paanyi. Mpindyewu nyewu nkaadi dijinga ne cintu kampanda bwa butumbi Bwebe. Mukalenge, ndì ncilomba. Cikaadi cyanyi mêmè mpiindyewu.” Dîbâ adi kudi cintu kampanda cîdî cyela lwongo lwà paanyima *apa* ne, “hyu-hyu,” ncyebé wêwè. Aku nkujike. Dîbâ adi kwônsò nkumane kujika. Kwônsò nkumane kujika. Bwalu mbupwe. “Ndi ndomba *cikampanda*. Ki cîndî ndomba. Ndi ne cya kucipeta.” Nwamonu anyi? Nwamonu anyi? “Ndi—ndi ncikeba mbwa butumbi Bwebe.” Nwamonu anyi? Ee, kwajiki, dîbâ adi Yêyè udi anu ukupeeshaci. Dîbâ adi udi umanya ne ncyebé wêwè. Ki mushindu udibi ngwôwò awu, bânà beetu balela, ne bikwabo, tudi tulaaba Mashi, tuciitabuuja. Kwajiki. Eyo.

³⁵⁰ CidiYe wenza ncinyi dîbâ adi? Dîbâ adi paudi ne, paudi mwa kuleeja Cimanyinu pamwe ne disambila dyebe, Cidi cileeja ne wâmanyì kufika ku ditumikila mu kaabujima dya Dîyì dyônsò dya Nzambi. Paudi mupete Cimanyinu, cidi cileeja ne udi mutumikile Dîyì dyônsò. Dîbâ adi, wêwè ne Dîyì nudi cintu cimwe, udi wêwè ulomba anu cintu cyûdì wêwè aci. Nwamonu anyi? Nwamonu anyi? Dîbâ adi, mona’s, udi mumanye.

³⁵¹ Mêmè mwambile *eci* ne: “Wêwè cyanza, untumikile, ololoka wangate mushwala wawa!” S’cidi cyenza nanku. Nwamonu’s, cyanza cyântùmikidi. Bwa cinyi? Cidi citupa cyanyi. Nwamonu anyi?

³⁵² Dîbâ adi paudi wêwè ne Dîyì nulwa cintu cimwe, mulayi wônsò, butumbi kudi Nzambi’s we, mulayi wônsò ngwebe wêwè. Wôwò udi ukutumikila. Dîbâ adi bikengela kutangila ne cyûdì muswe kwenza ciine ncinganyi. Kwêna mufwanyine kwela cyanza cyeve mwîkù, anu bwa kwamba ne: “Monaayi mûndî ncyenza” to. Kaa, to, to! Wamonu anyi? Kadi kwôkò kwikâle cintu kampanda mwîkù amu, cîdî cikèngelâ bwa mêmè kwolola cyanza bwa kukwata, cyôcî’s necintumikile. Nwamonu anyi? Nwamonu anyi? Ncyâ bushuwa. Nwamonu’s, bikengela kutangila ne cyûdì muswe kwenza ciine ncinganyi.

³⁵³ Ki bwa cinyi Nyuma Mwîmpè utu ufidiibwa ne dilobelela, ne bikwabo, nudi bamanye cîndî muswe kwamba aci, bwalu

bamwe... Kanwena baswe bwa... Musadidi mulelela wa Nzambi katu uditambisha Nende to, nudi numona's. Ki cyôcì aci. Aci ndidileeja.

³⁵⁴ Patudi tusambila, tudi tuleeja Cimanyinu. Cidi cileeja ne tudi batumikile mu kaabujima.

³⁵⁵ Pôlò udi utwambila, ne: "Mashi atu akula." Aci, muntu kana yônsò ewu mmumanye ne mashi, mu bulelela, ôwò miine, kaena mwa kwakula to. Atu mwengungù. Ncya bushuwa anyi? Mbanganyi badi bamanye aci? Kadi mbanganyi badi bamanye ne mashi atu akula? Panwikala baswe kufunda cyôcì aci, mmu Genese 4.10. Nzambi mmmwambe ne: "Kadi bishi bwa mwaneenu wa balume?" Yéyè ne: "Mashi ende adi ela lubila luumukila pa buloba, akufunda." Ncya bushuwa anyi? Mashi Ende adi akula. Aleluuyah! Nzambi kwamba ne: "Kadi bishi bwende yéyè?"

Yéyè kwamba ne: "Ndi mulami wa mwaneetu anyi?"

³⁵⁶ Yéyè ne: "Kadi mashi Ende's adi ela lubila. Mashi Ende's adi ela lubila." Ncimanyinu's. Ncimanyinu cya ne, mbamushipe. Mashi Ende avwa ela lubila amufunda.

³⁵⁷ Mpindyewu, nwêñù bangate cyôcì aci mu Genese 4.10, pashiishe mu Ebelu 12.24, nubangaayi kubala. Mu Ebelu 10, 12.24. Mbambemu ne: "Mashi a Yesu adi akula amba bintu bîmpè kutamba a Abele."

³⁵⁸ Nwamonu's, Abele, ùvwa muntu mwakane. Wàkafwa. Wàkafwa, kayi mwenze bwalu to, anu bwalu ùvwa mu Njila. Yéyè uvwa mu Njila, mwimanyine dibuulula dilelela divwaye naadi. Wàkaakula. Akeela lubila! Mashi a bwakane a Abele àkaakula àfunda Kaayina.

³⁵⁹ Kadi Mashi a Yesu Kilisto, kâkeela anu lubila cyanaana to, Àkapikula. Amen! "Àdi àkula àmba bintu bitambe bwîmpè." Àdi ànùvvija bânà baa balume ne baa bakaji. Àdi ànùsokoka ku ciiji cikole cya Nzambi. Nwamonu anyi? Mashi a Abele kâvwa mwa kusokoka Kaayina to, nwamonu's, kadi Mashi a Yesu adi mwa kucyenza. Amen!

³⁶⁰ Pa nanku, wêwè Kaayina mukulump'ewu, patuka ulwe leelu ewu, piikalabi ne wêwè utu mukengeshi wa Dîyì, mwikàle wàmba ne: "Matuku a bishima akaadi mamane kupita. Eci Cintu cidi anu lukutukutu pa lwôlò," ne bikwabo.

³⁶¹ Àdi munkaci mwa kwela lubila, nwamonu's. Mashi a Yesu Kilisto adi ela lubila, kadi munda mwa Wu mudi difwidiibwa dya luse bu wêwè anu mwa kuliitaba. Mvwa mwa kujinga bwa twêtù kushaalaku kabidi ndambu wa dîbà pa cyôcì aci, nwamonu's: "Mashi adi akula amba bintu bitambe bwîmpè."

³⁶² Itabuuja, bwa dikubiibwa. Pashiishe laaba, wamonu's. Itabuuja bwa... Cyûdì witabuujiла ncyôcì eci. Wamonu's, udi muswe dikubiibwa dyebe wêwè mwine. Udi witabuuja mbwa dikubiibwa dyebe wêwè, ne pashiishe uteeka Cimanyinu bwa

famiye mujima. Nwamonu anyi? Wêwè udi wamba ne: “Ndi mwa kwenza ciine aci mushindu kaayi?” Ikala uCinana’s! PiikalaCi cipete bwenzeji pa wêwè, dîbà adi’s wêwè ne Dîyi nudi cintu cimwe. Amen! Amen! Nwamonu anyi? Nwamonu’s, Didi dikwata mudimu bwenu nwêñù bônsò babidi. Wêwè ne Dîyi nudi cintu cimwe, dîbà adi Cîtèèkâku bwa bânà beebe, Cîtèèkâku bwa bananga beebe.

³⁶³ Bu mwakenza Laahaba, wàkacitèèka cimanyinu bwa tatwëndè, wàkacitèèka bwa mamwëndè, wàkacitèèka bwa bânà baabo baa balume ne bânà baabo baa bakaji, ne wàkabâbweja bônsò bwabo munda amu.

³⁶⁴ Ù’Cîtèèkè, wamba ne: “Mukalenge, nyewu nya bwa kakeba mwanaanyi wa balume. Nyewu nya bwa kakeba mwanaanyi wa bakaji. Ndi mmunana!” “Sataana, mulekele! Ndi ndwa bwa kumukeba. Ndi nteeka Cimanyinu cyanyi, Nyuma Mwîmpè.” “Wêwè Nyuma Mwîmpè, udi musòmbèle munda mwanyi emu ewu, nkvacileku mwanaanyi wa bakaji awu. Nyewu nya kudiye mpindyewu, ne dilabiibwa Dyebe pambidi paanyi.” Yéyè’s neàcyenzè. Amen.

³⁶⁵ Ki cyakenzabo mu Ejipitu ncyôcì aci. Ki cyakenzabo mu Yepleko ncyôcì aci.

³⁶⁶ Panwikala baswe kubala mukwabo kabidi, Byenzedi 16.31. Pôlò wakambilà kaamanda kaa masalaayi lukama awu ne: “Itabuuja Mukenji wa dîbà edi. Itabuuja Mukalenge Yesu Kilisto, wêwè ne baa mu nzubu mwebe nenusungidiibwe.” Ncya bushuwa anyi? Itabuuja bwa baa mu nzubu mwebe, ubabweje bônsò mwinshi amu. “Mpindyewu s’wamonu mudi Nzambi wa mu Dyulu mwenze cishima amu’s. Aci nkumpala kwa dilumbulwisha. Udi uciitabuuja anyi?”

“Eyowa! Cîndi mwa kwenza ncinyi?”

³⁶⁷ Kwambaye ne: “Juuka ubatijiibwe.” Pôlò kupatuka nende e kumubatiizaye, kwamba ne: “Mpindyewu itabuuja Mukalenge Yesu Kilisto, nenku wêwè ne baa mu nzubu mwebe nenusungidiibwe.”

³⁶⁸ Kwitabuuja cinyi? Kwitabuuja Mukalenge Yesu Kilisto, bwa baa mu nzubu mwebe, kuteeka Cimanyinu ku nzubu webe.

³⁶⁹ Pashiishe cyûdî wenza ncinyi paudi uCiteeka ku nzubu webe? Udi umusha bucyafu bwônsò ne ubwela pambelu. Wela pambelu tuujipè twípì twônsò, ne tuputulu, ne twarta twa kunaya, ne mfwanka, ne ma-télévisions, ne bikwabo nî mbinganyi nî mbinganyi byônsò, kadi kubitwa miseba kubyela pambelu, paukaadi uya bwa kuteeka Cimanyinu apu; kaCyakubitwala to. Eyowa’s, mukalenge. Übyélè byônsò abi pambelu. Maja ônsò awu, ne ma-fêtes, ne mijiki ya bïdündadûnda ayi, ne bibejibeji byônsò bya ciipanshi abi, ne bintu bya maalu a pa buloba abi, ubitwe miseba übyélè pambelu, wâmbè ne: “Tudi tukezula mwaba wônsò ewu.”

³⁷⁰ Bu mwàkenzà Yakobo, kwambaye, kwambilaye mukajende ne bônsò abu, ne: "Sukulaayi bilàmbà byenu ne bikwabo byônsò abi. Imanshaayi tunzambi atu." Amen. Yo- . . .

³⁷¹ Nudi bamany cyàkambà Yoshuwa kumpala kwa kusabuka ne kuyabo dyamwamwa anyi? Wàkamba ne: "Sukulaayi bilàmbà byenu; kanuseemenyi kudi bakaji beenu to, ne bikwabo, nenku nudilongolole, bwalu mu matuku asatu emu netusabuke Yadene." Amen. Üvwa munkaci mwa kudilongolola, üvwa munkaci mwa kuteeka cimanyinu. Amen. Ki cyôcì aci.

³⁷² Ùdìlongòlòlè. Ù'Cítèkè. Ù'Cítâbùùjè. Ù'dikezùlè. Bânà beebe balela, famiye webe, bananga beebe, baCimone mu wêwè amu. Aci's ncyâ bushuwa. Necikale ne bwenzeji. Eyowa's, mukalenge!

³⁷³ Pashiishe uteeke Cimanyinu mu disambila, ne—ne—ne dicyangata ne mushinga, ne diciitabuuja. Ù'Cítèkè ne dinanga dyônsò, ne bikwabo, mu mushindu wa wêwè umanya ne necyenzeke, necyenzeke. Kwajiki. Ù'Cítèkè ne dyeyemena dyônsò, mwikâle witabuuja ne neCyambulwishe. Paudi wakula ne mwânà awu apu, paudi wakula ne bayeebe apu, paudi wakula ne mukajeebe apu, paudi wakula ne munanga webe ewu apu, ikala mwitabuuje ne neCyambulwishe. Imana wêwè anu cyanaana mwaba awu, wamba ne: "Mukalenge, ngaamanyi kubanana. Bakaadi mbaanyi mêmè. Ndi mbapeta m'Bwebe Wêwè, Mukalenge."

³⁷⁴ Ù'Cítèkè, nenku ujuule cyuyûyà aci mu nyungulukilu webe, bwa bôbò abu bamateMu buludi. Nwamonu anyi? Kaa, wêwè udi, wêwè udi, pawikala ne Cimanyinu, udi ujuula nyuma kampanda mu nyungulukilu webe, bukole kampanda, bwa ne paudi wenda, bantu badi bamanya ne wêwè udi mwena Kilisto. Biikâle banange bwa wêwè kwikala ubambilaku cintu kampanda. Badi biitabuuja dîyì dyebe. Cyûdì wêwè wamba aci, bashaala bakwateku. Nwamonu anyi? Ki cyôcì aci.

³⁷⁵ Uteeke Cimanyinu, pashiishe wikale wenda naaCi. Nanà baa mu nzubu mwebe. Ùdi ne cya kucyenza mpindyewu. Dibà dya dilolo ndyôdì edi. Mpindyewu, nukaadi bateelejeteeleje kukaadi ntanta mule, mpindyewu dibà dya dilolo ndyôdì edi. Dibà dya kuciteeka ndyôdì edi mpindyewu. Ciiji cikole necidikume, dimwe dya ku matuku adi panshi aa, dibà ndifwanyine kwikala dikaadi dimane kupita pine apu. Nwamonu anyi? Teeka Cimanyinu, mwikâle ne dyeyemena dyônsò.

³⁷⁶ Panwikala baswe kubala cyôcì aci, kubala cintu kampanda mwaba ewu, Mufundu wanyi wündì mufunde bwa cyôcì eci, nubale Efeso 2.12, ne panwikala baswe kucifunda. Monaayi, mu Efeso 2.12, panudi nucibala, cidi cyamba ne, twêtù katwena tukwacila byenzedi bifwe mudimu nansha, kadi tudi tukwacila Nzambi udi ne mwoyi mudimu, ku byenzedi bìdì ne mwoyi.

Amen! Kaa, ekelekele! Ku byenzedi bìdì ne mwöyi, bimanyinu bìdì ne mwöyi. Nudi nwitabuuja bimanyinu bìdì ne mwöyi anyi? Kabidi, fundaayi Ebelu 9.11-14, panwíkala baswe kufunda aci. Bimanyinu bìdì ne mwöyi, byenzedi bìdì ne mwöyi, teekaayi aci!

³⁷⁷ Kî ntwitabaayi mifwe ya ne: “Nênye ne mwanaayi wa balume mu ekeleeziya bwa mmone ní ûdikù mwa kushaala mwena ekeleeziya” to.

³⁷⁸ Nsongaalume kampanda mwena Kilisto kaaba aka, mulunda mulenga, nyaanaanyi wa kale, muntu wa bushuwa, yêyè—yêyè kulwaye mwaba ewu, kubatijiibwaye. Mamwëndé kwambaye ne: “Paanyi’s mvwa mwa kujinga bwa wêwê kwikalaku muye ku ekeleeziya munene mupite awu, piikalabi ne uvwa ukeba ku—kubatijiibwa.” Nwamonu anyi? Nwamonu’s, nsongaalume awu kavwaku yêyè muswe twitabaayi mifwe ne bikwabo abi to. Nwamonu anyi?

³⁷⁹ Twêtù katwena tukwacila twitabaayi mifwe ne tunzambi tufwe mudimu to. Tudi tukwacila Nzambi udi ne mwöyi mudimu Mwena Mashi àkeedibwà pansi kuntu kwaka awu, ne Cimanyinu citeekiibwe pambidi peetu twêtù, bwa twêtù peetu kwikalala ne mwöyi. Amen. Eyowa’s, mukalenge!

³⁸⁰ Kukwacidiku twitabaayi kampanda mifwe mudimu to. Yôyì ayi yitu mene yivila too ne bintu bu mudi Cimanyinu eci. Yidi yamba ne: “Matuku a bishima akaadi mamane kupita. Cintu paaci ne ndibatiiza dya Nyuma Mwîmpè kacituku to.” Bwa cinyi kuya kashaala mwena cintu bu aci nanku? Nwamonu anyi? Kwenjiku nanku to.

³⁸¹ Teeka Cimanyinu, dîbâ adi, “kwacilaayi Nzambi udi ne mwöyi mudimu,” bwa byenzedi bìdì ne mwöyi, bimanyinu bìdì ne mwöyi; bimanyinu bìdì byòndopà babeedi, bibiisha bafwe, bidyanjila kwamba maalu, byàkula mu myakulu, byàndamuna, musangu wônsò anu bya bushuwa menemene, byàmba ciprofeta ne cintu *kampanda* ne cintu *kansanga* nebyenzeke, bileeja bimanyinu muulu mu dyulu, ne pa buloba, bimanyinu ne maalu a kukema, amen, byàmba anu menemene cidi Bible mwambe ne necyenzeke aci. “Kwacilaayi Nzambi udi ne mwöyi mudimu,” kuteeka Cimanyinu!

³⁸² Kwikadi wâya ku ekeleeziya ayi bwa kuya kashaala mwena byenzedi bifwe ne bintu bya mushindu awu to, bwalu bôbò abu kabatu nansha biitabuuja bintu paabi ne ncimanyinu to. Kadi twêtù badi biitabuuja aba, amen, tudi bamanye ne... Batu bamba ne: “Cintu paaci ne ncimanyinu kacituku to. Aci, kaa, kaa, aci’s ndukutukutu’s. Bidibo bamba kuntu kwaka abi, s’ndipaala’s. Mona’s, cintu cya bu aci kacituku to. Mona’s, nwêñù bakaji abu, kaa, nwêñù aba—nwêñù aba, mona’s, kanwena... Mvwadilu wenu udi ne bwalu kaayi...?” Kadi’s ûdi ne bwalu Bible’s ngudi mwambe nanku. “Nsuki yenu yidi ne bwalu kaayi...?” Bible’s ngudi mwambe nanku.

³⁸³ Aci, atu's tûdì anu tuumaalu tûdì tutàpululangana, nwamonus. "Kulengi, kukwaci, kulabulu." Yéyè's udi Nzambi. Nwamonus anyi? Mpindyewu, neya bushuwa ne cidi ne mushinga.

³⁸⁴ Mpindyewu, bôbò badi beela meeji ne ndipaala. Kadi bwetu twêtù badi biitabuuje ne bamanye Bulelala aba, tudi bamanye ne Cidi m'Bwikadi Bwende budi ne mwoyi, bwalu Budi bwenza bintu bimwebimwe byakenzaYe pavwaYe pa buloba apa abi. Amen.

³⁸⁵ "Kaa," mudibo bamba, "s'badi anu badifwanyikijila cyanaana mudibo bamona diine Dikunji dya Kapya adi." Kaa, bwâlâ! Kaa, bwâlâ bwêtù! Katwena tudifwankijilaku cintu nansha cimwe to.

³⁸⁶ S'baakadyambidila ne Pôlò uvwa yêyè pende mudifwanyikijileDi. Ejipitu wakeela meeji ne Izaleela uvwa mudifwanyikijileDi, kadi Dyôdî's dyakabangata kuya naabo too ne ku buloba bulaya. Eyowa's mukalenge! Katwenaku . . .

³⁸⁷ Ebelu 13.8, nudi bamanye's: "Yesu Kilisto udi umwèumwè awu makeelela, leelu, too ne kashidi," panwikala nufunda aci, nufunda, nwamonus, ne: "Yêyè udi umwèumwè awu." Kî-kî ncyôcì-kî ndi . . . didifwanyikijila kampanda to.

³⁸⁸ Pândì mfunda eyi Mifundu yîndì mfunda apa eyi, ndi mumanye mwaba udi Mifundu ayi yisanganyiibwa, ne mushindu awu ngündì nyaku. Nwamonus anyi?

³⁸⁹ Manyaayi ne m'Bwikadi Bwende budi ne mwoyi, bwalu Yêyè udi wenza cintu cimwecimwe aci mu Nyuma ewu. Mpindyewu, piikalaci cimane kabwela mu twitabaayi anyi mu dingumba kampanda, tudi tumanya ne lukasa lwônsò ne kacivwa Kilisto to. Neya bushuwa anyi? Mêmè munulombole mukanubweje mu twitabaayi kampanda anyi cintu kampanda, cya cyanaana, ndi mufwanyine kwikala mutumiibwe kudi dingumba kampanda. Kadi ncyéna nnutwadila maatwitabaayi to, ne ncyéna nnulongesha mangumba to. Mêmè ndi nnulongesha Dîyì dya Nzambi, didì diikâle bukole bwa dibiika dya ku lufu dya Yesu Kilisto bumwènèshìlbwe, kabiyi anu bwanyi mêmè to, kadi bwa yônsò udi muswe. Nwamonus anyi? Bwa nwénù . . .

³⁹⁰ Wêwè udi mwaneetu. Mêmè ncyéna muntu munene, ne wêwè muntu mukese to. Tudi bônsò bantu bakese mu Nzambi. Nwamonus anyi? Tudi bânà Bende bakese. Katwena ne citudi bamanye to, cîvwà cikèngelà bulelala bwa twêtù kumanya aci. Yêyè udi utufikisha ku dimanya bilondeshile mudiYe muswe Yêyè amu, ne twêtù tudi ne kusakidila kudiYe bwa bitudi bulelala bamanye pa bidi bitangila mabenesthesia Ende. Ne ncyéna ndyabanyina cyôcì eci bu cyanyi mêmè nkaayaanyi to; ndi muswe kucyabanyangana neenu. Nwamonus anyi? Ndi muswe bwa nubweleMù, ne ndi muswe bwa nwénù kupeta Cimanyinu eci. Ne pawikala kuyi mucyěnzè to . . . Bâàbûngì baa kunudi,

ciibûngì cyenu, bakaadi bamane kucyenza. Kadi pììkalà bamwe baa kunudi kabayi bacyenzè to . . .

³⁹¹ Nwamonu's, ndi ngaakwila kabidi pa mukaba wa mêtì, apa, nudi bumvwe's. Ne byâbûngì byaci . . . Nenku ncyêna ngamba mwaba ewu mu ekeleeziya emu to; tudi bônsò bapatuke, ngeela meeji. Kadi nekwikale pàmwäpa binunu kuvudija ku binunu biìkkalà mwa kuumwua mukaba wa mêtì ewu, nwamonu's. Nenku, ciine aci, cidi mmudimu wa bwambi. Nekwikaleku anu muntu kampanda wadifinda kadi kubwela mu Yeleko, nudi bamanye's, ne mukaba wa mêtì, pa nanku tudi baswe—tudi baswe kubakula Dimiu didyànjila kulongolola adi paayawu mwômò amu, nwamonu's, bwalu ciji cikole cilwalwa.

³⁹² Manyaayi ne m'Bwikadi bwa Nzambi udi ne mwoyi, bwikàle bujaadika ne Nzambi mmuMujuule ku lufu bilondeshile Dîyì Dyende dilaya. "Mu mutanci mukese emu baa pa buloba kabaakuMmona kabidi to. Yeleko, Ejipitu, kabaakuMmona kabidi to. Kadi nwénù nenuMmone, bwalu Mêmè . . ." "Mêmè," mupinganyi muleeji muntu, ngutubo anu baledila misangu yônsò, nwamonu's. "Mêmè nêngìikalè neenu. Mêmè ndi Cimanyinu aci. Dibiika Dyanyi dya ku lufu n'Cimanyinu aci. Byenzedi bîndì Mêmè ngenza mbyàñùmanyishà nwénù, mbyàMmanyishà munda mwenu."

³⁹³ "Anu mwakadibi mu matuku a—a Lota, ki mwikalabi kabidi ku dilwa dya Mwânà wa muntu, paapatuka Mukenji wa ib'a muloolo."

³⁹⁴ "Bwalu nekwikale Bukenkè lwà pa dîbà dya dilolo. Anu lwà pa dîbà dya dilolo menemene apu, Bukenkè nebulwe." Kaa, butumbi kudi Nzambi's we! Bidi bingenza ne ndyumvwa anu bu mufwanyine kukutula anu lubilu kupicila munkaci mwa cisumbu cya masalaayi ne kutupikila pamutu paa cimanu. Nwamonu anyi? Nwamonu anyi? "Nekwikale Bukenkè lwà pa dîbà dya dilolo." Ncya bushuwa. Muprefeta ngwâkamba nanku awu.

³⁹⁵ "Ne Mêmè nêngìikalè neenu. Nêngìikalè mu cikondo cya Luther; Nêngìikalè mu cikondo cya ba-Wesleyens; Nêngìikalè mu cikondo cya beena Mpenta; kadi anu pa dîbà dya dilolo menemene apu, nekulwe Bukenkè." Bya cyena mangumba abi nebijime, ne dîbà adi Cimanyinu neciteekiibwe. Nenku bônsò badi ne meeji matooke mu myoyi yabo aba, mwine mwônsò amu, nwénù aba kanuyiku—kanuyiku to bôbò kabaakuvwiibwaku—kabaakuvwiibwaku bapwangane to. Kadi mu nwénù amu . . .

³⁹⁶ Bidi anu mudibi ne bidi bikengela bwa mutu kuyawu, bwa kwangata dikàsà. Bikengela bwa mutu kuyawu, bwa kwangata cyanza. Bikengela bwa mutu kuyawu, bwa kwangata mwoyi. Bikengela bwa mutu kuyawu, bwa kwangata mukana. Nwamonu's, bikengela bwa mutu kuyawu.

³⁹⁷ Nenku mpindyewu tudi mu cikondo civwa cimanyinu cilaabiibwe pa mukamba wa ciibi, nwamonu's, ne ku makunji. “Nenku dîbà adi pâNgààmònà mashi, miikàle cimanyinu, Némpicilè pamutu peenu.”

³⁹⁸ Nêndwijkajè mpindyewu, lukasa ne mwanyi mwônsò mpindyewu. Anu tusunsa tukwabo tutwe ku tutaanu cyanaana, anyi dikumi, netwikale bajikije.

³⁹⁹ Cidi cijaadika ne Nzambi mmuMujuule ku bafwe. Nudi nuciitabuua anyi? Yéyè udi ne mwoyi munkaci mwetu leelu ewu. Ne “Mêmè” awu n'Kilisto. Ne “Mêmè” awu udi neetu too ne ku ndekeelu wa . . . aci cidi cyamba ne *dikumbana dya maalu ônsò*, cìdì cìswa kwamba ne, “nshiikidilu wa buloba.” “Mêmè nêngìkalèku too ne ku nshiikidilu wa buloba,” bilondeshile Dîyì Dyende dilaya. Yéyè ngwâkacilaya. “Ne byenzedi bîndì Mêmè ngenza nenùbyénzè peenu.” Kacyena lukutukutu kutudi twêtù to. N'Cimanyinu. N'Cimanyinu aci.

⁴⁰⁰ Twêtù tudi twitaba mulambu munsantu wa Mashi ewu. Tudi twitaba Mashi Ende malambula, pashiishe matupeeshe . . . Yéyè udi utupeesha Mwoyi, Cimanyinu, citampi cya mulayi Wende. Efeso 4.30, mmwambe ne: “Kanubungamiji mashi” anyi? To. “Kanubungamiji Nyuma Mwîmpè to, unudi . . .” [Disangisha didi dyamba ne: “Batwibwe citampi.” —Muf.] “Bâtèèkìibwe mwinshi mwa cipungidi, batèèkìibwe ku luseke.” Nwénù nudi batèèkìibwe mwinshi mwa cipungidi. Ki munùdì batèèkìibwe. Cimanyinu, Nyuma Mwîmpè, neikale Citampi. Padi cintu kampanda cikangila munda mwa citampi, kudidingiku wacikangula to. Kwêna mwa kucikangulaku to, wêwè, bwa Citampi cya Nzambi aci to. To. Nwamonu anyi? Bwalu nwénù nudi . . . “Kanubungamiji Nyuma Mwîmpè wa Nzambi to, unudi batwibwe nende citampi too ne ku dituku dya bupikudi bwenu,” pìikalà mubidi mubiishiibwe ku lufu.

⁴⁰¹ Ndimiinu, cimanyishilu cya ne dimiinu ndiimicishiibwe ne Mwoyi wa Cyendeleele, “Zoe, ‘Mwoyi Wanyi Mêmè mwine,’ ne Mêmè nêndibìishè cyakabidi ku lufu ku dituku dya ndekeelu.” Nenku paudi wenda apu, udi ne dyeyemena dya ne Mwoyi wa Kilisto udi munda mwebe amu, ne wêwè udi munda Mwende Yéyè. “Ku Nyuma umwe nkutudi bônsò babatijiibwe mu Mubidi umwe, ne batwibwemu citampi kudi Nyuma Mwîmpè,” munkaci mwa beena kwitabuua aba mushindu ewu, “too ne ku dituku dyatubiisha Yesu ku lufu.” Kaa, ekelekele! Teeka Cimanyinu. Cyôci aci ki cidici cyumvwija bwetu twêtù. Tudi bindile bwa Mulambu ewu utupeesha Mwoyi, ne Wôwô udi utupeesha. Dîbà adi Wôwô udi utupeesha Cimanyinu, ne twêtù tudi tuteeka Cimanyinu, cìdì ciikàle Citampi too ne . . . Biikàle—biikàle baabanyanganyi baa Cyôci eci, ncintu bunene kaayipu's we, biikàle baabanyanganyi, babatijiibwe ne Nyuma umwe ewu, mu Mubidi umwe awu musok- . . . udi mufwikakaja awu.

⁴⁰² Ndi mwambe mwaku aku bîmpè anyi, *mufwikakaja?* Musokome, Mubidi musokome, Mubidi musokome wa Yesu Kilisto. Nwamonu's, Nyuma Mwîmpè wâmbì ne: "Udi munkaci mwa kucyamba bibi." Cinyonga bu mêmè ewu's, kadi Yéyè wâmbì ne: "Udi munkaci mwa kucyamba bibi," pângacibììkidi ne, "*mufwikakaja*" apu, paaci's mMubidi musokome wa Yesu Kilisto, nwamonu's, Mubidi musokome wa Yesu Kilisto. Mêmè ncyêna . . . Kabyena bitukengela dilonga dya tulaasa to; bidi bitukengela Nyuma Mwîmpè. Yéyè ki Udi utukengela. Nwamonu anyi? Yéyè ki Udi utukengela. Eyowa, nwamonu's, civwa . . . ncifwanyine kwikalala cilendwishangane mwaba kampanda, mulongeshanganyi kampanda, mpindyewu ndi ntekemena ne mmucyûmvwè bîmpè. Mubidi musokome! Neciikale cyenzeke mu kiipacila kampanda, bwalu nunku Yéyè kî mmucyâmbè to. Nwamonu anyi? Yéyè udi kaaba aka mene mpindyewu. Yéyè udi kaaba aka mene ku cyambilu eku. Yéyè udi kunudi aku mene. N'Yéyè. Nwamonu anyi? Yoyôyò!

⁴⁰³ Ne munda Mwende kamwena lufu to. Munda Mwende kamwena tunyinganyinga to. Munda Mwende kamwena maalu matonde to. Munda Mwende kamwena mpekaatu to. Munda Mwende kamwena disaamà to. Munda Mwende kamwena lufu to. Twêtù tudi munda Mwende! Sataana yéyè uteeta bwa kukupeesha cintu kampanda, bu mudi disaamà, angata wêwè anu Cimanyinu cyebe uCiteeke. Kaa, ekelekele! Angata wêwè anu Cimanyinu cyebe uCiteeke ne, wêwè udi cintu cisumba kudi Yesu Kilisto. Cimanyinu ncileejilu cya ne mushinga webe wa lwendo mmumana kufuta.

Yéyè udi wamba ne: "Paudi ufwâ, udi mujimine."

⁴⁰⁴ Wêwè amba ne: "Udi mwambe cya cyanaana. Mêmè ndi ne cintu cimana kusùmba. Mêmè ndi cintu cimana kusùmba. Ndi ne Cimanyinu."

"Cimanyinu ncinyi's?"

⁴⁰⁵ Yéyè's mmumanye cìdìCi. Kudidingi, kudidingi wakutakananganaku nende to. Yéyè awu mmumanye cìdìCi. Mpindyewu, wêwè udi mufwanyine kwakula ne bamwe baa ku bayiishi aba, ne bôbô bafwanyine kukokangana neebé. Kadi kî n'Sataana yéyè to; yéyè mmumanye cidi bulelela. Nwamonu anyi? Kaa, eyowa's. Yéyè's wakalwa bwa kucilwisha, misangu yibidi anyi yisatu, nudi bamanye's, kadi ùwwa mutupakane's, mupanga wa diteeta. Sataana mmumanye cyûdî wêwè wamba aci. Leeja wêwè anu Cimanyinu aci, yéyè neaye lubilu. Eyowa's.

⁴⁰⁶ Bwalu, ncinyi ciine aci? Neintu citwa citampi. Yéyè kêna mwa kucikangula, bwa kufila cintu kampanda muntwamu cidi kaciyi cilelela to. Amba wêwè ne: "Umusha byanza byebe kwaka wê! Mêmè ndi mutwa citampi." Kaa, ekelekele! Cintu citwa citampi! Eyowa's, mukalenge! Ukààdi musùmbiùbwé. Ikala mukwate Cimanyinu cyebe aci citeekela pa diitabuuja

dyebe dìdì kadiyi dinyunga adi pa mulayi Wende apu, kadi umone myayaaye. “Disambila dya bwenzeji dya kypy dya muntu mwakane didi ne mushinga wàbùngì!” Nwamonu anyi? Nwamonu anyi? Angata Cimayinu aci. Ki mudimu waCi ngwôwò awu. Sataana udiku mbwa kukuteeta.

Yéyè's uvwa mu Ejipitu, bwa kuteeta.

⁴⁰⁷ Mona's, nudi bamanye's, dituku dyakateeka Laahaba ndumba awu... Ndumba awu dyakalembelejaye mwonji awu adi, mwonji awu, ndi ndifwanyikijila ne amwe a ku masalaayi awu akaseka ne akacyeluwila, kwamba ne: “Mukaji mupâle wa kale udi kuulu kwaka wawa! Mutu's wamunyunguluku. Monaayi anu bwalu, cidiye naaci munda mwamwa cyacya. Ha, ha, ha! Mona's, kacyakacya nukaadiku peenu bumvwe cya nanku kwépi? Mona's, Docteur Jones lwa kuntweku, mmwambe ne: ‘Kacyena ne bwa nsongo to.’” Kadi's civwaku, bwalu musanjeela wa kudi Nzambi ngwâkatwàla mukenji e kubambilaye.

⁴⁰⁸ Nudiku mwa kudifwanyikijila beena Ejipitu bamba ne: “Mbimweneke anu bu ne... Twänjìbi kwamba, tangilaayi anu peenu wawa musùmbà wa bapâle babunguluki baa mu malaba baba, balaaba mashi! Ha, ha! Amba tûng mwabengabo kupeta bùcyafù, pa kusukulabo ciine cyacya mpindyewu! Kaa, ekelekele! Nzubu mine minene yaya ya bwalu bulengayi naka kadi milaabakaja yônsò ne mashi! Kaa, mupuuya mubole kaayi's we! Kadi nêndye neebe lupiku ní kacyakushala cyenze ne bwôwà mu matuku makese aa. Kacyakwikala ne cidici cyumvwija to. Nudi bamanye ne mbwa cinyi? Taatù wa bunsantu Kampanda ngudi mwambe nanku.” Kadi's civwaku. S'civwa ne civwaci cyumvwija. Ncya bushuwa ne civwa ne civwaci cyumvwija.

⁴⁰⁹ Ncya bushuwa ne cidi ne cidici cyumvwija bwetu twêtù badi biitabuua. Nwamonu anyi? Vuluka wêwè anu diitabuua dyebe dìdì kadiyi dinyunga dyûdì naadi mu Dîyì edi adi! Mpindyewu, kùcyenà Eva kabidi to. Nwamonu anyi? Kwêna umwe wa ku beena mpatà aba to, ne, ee, badi badya cibanga kumpala kwa Sataana aba. Shaala wêwè anu kacya wâlama Dîyì dyônsò dya Nzambi. Nwamonu anyi?

Eva wakamba ne: “Ee, s'ki mudi Mukalenge mwambe!”

⁴¹⁰ Sataana kwambaye ne: “Kadi, udi mumanye's, ncya bushuwa ne Mukalenge kaakwenzelaku muntu mulenga bu wêwè ewu cintu bu nanku to. Kaa, wêwè's udi mulenga wa dikema. Yéyè kî mmufwanyineku kucyenza to.” Kaa, eyowa's, Yéyè's neâcyénzè anu kucyenza. Yéyè ngudi mwambe ne Neâcyénzè.

⁴¹¹ “Ee, tatwânyì's uvwa mwambi. Mêmè mwine ewu's ntu mwambi.” Ncycêna—ncycêna paanyi ne cya dyambapu to. Kwôkò kakuyi Cimayinu to, udi mujimine. Ciiji cikole aci's cidi pambidi peebe, wamonu's, ki cyônsò cîdiku ncycôci aci, padiku kakuyi Cimayinu. Nwamonu anyi? Eyowa. Yéyè mmwambe ne

Neàcyéñzè, ne Yéyè neàcyéñzè. Aci, aci's ncyumbe cikose bwalu. Yéyè ngudi wamba ne Neàcyéñzè.

“Kaa, mêmè ndi ngiitabuuja ne matuku a bishima . . .”

⁴¹² Eyowa, kadi Yéyè mmwambe ne kî mmajike to. “Mêmè ndi umwéumwè awu makeelela, leelu, too ne kashidi,” nwamonu's, anu cyôcì aci ncidiYe ujaadika ne ki cidiYe.

⁴¹³ Mpindyewu, bwetu twêtù, tudi bacimanye. Bwabo bôbò, kabéena baCiitabuuja to. Kadi twêtù kaayi tudi tuCiitabuuja. Tudi bamanye ne m'Buleela. Nwamonu anyi?

⁴¹⁴ Mpindyewu, mu kwikalà mu cyôcì aci, tudi tulwa citupa cya Dîyi. Nenku dîbâ adi angata Cimanyinu, Nyuma, pa mulayi wa ne: “Mêmè ndi Mukalenge udi ukwondopa.”

⁴¹⁵ Mpindyewu dilongòlòlákú bwa mudimu wa dyondopa wa dilolo edi. Nwamonu anyi? Angata Cimanyinu, uCilembelejile pamutu paa Dîyi apu, pa diitabuuja dyebe dîdì kadiyi dinyunga mu Dîyi adi adi, neupatuke. Mpindyewu, Aci—Aci ki cintu cidi cimwela pambelu, bwalu munda Mwende Yéyè kamwena bya nanku to.

⁴¹⁶ Mvwa mwa kujingaku kufila majaadiki ndambu mpindyewu, a bintu kampanda bîndìku mumone byenzeke anu mu mbingu mikese mishaale eyi. Nwamonu anyi? Nwamonu anyi? Kaa, cîndì mene mufwanyine kufidila bujaadiki's we!

⁴¹⁷ Nudi bamanye's, ne Luuka mmwambe ne: “Bu byônsò byàkenzà Yesu mwa kufundiibwa mu mikanda, ya . . . kakuvwa mikanda bûngì bukumbane pa buloba bwa kubifundabo to.”

⁴¹⁸ Anu bîndì mumone mu mudimu wanyi mêmè mwine wa bwambi nkaayaabi, bîndì mumone Yéyè mwenze, kanwenaku bafwanyine kwambakaja mishiki ya mikanda ya bibungu pa cibumba cya ku cyambilu eci to. Bu mêmè mwa kufunda ku kantu ku kantu bîndì mumone Yéyè mwenze anu mu mudimu wanyi mêmè mwine wa bwambi nkaayaawu, bîndì mumone Yéyè mwenze. Nwamonu anyi? Yéyè mmuutuute dyakalenga mu mudimu wanyi mêmè wa bwambi kupita mwakadituutaYe mu Wende Yéyè mwine. Eci ncilelela. Eci ndikwata dya pa mikaba ya mêyi. Mpindyewu, vulukaayi ne, Yéyè ngudi mutuute dyakalenga adi mpindyewu awu, kî mmêmè to; n'Yéyè. Butumbi's we! Aleluuyah!

⁴¹⁹ Yéyè mmuutuute dyakalenga mu Jeffersonville kutamba mwakadituutaYe mu Nazaleeta. Wàkenza mu cimenga cya beena lwonji aci ne mu cimenga cya beena lwonji eci. Amen! Butumbi's we! Bwalu: “Yéyè kaakapetaku mushindu wa kwenza bishima muntwamu to,” kadi Yéyè mmupete mushindu awu muneemu. Ndekeelu wa byônsò Yéyè wâjikululu ngoma's, muneemu. Bwa muneemu kaayi Yéyè wafiki ku dicienza. Nansha muvwaYe mufwanyine kwikalà mwenzejiibwe bwa kutwala bantu buumukila ku myaba ya cyanaana, kadi Yéyè—

Yéyè mmufike anu ku dicyenza, nansha bishi. Pa nanku, Yéyè mmupete bipeta muneemu emu kutamba ne muvwaYe mupete mu—mu Kaapenuma anyi—anyi mu Nazaleeta amu, mu cyōcì aci. Mmwenze bishima muneemu mu tabernacle ewu bûngì bupite byakenzaYe mu mudimu Wende mujima wa bwambi pa buloba apa. Ncya bushuwa ne, ncidiYe mwenze. Kadi twămbè bishi bwa myaba mikwabo ya pa buloba? Kaa, ekelekele! Mpindyewu aci's ncidiYe mwenze.

⁴²⁰ Mpindyewu nwavulukaayi ne, “Yéyè” ngudi mwenze. Mpindyewu, kacya kabituku byambiibwe ne mêmè ngutu muceyénzè to, nwamonu's, bwâlâ bwanyi, bwalu kí mmêmè udi muceyénzè to. Ncyeña muceyénzèku mêmè to. Mêmè mvwa anu muMunange cyanaana ne mudilekelele kudiYe, ngamba civwaYe Yéyè wamba, ne Nyuma Mwîmpè uya kudi bakwabo bantu ne bôbò abu biitabuua civwaYe wamba aci, ne dîbà adi Yéyè wenza cyenzedi. Ki cyônsò cidiku ncyci aci.

⁴²¹ Yéyè wikalapu nanshà mwa kutufikisha twêtù bônsò aba ku diitabuuja's! CivwaYe mufwanyine kwenza mpindyewu ncinyi bu Yéyè mwa kutufikishaku twêtù bônsò aba ku diciitabuuja mpindyewu mene, s'mmwômò's? Nunku kí nkufwanyineku kwikalâ mutu nansha umwe ne butekete mu nyungulukulu mwônsò mwa cimenga emu to. Ncya bushuwa. Bu Yéyè mwa kufikishaku bantu bônsò ku diciitabuuja, nunku byônsò's mbifwanyine kujika. Nwamonu anyi?

⁴²² Ikala mulame Cimanyinu cyebe pamutu paa diitabuuja dyebe dîdî kadiyi mwa kunyungishiiwa adi mu Dîyì Dyende dilaya, nenku Sataana neaye.

Mpindyewu nkaadi njikija mpindyewu.

⁴²³ Musangu kampanda Nzambi wakapeesha baa pa buloba cimanyinu cikwabo; civwa mmwanzankongolo. Nudi bavuluke aci anyi? Misangu yônsò, Yéyè utu misangu yônsò mushaale anu ne lulamatu ku cimanyinu aci, bwalu Yéyè wakawufila bu cimanyinu. Binunu byônsò bya bidimu ebi, Yéyè katuku mupangile bwa kuleejia patooke cimanyinu aci to. Ncya bushuwa anyi? Bwa cinyi? Ùdi ucitwa mushinga. Yéyè ngwâkacifila. Wâkapèësha baa pa buloba cimanyinu cya ne Yéyè kavwaku mwa kubutula kabidi buloba ku mâyi to. Nenku Yéyè misangu yônsò, misangu yônsò, kubangila anu ku dituku adi, utu anu mucileejeleeje patooke.

⁴²⁴ Kudi tuubintu kampanda mu lupeepele emu, tûdì twènza mwanzankongolo awu. Padi mvula uloka, ne dîbà dipatuka, aci cidi ciwuleeja. Dîbà didi dyumisha mvula awu, pa nanku Yéyè wakateeka mwanzankongolo mwaba awu bwa kujaadika ne kakwakumataku mâyi bûngì bukumbane pa buloba adi mwa kububutula cyakabidi to. Ki cipungidi Cyende ncyci aci. Ncimanyinu. Yéyè wakamba ne: “Nênnüpèëshèci bu cimanyinu.”

⁴²⁵ Yéyè utu mutwe cimanyinu Cyende aci mushinga. Wàkatwà cimanyinu Cyende aci mushinga mu matuku a Noa. Yéyè uci tu anu ucileeja. Wàkatwà cimanyinu Cyende mushinga mu Ejipitu. Wàkacìtwà mushinga mu Yeleko. Yéyè udi uCitwa mushinga leelu ewu. Ùtu misangu yônsò anu utwa cimanyinu Cyende mushinga padici cileejiibwa patooke.

⁴²⁶ Binunu byônsò bya bidimu ebi, Yéyè utu munange kuleeja cimanyinu aci. Katu ucipwaku mwoyi to. Katu upwa mwoyi cimanyinu Cyende to. Mpindyewu, nansha buloba mwa kwikala bushintuluka munyi, mwanzankongolo ucdi wôwô anuku. Nwamonu's, Yéyè udi utwa cimanyinu mushinga.

⁴²⁷ Ki mudiYe wenza kabidi patudi twakulangana apa, Yéyè udi utwa Cimanyinu Cyende mushinga. Nansha ekeleesiya ushintuluka munyi, nansha yéyè wenza *cikampanda*; Nzambi uci tu anu utwa Cimanyinu Cyende mushinga, anu cyôci nkaayaaci. Bidi bituleeja ne Yéyè katuku upangila bwa kutwa mushinga bidiYe wenza ne bidiYe wamba to. Twétù tudi twitaba, tudi—tudi tuneemeka Cyôci aci. Ntu mêmè ngenza nanku.

⁴²⁸ Yéyè mmuswe bwa twétù peetu kuleeja patooke Cimanyinu Cyende kumutu kwa diatabuuja dyetu, kudi Sataana ne tusumbu twende twônsò twa ntendeleelu twa bupidya ne mangumba, bwa ne tudi twitabuuja ne mulayi Wende mmulelala, ne Yéyè neénzè cidiYe mulaye bwa kwenza. Ki Ekeleesiya nyéyè awu.

⁴²⁹ Kabyena bikemesha to padibo kabayi mwa kufika ku ditumba dya ntwdajilu mu cyalu to, mutudi tucibiikila; mfwilaayiku luse bwa dîyì adi. Kabyena bikemesha to padibo kabayi ne kudibo bakafika kadi baalukila ku dingumba bakenza musumbà wa bantu bavwale ne ku ménù, baa mwadilu wa kapelu, baa mamanya a mu mitu, balonge tulaasa. Kabayiku ne kudibo bakafika to, bwalu aci ki cidibo baleejangana ne: "Mêmè ndi Méthodiste. Ndi Presbytérien." Ki cyônsô cidibo paabo ncyôci aci.

⁴³⁰ Kadi beena kwitabuuja badi bangata Cimanyinu! Ne civwa Yesu mubange kwenza mu Ngalela aci, ki cidiYe mutungunuke ne kwenza mpindyewu ku dileeja Dyende dya patooke dya Cimanyinu, cya Nyuma Mwîmpè udi mwalukile pa Ekeleesiya. Bwalu, kacivwa byenzedi bya bapostolo to, civwa mbyenzedi bya Nyuma Mwîmpè munda mwa bapostolo, ne ciine aci civwa n'Cimanyinu.

⁴³¹ Baakamba ne byakakengela kuteyabo ntema kudi Peetelo ne Yakobo, pavwabo... Peetelo ne Yone, pavwabo babwelela ku ciibi civwabo babiikila ne Cilenga apu, bamône ne bavwa binyonga. Bavwa bafwanyine kwikala bambe ne: "Hit, hain't, tote, tarry, fetch, carry. Nénkwambilé *cikampanda*." Nwamonu anyi? Bavwa bafwanyine kwikala ne mwakulu wa mishindu yônsò uvwabo bôbô kabayiku mwa kuumvwa to. Bavwa bafwanyine kwikala kabayi bamanye dishiilangana to, byônsò

bya—bya... byônsò bya makumi a mu Mifundu abi. Kadi byakakengela kujingululabo ne bôbô bavva ne Yesu. Bavva mwa kuleeja Cimanyinu aci patooke, bwalu Nyuma umwèumwè uvwa pambidi Pende Yêyè, kumpala kwa dipoopediibwa Dyende dya pa nkuruse awu, ûvwa pambidi paabo paanyima paa dibiika dya ku lufu. Amen!

⁴³² Dîbâ adi aci cidi ciMuvwija Ebelu 13.8 ne: “Yesu Kilisto umwèumwè awu makeelela, leelu, too ne kashidi.” Mushindu awu ngutudi twêtù tumanya ne Yêyè udi ne mwoyi. Bwa cinyi? Tudi tumanya munyi ne twêtù tudi ne mwoyi? Mbwalu Yêyè udi ne mwoyi. Nenku bwalu tudi bamanye ne twêtù tudi ne mwoyi, mbwalu tudi bafwanangane Nende, ne tudi munda Mwende. Ne Yêyè wakamba ne: “Bwalu Mêmè ndi ne mwoyi, nudi peenu ne mwoyi. Mêmè ndi Yêyè awu,” mu Bwakabuulwibwa’s, “uvwa mufwe awu, ne udi ne mwoyi bwa kashidi ne kashidi.” Nenku twêtù—twêtù bafwe ku twêtù biine ne balwe ne mwoyi munda Mwende, tudi ne mwoyi bwa kashidi ne kashidi. Nenku dîbâ adi Mwoyi Wende munda mwetu udi anu mudi mwoyi wa cintu cikwabo kana cyônsò eci, Üdi ûleeya patooke civwaYe Yêyè aci. Nenku aci ncidi ciMuvwija umwèumwè awu makeelela, leelu, too ne kashidi.

⁴³³ Mpindyewu mmunyi mudibi mwa kwenzeka bwenu nwénù, padibo bavila Cyôcì aci? Kanwenaayiku numona, “byenzedi bifwe” anyi? Kwacilaayi Nzambi udi ne mwoyi mudimu, ku cya Cyendeleele... Ndi njinga kwamba ne, cipungidi cya kashidi cya Mwoyi uvwa munda mwa Mashi a Yesu Kilisto. Mpindyewu ngenda ntungunka, bwa kujikija, ndi... Ee, ngeela meeji ne, netwikale anu ne cya kwimanyika. Nwamonu’s, dileeja dya patooke dya Cimanyinu cya ngâsà Wende, dinanga Dyende! Mpindyewu, kakuyi Cimanyinu eci citeekiibwe to...

⁴³⁴ Mpindyewu, n’Cimanyinu. Cimanyinu ncinganyi? Cimanyinu ncimanyishilu cya ne dibanza ndimana kufuta. Mushinga ûvvà mulomba ukaadi mumana kufuta. Mushinga wa lupandu lwetu uvwa ndufu, nwamonu’s, nenku muntu nansha umwe kavwaku mwa kuwufuta to pa kuumusha Kilisto. Nenku kaciyi nyu—nyuma wa dingumba kampanda to, kaciyi nyuma wa paapà kampanda to, kaciyi nyuma wa muntu kampanda anyi wa munsantu kampanda to; kadi Nyuma wa Yesu Kilisto, pa Ekeleeziya, n’Cimanyinu cya ne dibanza ndimana kufuta ne Yêyè mmukumbaje dilomba ne dilomba dyônsò divwa Nzambi mulombe adi, nenku twêtù ne Yêyè tudi cintu cimwe. “Mu dituku adi, nenumanye ne Mêmè ndi munda mwa Taatù, Taatù munda Mwanyi; Mêmè munda mwenu, ne nwénù munda Mwanyi.”

⁴³⁵ Teekaayi Cimanyinu! Teekaayi Cimanyinu cya dibiika Dyende dya ku lufu. Cya ne, bwalu Yêyè wakabiishiibwa bwa dibingishiibwa dyetu, Yêyè mmutubiishe peetu pamwe Nende. Ne mpindyewu tudi basòmbe mu myaba ya mu Dyulu, mu Yesu Kilisto, mwinshi mwa bwobumwe bwa Cimanyinu.

⁴³⁶ Pavwa Izaleela musòmbe mwaba awu, ne mikunda yediibwa, pambelu mu mùsèèsù apu, bôbò kabavwaku ne cintu nansha cimwepele cya kuditacishila to. Cintu cimwepele, anu kwikala batwishiibwe ne mashi, cimanyinu, avwa mamweneke.

⁴³⁷ Ki cintu cimwepele neyòci aci citudi mwa kuditacishila patudi twakulangana apa. Kudi lutatu mu—mu njila, lùvuma's, balunda baanyi. Kakwakunengaku to, lutatu neludikume. Aci nudi bamanye. Ikala mutwisiibwe ne Cimanyinu ncimweneke. Ne Cimanyinu n'Nyuma Mwîmpè. "Bwalu ku Nyuma umwe nkutudi bônsò babatijiibwe mu Mubidi umwe, ne bavwijiibwe baabanyanganyi baa butumbi Bwende," pa Buloba bwetu, Kwetu, twenda tuyu mpindyewu batangile ku Buloba bulaya.

⁴³⁸ Nudi baMunange anyi? [Disangisha didi dyamba ne: "Amen."—Muf.] Nudi nwitabuuja Cimanyinu aci anyi? ["Amen."] Mbanganyi badiku baswe kwamba ne: "Kaa, Mwaneetu Branham, unsambidileku, bwa ndwe mwinshi mwa Cimanyinu eci"? ["Amen."]

Twinyikaayaaku mitu yetu.

⁴³⁹ Mukalenge Yesu, Mutambe kwikala Wa Ngâsà awu! Pavwa baa pa buloba mu mpekaatu, ne muntu nansha umwe kayiku mwa kukwacishangana apu, Nzambi, mu luse, mwikâle udyanjila kuleeja, ku cimfwanyi, cya ne kuvwa kulwa Cimanyinu kampanda civwà mwa kuumusha mpekaatu; kaciyi anu kumubwikila cyanaana to, kadi ciikâle mwa kumuumusha. Ki Yesu kulwa dîbâ anu pa dyôdì, ne kwela Ye Mashi pansi, Mwoyi Wende Yêyè mwine, wàngata... ùtwènzelâ difuta dya cibawu bwa mpekaatu yetu, ne pashiishe uMwaluja mu mmwenekelu wa Nyuma Mwîmpè, udi mpindyewu Cimanyinu cidi cikengela bwa kulamiibwa kudi Ekeleesiya too ne paalwaYe. Bwalu Mupostolo Peetelo wakamba ne: "Mulayi udi kunudi nwénù, ne kudi bâna beenu balela, ne kudi aba badi kule, mu bûngi bwônsô bwabiikila Mukalenge Nzambi wetu abu."

⁴⁴⁰ Mukalenge, ku ngâsà Webe, ku dikwacisha Dyebe, ndi nnana ewu yônsò udi uteeleja Mukenji ewu. Ndi mbananyina Nzambi, ndi nKulomba, Mukalenge, ne apa mu dinda emu ne bônsò baateelejila pa mukaba wa mâyì abu. Nenku kwôkò kwikâleku Dimiu mwaba kampanda, didi didyànjila kulongolola adi, Mukalenge, bwa kuumvwa Dîyì dya dituku dya ndekeeli edi, swaku bwa alwe mpindyewu, ne kalolo ne kudipwekesha kwônsò, ateeke bitadi byende bya bucimunyi pansi ku nkuruse, anyi yêyè mwine, bu citadi cya bucimunyi cya ngâsà wa Nzambi udi mumubiikile awu. Nenku swaku bwa yêyè ujîibwe tente ne Nyuma Mwîmpè ne aleje patooke Cimanyinu cya Mwoyi wa Yesu Kilisto mu dibiishiibwa Dyende dya ku lufu, piikalaye ucidi mushaale panu pa buloba apa. Enzaku nanku, Mukalenge.

⁴⁴¹ Mêyi aa, Mukalenge, ndi mufwanyine kwikala nciyi muÂmbè mu mushindu mujaalame to. Ne pângiïkalà nciyi

muămbè mu mushindu mujaalame to, ndi ndomba bwa Nyuma Mwîmpè angateku Mêyì awu àÀfilè mu mushindu uvwabi bikengela bwa kufidiibwaWu, bwa bantu kuumvwabo ne kumanyabo, kakuyi budimu to. Nenku bamanyeku ne dinanga ditu dilongolola bilema. Ne bwa kumanyabo ne mbwa dîbâ ditudi ne mwoyi, ne bwa dilwa dya Mukalenge dîkaadì disseemene, ne tudi tumona makénkè makunze manene apodya, pa buloba bujima, bwa ne cikondo cikaadi pabwîpì.

⁴⁴² Swaku bwa bantu bapete Nyuma Mwîmpè leelu ewu! Ndi ndomba, ne mbafila Kûdì Wêwè, mu Dînà dya Yesu Kilisto. Ne Yéyè awu ikale Cimanyinu kutudi cikondo cyônsò citwikala ne mwoyi aci, cyûvvà Wêwè mulaye ne ki ciikalaYe. Mbifwanyine kwikala bipeepele bwa kulomba aci, bwalu Wêwè ngwâkalaya ne ki ciikalaYe, ne ndi mumanye ne ki ciikalaYe. Mu Dînà dya Yesu mmutudi tulomba emu. Amen.

Mpindyewu, ne mitu yetu miinyika, bwa katanci kakese cyenaana.

⁴⁴³ Ne diitabuuja, mwikàle ngiitabuuja, ngânùsambìdidi, mûndì paanyi mumanye amu. Ndi–ndi musambile ne meeji matooke ônsò, ônsò ândì paanyi mumanye bwa kusambidila naawu awu.

⁴⁴⁴ Tangilaayi, ndi mfika ku dyumvwa aci. Nudi bamanye mudi bwalu anyi? Byadiikumi byenu ne milambu yenu ki bitu bimpetesha mwa kudya. Ndikwacisha dyenu adi, ku ekeleesiya eku, mu mushindu wa ne ndi mpetaku muntu mwine wa mêmè kuyiisha. Ndinanga dyenu, ne “amens” yenu ayi, ne bwobumwe bwenu abu. Ne mêyì enu a musangeelu mu dipatuka dya pa buloba bujima panuyaaya apu, mu myaba mishiileshiihangane ya mu ditunga dijima, mêyì enu awu ngadi akwacisha bwa kutwala Mukenji. Nnwénù aba. Tudi bakwacishanganyi mu cyôci eci, pamwe ne Kilisto. Tudi bânà baa muntu balume ne bakaji, ne Yéyè udi Mfumu wetu. Ne mêmè ndi mununange. Mêmè–mêmè–mêmè–mêmè, mwaba wûndì, ndi muswe nwénù nwikàlepù. Ndi ngendesha kashinyi nkoslola ditunga dijima, bwa külwa kunuyiisha misangu bu yibidi cyanaana. Ntu ne dijinga dyâbûngì be dya kudisangishaku neenu mwaba ewu mu dyalumingu mu dinda. Ndi mununange. Ntu anu mununange misangu yônsò. Misangu mikwabo bitu bikengela bwa mêmè kwakula ne mêyì muumisha cyoneyoncyo, kadi adi anu mbwa kulongolola bilema. Nudi numona’s, cidi anu mbwalu ndi mununange, nwamonu’s, ne mêmè ncyêna muswe Cinupicile to. Nwénù, kanucipangidiku to.

⁴⁴⁵ Mpindyewu, anu ne kalolo ne kudipwekesha kwônsò, ne byônsò bidi munda mwa mwoyi webe amu abi, mu ndondo menemene mwamwa, Cítâbè wêwè anu cyanaana. Amba ne: “Mukalenge Yesu, anu mpindyewu mene angata byônsò bidi munda mwanyi emu, bidi kabiyi bifwanangane Neebe abi,

ne enzaku bwa nguumushe maditambishi aanyi ônsò, byônsò bidi munda mwanyi abi, mbyélè pambelu. Bucyafu bwônsò, bupidya bwônsò bùdì munda mwanyi abu, ndi—ndi mbuumusha mpindyewu, Mukalenge. Ndi mbitwa anu miseba mbyela pambelu. Nenku Nyuma Mwîmpè wa kalolo wa Nzambi awu, bu nyuunyi wa nkuci, atuulukeku abwele munda mwanyi. Ndi—ndi muswe kwikala ne mwoyi Cyendeleele, Mukalenge, ne ndi—ndi muswe bwa Wêwè kunkwacishaku pa dîbà edi. Enzaku nanku mpindyewu.”

⁴⁴⁶ Panucidi nusambilà, ne patwikala twimbila musambu ewu mu matama, anyi tuwimba bituulubituulu apu, cyapamwe, *Ndi MuMunangè*. Nenku, vulukaayi ne, cidi cilwa nku dinanga, bwalu Yéyè udi dinanga. Pâncìdì muteeke byanza byanyi pa mishwala eyi apa, bwalu bantu mbafwanyine kuyipeta kumpala kwa disangisha dya bufuku.

Ndi muMunange, ndi muMunange
Bwalu Yéyè wakannanga kumpala
Ne wakampetela lupandu
Ku muci wa Kalvariyo.

Ndi muMunange, ndi muMunange
Bwalu Yéyè wakannanga kumpala,

Mpindyewu lekelela anu nsòmbelu webe kudi Ye cyanaana.

Ne wakampetela lupandu
Ku...wa Kalvariyo.

⁴⁴⁷ Munangà, Munangà, Munangà Yéyè. Mona cidiYe mukwenzele wêwè aci. Nku dinanga. Dinanga ditu ditwala ditumikila. Dinanga ditu ditwala dyendelangana bwa dibaka. Dinanga ditu ditwala dibaka. Ne kwôkò aku nkutudi batangile twenda tuyá: ku Didya dya Dibanzi dya Mwânà wa mukooko. Ndi ngumvwa Musungidi wanyi ubiikila, wàmба ne Yéyè mmunnange pende.

...mêmè paanyi, bya mwomumwe.

Ndi...

⁴⁴⁸ Anu ne mwoyi webe wônsò, umvwa anu Cintu kampanda cya kalolo menemene cyenda cibwela munda mwebe amu. Ki Nyuma Mwîmpè nyawu.

Bwalu Yéyè wakannanga kumpala
Ne wakampetela lupandu
Ku muci wa Kalvariyo.

⁴⁴⁹ Bu... Nêngélè byanza byanyi muulu, pamwe ne bateejeji, ne mijiki. Pângììkalà mwenze mpekaatu, pângììkalà mwenze cintu kampanda cya cibi...

Ndi nsambilà mpindyewu bwêñù nwêñù, ne bwanyi mêmè mwine.

⁴⁵⁰ Pângìikalà mwenze cintu kampanda cya cibi, cyanza cyanyi cituma Kûdì, Mukalenge, nciswe kwamba ne ndi nyingalala. Cyanza cyanyi Kûdì, Mukalenge, nciswe kwamba ne ncyêna—ncivwa muswe kucyenza to. Nenku ndi mumanye ne ndi munkaci mwa kupùnga ne lufu, Mukalenge. Nebikengele bwa mêmè kuumuka pa buloba ebu, mu mmwenekelu wa mubidi. Ndi muswe kutuutakeena Neebe. Cyanza cyanyi nciswe kwamba ne, cyângâtèku, Mukalenge. Nguujeku ne Nyuma. Mpeesheku Cimanyinu cya dinanga Dyebe pambidi paanyi, Nyuma Mwîmpè awu, wîkala mwa kumfikisha ku diikala ne nsòmbelu wa kalolo, wa musangeelu, kumfikisha ku diikala ne nsòmbelu wa Mwoyi uvwa munda mwa Kilisto awu; bwa mwoyi wanyi walakukaku kypy bwa bakwabo, bwa binkolela bwa kushaalà mwikishe, muunya ne bufuku, too ne pângìikalà mwa kupeta bantu bônsò bândì mwa kupeta abu. Nêngìkalè bu muvva baamusanjeela baa ku Yeleko abu; nênye kudi muntu ne muntu kûndì ne mushindu wa kuya aku, ne kumona ní ndiku mwa kubafikisha mwinshi mwa cipungidi cya Mashi, mwinshi mwa Mashi a Mwânà wa mukooko, bwa baamonaku mwa kupeta Cimanyinu aci.

⁴⁵¹ Nwamonu's, Mashi ngadi akezula. Nyuma n'Cimanyinu cya ne Mashi akaadi malaabiibwe. Nwamonu anyi? Nyuma n'Cimanyinu cya ne Mashi akaadi malaabiibwe. Padi anu Mashi kaâyi malaabiibwe to, Nyuma kêna—kêna mwa kulwa to. Kadi padi Mashi malaabiibwe, dîbà adi Nyuma n'Cimanyinu, ûcipingaja kûdî wêwè ne, diitabuuja dyebe mu Mashi dyamanyi kwitabiiibwa, mushinga webe wa lwendo ukaadi mufuciibwe. Mushinga wa lwendo lwebe ukaadi mufuciibwe. Byônsò bikaadi bimane kujika. Cilumbu cyamanyi kujika. Wêwè udi mwena Kilisto. Udi mwena kwitabuuja. Kilisto udi munda mwebe, ne wêwè udi munda mwa Kilisto.

... wakannanga kumpala
Ne wakampetela lupandu
Ku muci wa Kalvariyo.

⁴⁵² Ne myoyi yenu miinyika mpindyewu kumpala kwa Nzambi; mpaasata wenu, Mwaneetu Neville, ne mêtè ende a dijikija naawu ne ciikalaye mwa kwamba aci.

⁴⁵³ Nwavulukaayi masangisha a dilolo edi, mudimu wa dyondopa. Nwâlwayikù kumpala kwa dîbà. Tubangaayiku pa dîbà mwandamutekete, bwa byampicishaku mu cyambilu pa dîbà mwandamutekete ne tusunsa makumi asatu. Mbikumbane nanku anyi, Mwaneetu Neville? [Mwaneetu Neville udi wamba ne: "Abi mbîmpè."—Muf.] Mpindyewu netwikale mwa kwangata meesa a Mukalenge, nudi numona's, dilolo edi. Nwâlwayi!

⁴⁵⁴ Mu mapingaja emu, nushalaayi anu naaCi. Kanulekedi Mukenji ewu unushiya to. Vulukaayi ne, kanulekediku Mukenji ewu unushiya uya to!

⁴⁵⁵ Mashi neikale Cimanyinu cya ne Mwoyi mmufidiibwe. Nwamonu anyi? “Nenku pâNgààmònà mashi, Némpicilè pamutu peenu.” Nyuma Mwîmpè n’Cimanyinu cya ne Mashi akaadi malaabiibwe ku mwoyi webe, ne Yêyè n’Cimanyinu cya ne Mashi akaadi malaabiibwe. Ôwò kaàyikù malaabibwe kacya to, dîbà adi Cimanyinu kacyakulwa to. Nudi nuumvwa anyi? Ambaayi ne: “Amen.” [Disangisha didi dyamba ne: “Amen.”—Muf.] Mashi adi ne cya kulaabiibwa, ne pashishe Cimanyinu cidi cilwa. N’Cimanyinu cya ne Mashi a bupikudi akaadi malaabiibwe ne mushinga webe wa lwendu mmufuciibwe. Nzambi anubeneshe. Mwaneetu Neville.



CIMANYINU LUA63-0901M
(Token)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu dituku 1 dya ngondo wa citeema, cidimu cya 1963, mu Branham Tabernacle mu Jeffersonville, Indiana, U.S.A. Ndyumusha pa mukaba wa mèyi ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmunuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lüntândalà, kulamiibwa mu cikàlwîlà, kukudimunyibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org